

續文選序

武原胡震亨孝轅撰

若夫文選者蓋集部之最撰也掇珠羣琲登玉  
衆鼓篇有儉於五百功故兼乎太半七代體變  
時往該具所未告訖江左剩豔南北析異文賞  
不諧太和新風抑又闕綴畢斯一壇允歸齊鑒  
而孟裴兩卜孫張二徐並構錄唐年軼簡今代  
棄拾衷頗蓋莫詳焉嗣後增補廣益名目間出  
又取義摭遺無聞胤絕詳天監迄義寧百餘年



中詞人著集卷踰二千而宋世搜輯僅存七十  
餘蘭菊荒萎採擷靡因諸家輟纂良以茲乎弱  
齡結好摺合散亡公車再罷暇事銓續篇製流  
別準視徃例及乎衡量微函殊旨夫揚都之體  
並咸洛而貌今任沈之篇綴楊班而氣古何哉  
良由衷裁雅艷儷協未廣環思圓義既絡繹引  
屬單文散句亦參伍映帶斯故不遠先程易相  
甄附昭明斷章巧與時會暨乎宮體扇豔組織  
彌工意匿文繁墨采黯黠作者轉擬夸勝而變

窮對屬惟復要束參差鏗帖岨嶮令字句齊截  
音奏叶利四六於焉濫觴詩律因之漸備風流  
浸淫職成唐體是以約略今編示存砥柱興象  
踰濫必格以矩位事義叢雜則批以絲理膚澤  
浮渲旣推討神幹節絡拘緩復參觀風瀾庶得  
刪蕪集英合則前撰爾其綜比纖藻帖合巧對  
頌酒賡色之句唱景貌物之篇造色必鮮送聲  
偏嫵古人或有未屆時賢良復孤擅故乃乍諷  
致語體解意痒還逢壯采骨騰肉飛信摘揆之



奢趣而咀誦之極興也梁代前入九人今自外  
合後魏北齊後周陳隋撰爲十四卷并標釋大  
旨列目如左

續文選目錄

第一卷

賦一

法集

玄圃園講賦

蕭景喬

紀行

玄覽賦

梁元帝

南征賦

張伯緒

第二卷





賦二

草木

梅花賦

梁簡文帝

枯樹賦

庾子山

鳥獸

舞馬賦

張士簡

志

哀江南賦

庾子山

音樂

金罇賦

梁簡文帝

箏賦

梁簡文帝

第三卷

詩一

獻詩

入隋侍宴應詔

陳後主

公讌

九日侍宴樂游苑應令

庾子慎

秋日侍宴婁湖苑應詔

江揔持



祖餞

從鎮江州與故游夜別

何仲言

與胡興安夜別

何仲言

相送

何仲言

相送聯句三首

重別周尚書二首

庾子山

游覽

登城

梁簡文帝

往虎窟山寺

梁簡文帝

奉和往虎窟山寺

王臺卿

北寺寅上人房望遠岫翫前池

王元禮

游鍾山開善寺

徐隱忍

奉和同泰寺浮圖

庾子山

詠懷

詠懷

吳叔庠

和張侍中述懷

庾子山

哀傷



過建昌故臺

庾子慎

奉和東宮經故妃舊殿

江揔持

贈答

暮秋答朱記室

何仲言

遇長安使寄裴尚書

江揔持

寄王琳

庾子山

山齋獨坐贈薛內史

楊處道

贈薛播州

楊處道

行旅

初發新林

何仲言

入若耶溪

王文海

上虞鄉亭觀濤津渚學潘安仁河陽縣詩

劉孝綽

帆渡吉陽洲與孝威同賦

劉孝儀

渡青草湖

陰子堅

於長安歸還揚州九月九日行薇山亭賦

韻

江揔持



樂府上

子夜歌

梁武帝

子夜四時歌

夏歌二首  
秋歌一首

梁武帝

歡聞歌

梁武帝

白紵辭

梁武帝

龍丘引

梁簡文帝

烏棲曲

梁簡文帝

烏棲曲

梁元帝

起夜來

柳文暢

行路難

王元禮

遊獵篇

劉孝威

陌上桑

王臺卿

度關山

戴暉

玉樹後庭花

陳後主

新成安樂宮

陰子堅

關山月

徐孝穆

烏棲曲

徐孝穆

當壚曲

岑之敬

國家圖書館, NATIONAL CENTRAL LIBRARY, TAIWAN, R.O.C.



長安道

阮卓

關山月

王子淵

烏夜啼

庾子山

出塞

楊處道

從軍行

盧子行

聽鳴蟬篇

盧子行

昔昔鹽

薛玄卿

入關

虞茂世

從軍行

明餘慶

第四卷

詩二

樂府下

卷中發例

梁鼓角橫吹曲辭

企喻歌辭四曲

瑯琊王歌辭

黃淡思歌辭

地驅樂歌辭四曲

地驅樂歌



隴頭流水歌辭三曲

隴頭歌辭三曲

捉搦歌四曲

折楊柳歌辭

折楊柳枝歌四曲

幽州馬客吟歌辭

高陽樂人歌二曲

木蘭詩

近代吳歌

子夜歌

子夜四時歌

歡聞歌一首

歡聞變歌

前溪歌

黃生曲

黃鵠曲四首

長樂佳

懊儂歌



華山畿

讀曲歌

黃竹子歌一首

近代西曲歌

烏夜啼

莫愁樂

估客樂二曲

襄陽樂

三洲歌三曲

江陵樂

安東平

來羅四曲

那呵灘六曲

孟珠二曲又一曲

翳樂一曲又二曲

雙行纏二曲

黃督二曲

白附鳩一曲



作蠶絲

西烏夜飛

月節折楊柳歌 四月歌

雜曲

聖郎曲一首

嬌女詩二曲

陽春曲

樂辭

西洲曲

長干曲

歎疆場

雜歌

東飛伯勞歌

梁武帝

河中之水歌

梁武帝

行幸甘泉宮歌

劉孝威

挾琴歌

魏伯起

勅勒歌

第五卷



詩三

雜詩

詠螢

梁簡文帝

愁閨照鏡

梁簡文帝

行雨

梁簡文帝

賦得竹

梁元帝

春別應令

梁元帝

別詩

梁元帝

擣衣詩

柳文暢

雜詩

柳文暢

詔問山中何所有賦詩以答

陶通明

邊城將

吳叔庠

寶劍

吳叔庠

詠美人治粧

江洪

和蕭諮議岑離閨怨

何仲言

詠早梅

何仲言

照水聯句



和衛尉新渝侯巡城口號 王元禮

和皇太子重雲殿受戒 庾子慎

奉和春夜應令 庾子慎

和徐主簿望月 庾子慎

賦得轉歌扇 庾子慎

詠殘燈 紀幼瑒

侯司空宅詠妓 陰子堅

西遊咸陽中 陰子堅

山齋 徐孝穆

姬人怨 江揔持

擣衣 溫鵬舉

幽居值春 庾子山

和趙王看伎 庾子山

渭濱作 庾子山

暮秋野興賦得傾壺酒 庾子山

塵鏡 庾子山

詠鴈 庾子山

和崔侍中從駕經山寺 蕭仁祖



秋思

蕭仁祖

賦昆明池一物得織女石

虞茂世

雜擬

代美女篇

蕭景陽

擬詠懷詩

庾子山

第六卷

詔

天嘉六年修前代墓詔

勅

天平元年被命作答齊神武勅

溫鵬舉

令

霸府禁奢令

梁武帝

與湘東王令

梁簡文帝

答勸進羣下初令

梁元帝

送葬徐則下書

隋煬帝

教

招隱逸教

蕭彥達



表

請徵補謝朓何胤表

梁武帝

爲王僧辨勸進梁元帝初表

沈初明

第二表

沈初明

第三表

沈初明

經通天臺奏漢武帝表

沈初明

陳情表

沈初明

勸進梁元帝表

徐孝穆

爲陳六宮謝表

江摠持

爲晉陽公上玉律秤尺斗升表

庾子山

齊王進白兔表

庾子山

齊王進赤雀表

庾子山

第七卷

啓

謝勅賚地圖啓

梁昭明太子

謝勅賜第啓

梁元帝



謝晉安王賜馬啓

梁元帝

答湘東王啓

劉孝綽

謝晉安王賜宜城酒啓

劉孝儀

謝東宮賜宅啓

庾子慎

謝東宮賚古跡啓

庾子慎

謝賚梨啓

庾子慎

謝蒙賚朱櫻啓

庾子慎

謝滕王賚馬啓

庾子山

彈事

彈賈執傳湛文

劉孝儀

牋

辭南康王牋

王僧孺

書一

答湘東王求文集及詩苑英華書

梁昭明太子

答湘東王和受試詩書

梁簡文帝

與廣信侯書

梁簡文帝

答新渝侯和詩書

梁簡文帝



與蕭臨川書

梁簡文帝

與劉智藏書

梁元帝

答齊國餉雙馬書

梁元帝

報伏士標書

徐修仁

北使還與永豐侯書

劉孝儀

爲衡山侯與婦書

何仲言

答許亨道書

王君才

爲侯景報齊文襄書

王偉

第八卷

書二

與詹事江摠書

陳後主

在北齊與楊僕射書

徐孝穆

答周處士書

徐孝穆

與李那書

徐孝穆

爲王寬與婦義安主書

伏知道

與周處士書

王子淵

復王少保書

周弘讓

與兄子秀書

陳暄



遺史祥書

隋煬帝

召王貞書

楊世肫

與陳徐僕射求王琳首書

朱瑒

第九卷

檄

討侯景檄文

梁元帝

討陳寶應都官符

陸伯玉

序一

陶淵明集序

梁昭明太子

梁簡文帝法寶聯璧序

梁元帝

真靈位業圖序

陶通明

後漢書注補志序

劉宣卿

詩評序

鍾仲偉

第十卷

序二

昭明太子集序

劉孝綽

御講般若經序

陸子龍

齊竟陵王世子撫軍巴陵王法集序



釋僧祐

徐孝穆

劉師知

高伯恭

玉臺新詠序

侍中沈府君集序

徵士頌序

三月三日華林園馬射賦序

庾子山

盧子行

孤鴻賦序

潘伯彥

江都集禮序

第十一卷

頌

菩提樹頌 并序

梁簡文帝

大法頌 并序

梁簡文帝

馬寶頌 并序

梁簡文帝

神雀頌 并序

許務本

第十二卷

贊

鶴讚 并序

庾子山

法供贊二首

江揔持



史論

齊書文學傳論

蕭景陽

齊書高逸傳論

蕭景陽

魏書僭偽傳論

魏伯起

論

史傳篇

劉彥和

神思篇

劉彥和

夸飾篇

劉彥和

物色篇

劉彥和

惜時論

劉孔昭

家訓論文章

顏介

連珠

連珠一首

梁武帝

連珠二首

吳叔庠

第十三卷

銘

後堂望美人山銘

徐孝穆

永陽王齋後山亭銘

江揔持

國家圖書館, NATIONAL CENTRAL LIBRARY, TAIWAN, R.O.C.



誄

梁故度支尚書陸君誄

并序

江揔持

盧記室誄

盧子行

哀

隋元德太子哀冊文

虞茂世

碑文

招真館碑銘

梁簡文帝

四瀆祠碑銘

王子淵

周大將軍司馬碑

庾子山

周車騎將軍賀婁公神道碑

庾子山

瑞鳥銘

并序

虞士裕

第十四卷

墓誌

陶貞白先生墓銘

梁簡文帝

楊都興皇寺釋法朗墓誌銘

陳後主

周故大將軍幽國公墓銘

庾子山



周大將軍懷德公吳明徹墓誌

庾子山

周趙國公夫人紇豆陵氏墓誌銘

庾子山

周譙國公夫人步陸孤氏墓誌銘

庾子山

周儀同松滋公拓跋競夫人尉遲氏墓誌

庾子山

銘

思舊銘

并序

庾子山

祭文

祀魯山神文

蕭世調

祭夫徐悌文

劉令嫻

雜文

周經藏願文

王子淵



續文選目錄

畢

著作人姓名錄

前選姓名常氏別錄涇城專學疏附首唱統有  
詁釋省且散繫遲未通箋是須族哀今所緝比  
衷繁徃裁將顯文心故資影借神明風標取可  
則似筆穎宦位升躡互復通驗思興巧會衆科  
篇翰不遠方同文評詎域行譜戊戌八月一日  
胡震亨識

梁

武帝姓蕭氏諱衍字叔達南蘭陵人受齊禪在



位四十八年侯景寇逆以憂憤崩帝少而篤  
學雖萬機多務猶卷不輟手燃燭側光常至  
戊夜天情睿敏下筆成章千賦百詩直疏便  
就皆文質彬彬超邁今古每所御幸輒命羣  
臣賦詩其文善者賜以金帛詣闕庭而獻賦  
頌者或引見焉爰初在田洎登寶位躬製贊  
序詔誥銘誄箴頌牋奏百二十卷兼篤信正  
法尤長釋典六藝備閑棊登逸品陰陽緯候  
卜筮占決草隸尺牘騎射莫不稱妙

昭明太子統字德施武帝長子生而聰叡讀書  
數行並下過目皆憶三歲受孝經論語五歲  
通五經美姿貌善舉止腰帶十圍天性仁孝  
寬和容衆喜愠不形於色每遊宴祖道賦詩  
至十數韻或作劇韻皆屬思便成無所點易  
引納才學之士賞愛無倦恒自討論墳籍或  
與學士商推古今閒則繼以文章著述率以  
爲常於時東宮有書幾三萬卷名才並集文  
學之盛晉宋以來未之有也集二十卷簡文



帝撰

簡文帝諱綱字世纘武帝第三子初封晉安王  
昭明太子薨立爲皇太子侯景制命嗣位期  
年遇弒帝幼而敏睿六歲便能屬文武帝面  
試攬筆立成歎曰常以東阿爲虛今則信矣  
及長器宇寬弘未嘗見愠喜尊嚴若神方頤  
豐下鬚鬢如畫直髮委地雙眉翠色手執玉  
如意不相分辨盼睐則目光燭人讀書十行  
俱下經目必記辭藻豔發博綜羣言善談玄  
理引納文學之士賞接無倦雅好題詩其自  
序云余七歲有詩癖長而不倦然傷於輕靡  
時號宮體集一百卷

元帝諱繹字世誠武帝第七子湘東王荊州刺  
史討誅侯景正位江陵西魏來伐見害帝聰  
悟俊朗天才英發出言爲論音響若鐘自序  
六歲解爲詩因爾稍學爲文及長好學博極  
羣書年十二患疥閑齋張葛幃避蠅獨坐銀  
甌貯山陰甜酒時復進之以自寬痛率意讀



史書一日二十卷年十四便患目多不自執  
卷置讀書左右番次上直晝夜爲常略無休  
已雖睡卷猶不釋五人各伺一更恒致達曉  
常眠睡大鼾左右有睡讀失次第或偷卷度  
紙必驚覺更令追讀加以檟楚聚書四十年  
得八萬卷雖戎略殷湊機務繁多軍書羽檄  
文章詔誥點毫便就殆不游手兼工書畫及  
星象卜筮諸術常曰我韜於文士愧於武夫  
論者以爲得言集五十卷又小集十卷

安成康王秀字彥達高祖之弟歷江荆郢雍四  
州刺史美容儀性仁恕精意學術搜集經記  
招學士平原劉孝標使撰類苑尤好人物當  
世高才王僧孺陸倕劉孝綽裴子野皆遊其  
門世以方之四豪集三十卷

邵陵攜王綸字世調武帝第六子少聰穎博學  
善屬文尤工尺牘坐事再削爵土後得復封  
預餞衡州刺史元慶於坐賦詩十二韻末云  
方同廣川國寂寞久無聲大爲武帝賞曰汝



人才如此何慮無聲旬日間拜郢州刺史後  
爲西魏所攻見殺集六卷

柳惲字文暢河東解人好學善尺牘齊竟陵王  
法曹參軍仕梁再爲吳興太守以貴公子早  
有令名少工篇什始爲詩曰亭臯木葉下隴  
首秋雲飛瑯琊王融見而嗟賞因書齋壁及  
所執白團扇梁朝曲宴必被詔賦詩嘗奉和  
武帝登景陽樓篇深見賞美當時咸共稱傳  
善鼓琴及投壺射弈碁好醫術盡其精妙武

帝嘗曰柳惲分其才藝足了十人集十二卷  
王僧孺字僧孺東海剡人七歲能讀十萬言家  
貧傭書養母寫畢諷誦亦了齊竟陵王子良  
開西邸招文學僧孺遊焉梁代爲御史中丞  
武帝製春景明志詩五百字辭人同和帝以  
僧孺爲工好墳籍聚書至萬餘卷率多異本  
與任昉沈約家書相埒篤志精力於書無所  
不覩其文麗逸多用新事人所未見者世重  
其富博集三十卷



陶弘景字通明丹陽秣陵人身長七尺七寸神儀明秀朗目疎眉細形長耳少時讀葛洪神仙傳便有志養生謂人曰仰青雲覩白日不覺爲遠矣隱句曲山自號華陽隱居武帝手勅招之不出卒贈中散大夫謚貞白先生性好著述尚竒異顧惜光景老而彌篤讀書萬餘卷一事不知以爲深恥善琴碁工草隸尤明陰陽五行風角星算山川地理方圖產物醫術本草江摠云文集缺亡門人補緝凡三十卷又內集十卷

張率字士簡吳郡吳人年十二能屬文常日限爲詩一篇稍進作賦頌至年十六向二千許首有虞訥者見而詆之率乃焚毀更爲詩託云沈約訥便句句嗟稱率曰此吾作也訥慙而退陸少玄家有父澄書萬餘卷率盡讀之爲司徒掾直文德省奏待詔賦帝勅答曰相如工而不敏枚臯速而不工卿兼二子於金馬矣又侍宴賦詩別賜詩目爲東南才子褱



飲奉詔作舞馬賦復見稱賞終於新安太守  
率嗜酒不事於家務尤忘懷在新安遣家僮  
載米三千石還宅及至遂耗大半率問其故  
答曰雀鼠耗率笑而言曰壯哉雀鼠竟不研  
問集三十八卷一云三十卷

吳均字叔庠吳興故鄣人好學有俊才沈約見  
其文頗相稱賞柳惲爲吳興召補主簿日引  
與賦詩文體清拔有古氣好事者或數之謂  
爲吳均體嘗不得意贈惲詩而去久之復來

惲遇之如故弗之憾也薦之臨川王王稱之  
武帝即日召入賦詩悅焉待詔著作累遷奉  
朝請集二十卷

徐勉字修仁東海剡人幼孤貧早勵清節年六  
歲時屬霖雨家人祈霽率爾爲文見稱耆宿  
及長篤志好學累官中書令旣閑尺牘兼善  
辭令雖文案填積坐客充滿應對如流手不  
停筆博通經史多識前載朝儀國典婚冠吉  
凶皆與圖議雖亟居顯職不營產業自云非



謂拔葵去織且欲省息紛紜前集三十五卷  
後集十六卷又爲人章表集十卷

江洪濟陽人工屬文齊竟陵王子良開西邸招  
文學洪與王僧孺虞羲丘國賓蕭文琰丘令  
楷劉孝孫並以善辭藻遊焉子良嘗夜集學  
士刻燭賦詩四韻率刻一寸文琰曰頓燒一  
寸燭而成四韻詩何難之有乃與洪及令楷  
共打銅鉢立韻書成皆可觀覽爲建陽  
令坐事死鍾嶸一法詩雖無多亦能自迥出

集二卷

刻燭事太平御覽全抄南史却作江  
洪又注云音拱宋初史本定復不誤  
未知藝文新詠  
何緣盡作洪字

劉昭字宣卿平原高唐人幼清警七歲通老莊  
義旣長勤學善屬文外兄江淹早相稱賞集  
後漢同異以注范曄書世稱博悉卒於剡令  
集十卷

何遜字仲言東海剡人八歲能賦詩弱冠州舉  
秀才范雲見其對策結忘年交自是一文一  
詠雲輒嗟賞謂所親曰頃觀文人質則過儒



麗則傷俗其能含清濁中今古見之何生矣  
沈約嘗謂遜曰每讀卿詩一日三復猶不能  
已遜文章與劉孝綽並見重時謂之何劉孝  
綽亦甚忌之撰詩苑止取兩篇時人譏其不  
廣世祖著論論之云詩多而能者沈約少而  
能者謝朓何遜天監中兼尚書水部郎卒於  
仁威廬陵王記室王僧孺集其文為八卷

遜聯句詩有韋黯王江乘劉綺南史黯字務直京兆杜陵人少習經史位太府卿死侯景圍中江乘無考顏氏家訓綺彭城人早孤家貧燈燭難辦常買荻尺寸折之燃明夜讀元

帝初出會稽精選寮案綺以才華為國常侍兼記室殊蒙禮遇終於金紫光祿

鍾嶸字仲偉潁川長社人好學有思理齊永明中為國子生明周易王儉領祭酒頗賞接之天監中衡陽王引為寧朔記室專掌文翰應教製何居士瑞室頌辭甚典麗嘗品古今五言詩論其優劣名為詩評

劉孝綽字孝綽彭城人本名冉七歲能屬文舅王融嘗與同載適親友號曰神童每曰天下文章若無我當歸阿士阿士其小字也年十



四代父繪草詔誥父黨沈約任昉范雲並聞  
名造駕起家著作郎侍宴於坐賦詩七首武  
帝篇篇嗟賞昭明太子好士愛文與殷芸等  
同見賓禮圖形樂賢堂辭藻爲後進所宗每  
作一篇朝成暮徧流聞河朔亭苑柱壁莫不  
題之終秘書監孝綽少有盛名而仗氣負才  
多所陵忽有不合意極言詆訾每於朝集會  
同處公卿間無所與語反呼騶卒訪道塗間  
事由此多忤於物前後五免集十四卷

潛字孝儀孝綽弟幼孤與諸兄弟相勵勤學並  
工屬文孝綽嘗云三筆六詩三即孝儀六孝  
威也爲尚書殿中郎勅製雍州平等金像碑  
文甚宏麗終豫章內史集二十卷

孝威潛之弟也氣調爽逸風儀俊舉初爲晉安  
王法曹後爲太子洗馬大同中白雀集東宮  
孝威上頌其辭甚美遷中庶子兼通事舍人  
集十卷

劉勰字彥和東莞莒人早孤篤志好學家貧不



婚娶依沙門僧祐居遂博通經論官步兵校尉兼東宮通事舍人深被昭明太子愛接撰文心雕龍五十篇論古今文體欲取定於沈約乃負書候約於車前狀若貨鬻者約取讀大重之謂深得文理常陳諸几案勰爲文長於佛理都下寺塔及名僧碑誌必請勰製文後出家定林寺改名慧地文集行世

王籍字文海瑯琊臨沂人七歲能屬文及長好學博涉有才氣雅爲任昉沈約稱賞爲詩慕

謝靈運至其合也殆無愧色甚工草書筆勢適放除輕車湘東王諮議參軍隨府會稽郡賦若邪溪詩劉孺見之擊節不能已已以公事免及爲中散大夫彌忽忽不樂乃至徒行市道不擇交游有時塗中見相識輒以笠傘覆面後爲作唐侯相小邑寡事彌不樂不理縣事人有訟者鞭而遣之未幾而卒湘東王集其文爲十卷

陸雲公字子龍吳郡人五歲誦論語毛詩九歲



讀漢書略能記憶從祖倅與劉顯質問十事  
對無所失好學有才思嘗製太伯廟碑文張  
纘讀而歎曰今之蔡伯喈也言之武帝召爲  
尚書儀曹郎遷中書黃門郎掌著作天淵池  
新製編魚舟帝汎舟朝中惟引太常劉之遴  
國子祭酒到漑右衛朱异雲公時年位尚輕  
亦預焉其恩遇如此集十卷

蕭子顯字景陽蘭陵人齊高帝孫也封寧都侯  
入梁降爵爲子歷吳興太守身長八尺風神

灑落雍容閑雅飲酒數斗頗負才氣簡通賓  
客嘗自序云追尋平生頗好辭藻若乃登高  
目極臨水送歸風動春朝月明秋夜早鴈初  
鶯開花落葉有來斯應每不能已前代賈傳  
崔馬邯鄲繆路之徒並以文章顯所以屢上  
歌頌自比古人天監六年始預九日朝宴稠  
人廣坐獨受旨云今雲物甚美卿將不斐然  
賦詩詩旣成又降旨曰可謂才子每有製作  
特寡思功須其自來不以力構少來所爲詩



賦則鴻序一作頗爲好事所傳故虛聲易遠  
集二十卷別撰齊書行世

子雲字景喬子顯弟年十二封新浦侯自製拜  
章便有文采入梁降爵爲子勤學有文藻風  
神閒曠任性不羣夏月對賓客恒自裸袒湘  
東王深相賞好如布衣之交歷侍中國子祭  
酒改撰郊廟樂章善草隸自云全範元常百  
濟國使人至建鄴求書於渚次望見子雲船  
三十許步行拜行前曰侍中尺牘之美遠流  
海外今日所求唯在名迹子雲爲停三日書  
三十紙與之獲金貨數百萬好事者每重加  
賂遺以要酬答集十九卷

王筠字元禮瑯琊臨沂人沈約覽其文自謂不  
逮嘗語之曰自謝朓諸賢零落平生意好殆  
絕不謂遲暮復逢於君爲詩能壓強韻每公  
宴並作辭必妍美狀貌寢小長不滿六尺不  
以藝能高人而少擅才名與劉孝綽見重當  
時仕至太子詹事筠之自序云少好抄書老



而彌篤雖遇見瞥觀皆即疏記幼年讀五經  
皆七八十遍愛左氏春秋吟諷常爲口實廣  
略去取凡三過五抄餘經及周官儀禮國語  
爾雅山海經本草並再抄子史諸集皆一遍  
自撰其文以一官爲一集自洗馬中書中庶  
吏部左佐臨海太府各十卷尚書三十卷凡  
百卷

張纘字伯緒范陽方城人身長七尺四寸眉目  
疎朗神采爽發性好學兄緬有書萬餘卷晝  
夜披讀殆不輟手尚主封利亭侯起家秘書  
郎固求不徙欲徧觀閣內書籍爲湘州刺史  
多寫圖書數萬卷後被岳陽王囚害纘負其  
才氣性特輕傲吳興吳規頗有才學邵陵王  
宴纘規在坐纘忽舉盃曰吳規此酒慶汝得  
陪今宴規尋起還其子翁孺知之因氣結爾  
夜便卒規憤哭兼至信次之間又致殞規妻  
深痛夫子翼日又亡時人謂張纘一盃酒殺  
吳氏三人集二十卷



庾肩吾字子慎新野人八歲能賦詩初為晉安王國常侍王每徙鎮肩吾常隨府在雍州被命與劉孝威江伯搖孔敬通申子悅徐防徐摛王囿孔鑠鮑至等十人抄撰眾籍號高齋學士王為太子開文德省置學士肩吾與子信同預其選侯景之亂逃赴江陵封永康縣侯集十卷

王臺卿 南史南平王恪位雍州刺史年少未閑庶務賓客有江仲舉蔡遠王臺卿庾仲

容四人俱被接遇並有蓄積人間歌曰江千萬蔡五百王新車庾大宅遂達武帝帝接之

曰主人憤憤不如客廣弘明集臺卿和簡文帝往虎窟山寺詩署云州民前吏刑獄參軍簡文時臨南徐臺卿宜是南徐州人簡文八關齋夜與臺卿及庾肩吾等賦四城門詩簡文時為皇太子臺卿又宜是文德省學士也

王僧辨字君才太原祁人以平侯景功封永寧郡公加太尉車騎大將軍後為陳武帝襲殺

按南史雖稱僧辨學涉該博然多在戎旅之間史傳所載書牘恐出掌記許亨沈炯孔魚諸人之手如與陳霸先誓文勸進元帝三表則已明列沈炯集矣

紀少瑜字幼瑒本姓吳丹陽秣陵人幼孤有志節慕王安期之為人十三能屬文初為京華



樂王僧孺見而賞之曰此子才藻新拔方有高名嘗夢陸倕以一束青鏤管筆授之其文因此適進爲晉安王中尉深被恩遇後引爲東宮學士邵陵王在郢啓求學士武帝以少瑜充行

王偉陳留人學通周易雅高辭采仕魏爲司徒侯景行臺郎景之表啓書檄皆其所製景篡梁偉爲謀主及囚送江陵前尚書左丞虞隲嘗見辱於偉遇之而唾其面曰死虜庸復能

爲惡乎偉曰君不讀書不足與語隲慙而退獄中上五百字詩以希不死元帝愛其才將捨之朝士多忌乃請曰前日偉作檄文有異辭句帝取視其檄云項羽重瞳尚有烏江之敗湘東一目寧爲赤縣所歸大怒殺之

戴嵩

無考

釋僧祐本姓俞氏彭城人於建初寺入道後至定林大精律部武帝勅聽乘輿入內殿爲六宮受戒所撰有三藏記法苑集世界記釋迦



譜弘明集并法集雜記傳銘七卷自序云山  
房寂遠泉石清密廣評衆典披覽爲業或專  
日遺殮或通夜繼燭

劉令嫺孝綽之第三妹也孝綽三妹並有才學  
令嫺文尤清拔適東海徐悝悝爲晉安郡卒  
喪還建業製祭文辭甚悽愴父勉本欲爲哀  
辭及見此文乃閣筆蕭韶稱劉孝儀諸妹文  
彩艷質甚於神人也有集三卷一云六卷

唐詩品彙收令嫺詩謂唐初尚在按徐悝卒于普通五年至唐武德初元已九十四年矣

作許久發婦政不知年幾結禱

陳

後主諱叔寶字元秀怠於政事惟寄情文酒臣  
下表疏及獻上賦頌者省覽辭工則賞激加  
其爵位起臨春結綺望仙三閣居張貴妃孔  
龔二貴嬪以宮人有文學者袁大捨爲女學  
士常使張貴妃等八人夾坐江摠孔範等十  
人預宴號曰狎客先令八婦人襞采箋製五  
言詩十客一時繼和遲則罰酒採其尤艷麗



者以爲曲詞被以新聲令宮女有容色者以千百數習而歌之分部迭進持以相樂君臣酣飲從夕達旦率以爲常國亡入隋常耽醉罕有醒時文帝使節其酒旣而曰任其性不爾何以過日集三十九卷

周弘讓汝南安成人性簡素博學多通始仕不得志隱於句容茅山頻徵不出晚仕侯景人問其故對曰吾畏死耳霸朝爲仁威將軍城句容以居之命曰仁威壘天嘉中以白衣領

太常卿光祿大夫加金章紫綬前後集二十一卷

劉師知本名師智沛國相人好學有當世才博涉書史工文筆善儀體臺閣故事多所詳悉爲中書舍人掌詔誥朝儀多其所定宣帝入輔賜死

沈炯字初明吳興武康人少有雋才仕梁爲吳令侯景將宋子仙據吳興逼令掌書記王僧辨破子仙素聞其名購得之酬所獲者鐵錢



十萬自是羽檄軍書皆出於炯元帝徵爲給事黃門侍郎魏剋荊州被虜恐以文才見留閉門却掃時有文章隨即毀棄不令流布東歸歷御史中丞加明威將軍前集七卷後集十三卷

陰鏗字子堅武威姑臧人五歲能誦詩賦日干言及長博涉史傳尤善五言詩爲當時所重文帝嘗宴羣臣賦詩徐陵言之帝即日召預宴使賦新成安樂宮詩援筆便就帝歎賞之

累遷晉陵太守員外散騎常侍集三卷

徐陵字孝穆東海剡人自有青睛八歲能屬文博涉史籍縱橫有口辯梁簡文在東宮與父攜同爲學士使北被留後隨貞陽侯還仕陳歷侍中安右將軍左光祿大夫太子少傅陵器局深遠容止可觀性又清簡無所營樹自有陳創業文檄軍書及受禪詔策皆陵所製世祖高宗之世國家有大手筆亦陵草之其文頗變舊體緝裁巧密多有新意每一文出



手好事者已傳寫成誦遂傳於周齊家藏其  
本後逢喪亂多散失存者三十卷

江揔字揔持濟南考城人幼聰慧篤學有文辭  
家傳賜書數千卷晝夜尋讀未嘗去手仕梁  
累官太子中舍人嘗和武帝撰正言畢述懷  
詩深見嗟賞時張纘王筠劉之遴並高才碩  
學揔年少有名纘等雅相推重爲忘年友仕  
陳太子詹事後主即位歷吏部尚書僕射尚  
書令揔性寬和溫裕尤工五言七言然傷於  
浮豔故爲後主所愛幸遊宴後庭多爲豔詩  
好事者相傳諷翫陳亡入隋拜上開府集三  
十卷後集二卷

陸瓊字伯玉吳郡吳人雲公之子幼聰慧有思  
理六歲爲五言詩頗有詞采八歲於客前覆  
局都下號曰神童梁武召見瓊風神警亮進  
退詳審甚異之侯景作逆避地縣之西鄉勤  
苦讀書晝夜無怠遂博學善屬文天嘉中以  
文學累遷尚書殿中郎深爲世祖所賞討周



迪陳寶應等都官符及諸大手筆並中勅付  
瓊後主時直中書省掌詔誥遷吏部尚書有  
集二十卷

岑之敬字思禮南陽棘陽人年十六歲策春秋  
制旨孝經義擢爲高第梁武帝召入面試令  
升講座論難孝經十章剖析縱橫應對如響  
除童子奉車郎尋爲壽光學士司義郎太建  
初授東義省學士累遷南臺治書侍御史征  
南府諮議叅軍之敬始以經業進而博涉文  
史雅有詞筆不爲醇儒性謙謹未嘗以才學  
矜物接引後進恂恂如也集十卷

徐伯陽字隱忍東海人敏而好學年十五以文  
筆稱學春秋左氏家有史書所讀者近三千  
餘卷太建初與朝賢李爽張正見賀徹阮卓  
蕭詮王由禮祖孫登賀循劉刪處士馬樞等  
爲文會後有蔡凝劉助陳暄孔範亦預焉皆  
一時之士也游宴賦詩動成卷軸伯陽爲其  
集序盛傳於世奉使江州鄱陽王率府僚同



登匡嶺置宴酒酣命筆賦劇韻三十伯陽與  
祖孫登前成王賜以奴婢雜物仕至鎮右新  
安王府諮議叅軍

阮卓陳留尉氏人幼而聰敏篤志經籍善談論  
尤工五言詩爲德教殿學士兼通直散騎常  
侍聘隋文帝夙聞其名遣薛道衡顏之推等  
與談讌賦詩賜遺加禮後以目疾退居里舍  
改構亭宇修山池卉木招致賓友以文酒自  
娛

陳暄義興國山人學不師受文才俊逸嗜酒無  
節操後主在東宮引爲學士及即位遷通直  
散騎常侍陪侍游宴謂爲狎客暄素通脫以  
俳優自居文章諧謔語言不節後主甚親昵  
而輕侮之嘗倒縣於梁臨之以刃命使作賦  
仍限以晷刻援筆即成不以爲病而傲弄轉  
甚稍不能容遂搏艾爲帽加於其首焚之然  
及髮獲解數日發悸死

伏知道

無考



後魏

高允字伯恭渤海蓟人性好文學擔笈負書千里就業博通經史天文術數尤好春秋公羊神麈中徵拜中書博士累遷鎮軍大將軍領中祕書事加光祿大夫光寵四世終享百齡有魏以來一人而已所製詩賦詠頌箴論表讚誄等凡百餘篇

溫子昇字鵬舉濟陰冤句人博覽百家文章清婉爲廣陽王深賤客在馬坊教諸奴子書作

侯山祠堂碑文給事中常景見而善之故詣深謝之曰頃見溫生深怪問之景曰溫生是大才士深由是稍知之累官中書舍人散騎常侍齊文襄引爲大將軍諮議及元僅等作亂文襄疑子昇知其謀方使作神武碑文旣成下獄餓死梁使張臯嘗寫子昇文筆傳於江表梁武稱之陽夏守傅標使吐谷渾見其國主床頭有書數卷乃是子昇文楊遵彥作文德論以爲古今辭人皆負才遺行唯子昇



與王元景邢子才彬彬有德素宋游道集其  
文筆爲三十五卷

北齊

魏收字伯起鉅鹿下曲陽人幼習騎射欲以武  
藝自達太學博士鄭伯猷調之曰魏郎弄戟  
多少收慙遂折節讀書夏月坐板床隨樹陰  
諷誦積年床爲銳減而精力不輟以文華顯  
仕魏典起居注兼中書舍人與溫子昇邢子  
才齊名輕薄尤甚人號曰魏收驚蛺蝶天保

初除中書令兼著作郎修魏史後除光祿大  
夫尚書右僕射特進收與邢邵爭名每議陋  
其文邵云江南任昉文體本疎魏收非直模  
擬亦大偷竊收聞乃曰伊嘗於沈約集中作  
賊何意道我偷任昉顏之推嘗以問祖珽珽  
曰見邢魏之臧否即是任沈之優劣集七十  
卷

顏之推字介瑯瑯臨沂人年十二梁元帝講莊  
老便預門徒博覽羣書無不該洽詞情典麗



甚爲西府所稱釋褐湘東國右常侍周破江陵奔齊歷黃門侍郎武平中署文林館待詔者僕射陽休之祖珽以下三十餘人之推專掌其撰修文殿御覽續文章流別等皆是其封署奏上兼善於文字監校繕寫號爲稱職齊亡入周官御史上士隋開皇中太子召爲學士甚見禮重集三十卷子思魯序錄別撰家訓二十篇行世

蕭愨字仁祖梁宗室上黃侯曄之子天保中入齊武定中爲太子洗馬後主時爲齊州錄事叅軍待詔文林館後入隋愨工於詩詠曾秋夜賦詩其兩句云芙蓉露下落楊柳月中疎爲知音所賞集九卷

劉晝字孔昭渤海阜城人少孤貧愛學負笈從師習三禮春秋俱通大義對策不第始學作文製一首賦以六合爲名吟諷不輟爲魏收邢子才所譏晝自謂博物竒才言好矜大每云使我數十卷書行於世不易齊景之千駟



也而容止舒緩舉動不倫由是竟無仕進撰

金箱璧言高才不遇傳及新論五十五篇本傳

及隋經籍志都無新論之目唐志雜家十卷劉勰撰或以爲劉峻晁氏志云劉晝撰應是書晚出也審其體制殊與彥和孝標不倫今從晁氏入選

### 後周

王褒字子淵瑯琊臨沂人識量淹通志懷沈靜美威儀善談笑博覽史傳工屬文兼善草隸梁武帝喜其才藝以弟鄱陽王女妻之歷位安成內史元帝嗣位爲吏部尚書右僕射寵

遇日隆荊州破入長安授儀同三司褒曾作燕歌妙盡塞北苦寒之狀元帝及諸文士並和之而競爲淒切之辭至此方驗焉世宗篤好文學時褒與庾信才名最高特加親待帝每游宴命褒賦詩談論恒在左右建德以後頗參朝議凡大詔冊皆令具草遷小司空終於宜州刺史集二十一卷

庾信字子山南陽新野人信幼而俊邁聰敏絕倫博覽羣書尤善春秋左氏傳身長八尺腰



帶十圍容止頽然有過人者父肩吾爲梁太子中庶子東海徐摛爲左衛率摛子陵及信並爲抄撰學士父子東宮出入禁闈恩禮莫與比隆既有盛才文並綺豔故世號爲徐庾體焉當時後進競相模範每有一文都下莫不傳誦侯景之亂奔江陵元帝以爲御史中丞遣聘西魏屬有江陵之師遂留焉仕周歷驃騎大將軍開府儀同三司拜洛州刺史徵爲司宗中大夫世宗高祖並好文學信特蒙

恩禮至於趙滕諸王周旋款至有若布衣之交羣公碑誌多相請託自餘文人莫有逮者集二十一卷滕王立序隋魏澹注又略集三

卷衡集三卷

信小字蘭成哀江南賦蘭成射策之年是也出陸龜蒙小名錄

隋

煬帝諱廣文皇第二子好學善屬文初封晉王後立爲皇太子旣嗣位慨然慕秦皇漢武之事頻出朔方三駕遼左盛治宮室窮極侈靡幸江都爲宇文化及所弒帝引用庾自直每



有篇章必先令詆訶自直所難帝輒改之或  
至再三俟其稱善然後方出初習藝文有非  
輕側之論暨乎即位一變其體與越公書建  
東都詔冬至受朝詩及擬飲馬長城窟並存  
雅體歸於典制雖意在驕淫而詞無浮蕩故  
當時綴文之士遂得依而取正焉集五十五  
卷

齊王暕字世拙煬帝第二子美容儀疎眉目頗  
涉經史初封豫章王進封齊王死於江都之

變

按史稱暕昵近小人所行多不法未聞  
工屬文也選中召王貞書疑賓客所作

盧思道字子行范陽人齊天保中解褐司空行  
參軍直中書省待詔文林館入周授儀同三  
司隋高祖爲相遷武陽郡守開皇中爲散騎  
侍郎思道聰爽俊辨通侏不羈年十六遇中  
山劉松讀其文多所不解於是感激閉戶讀  
書師事河間邢子才後爲文示松松又不能  
甚解乃歎曰學之益豈徒然哉因就魏收借  
異書數年之間才學兼著自恃才地多所陵



轅是以展轉三朝宦途終於淪滯集三十卷  
楊素字處道弘農華陰人周清河郡公開皇中  
以平陳功進封越國公上柱國尚書右僕射  
專掌朝政大業初拜司徒改封楚公美鬚髯  
有英傑之表少落拓有大志不拘小節後與  
安定牛弘同志好學研精不倦善屬文工草  
隸史稱素夷兇靖亂功臣莫出其右奇策高  
文足爲一時之傑集十卷

薛道衡字玄卿河東汾陰人六歲而孤專精好  
學年十三講左氏傳見子產相鄭之功作國  
僑贊頗有詞致見者奇之其後才名益著爲  
齊中書侍郎齊亡周武引爲御史二命士隋  
受禪除內史舍人後出檢校襄州總管煬帝  
時拜司隸大夫以論時政見害道衡每至構  
文必隱坐空齋蹋壁而臥聞戶外有人便怒  
其沈思如此每稱北海高構有清鑒其文筆  
構有所詆訶未嘗不嗟伏集三十卷一云七  
十卷



許善心字務本高陽北新城人幼聰明有思理  
所聞輒能誦記家有舊書萬餘卷皆徧通涉  
十五解屬文爲牋上父友徐陵大竒之謂人  
曰此神童也陳禎明中加通直散騎常侍聘  
隋會方伐陳留繫賓館及陳平勅以本官直  
門下省遷虞部侍郎上神雀頌賜物二百段  
大業初轉禮部侍郎後從幸江都宇文弒逆  
以不屈遇害

虞世基字茂世會稽餘姚人幼沈靜喜愠不形  
於色博學有高才兼善草隸少傅徐陵見而  
竒之曰當今潘陸也因以弟女妻焉仕陳累  
遷尚書左丞入隋爲通直郎直內史省貧無  
產業每傭書養親怏怏不平爲五言詩以見  
情文理悽切世以爲工未幾拜內史舍人煬  
帝即位顧遇彌隆秘書監柳顧言博學有才  
罕所推謝見世基歎曰海內當共推此一人  
非吾儕所及也遷內史侍郎參掌朝政宇文  
弒逆遇害集五卷



虞綽字士裕會稽餘姚人身長八尺姿儀甚偉  
博學有俊才尤工草隸陳左衛將軍傅縡有  
盛名於世見綽詞賦歎美之仕爲太學博士  
陳亡晉王引爲學士大業初轉秘書學士遷  
著作佐郎常直禁中以文翰待詔恩眇隆洽  
綽恃才任氣無所降下時禮部尚書楊玄感  
稱爲貴踞虛襟禮之與結布衣之友竟坐玄  
感被刑所有詞賦並行於世

潘徽字伯彥吳郡人性聰敏少受禮詩書講莊  
老並通大義尤精三史善屬文能持論陳尚  
書江總引致文儒之士徽一詣摠摠甚敬之  
釋褐新蔡王國侍郎陳亡秦孝王召爲學士  
嘗從王朝京師令徽馬上爲賦行一驛而成  
名曰述思賦王覽而善之晉王復引爲揚州  
博士令與諸儒撰江都集禮及嗣大位詔助  
楊越公撰魏書後坐與楊玄感往來出爲威  
定主簿意甚不平道卒

明餘慶平原鬲人官至司門郎越王侗稱制爲



國子祭酒

朱瑒

北齊書王琳傳載瑒為琳故吏驃騎府倉曹參軍瑒琳後間道北歸又隋書柳顧言

傳晉王好文雅招引才學之士諸葛穎虞世南王胄朱瑒等百餘人以充學士

著作人姓名錄

畢



續文選卷之一

武原胡震亨孝轅撰

賦一

前選分十四類今四類有文紀行鳥獸志音樂增入二類法集草木

法集

玄圃園講賦

蕭景喬

梁代玄圃園誌闕載推檢曲池舊蹟宜在故臺城東宮內 梁書昭明太子傳宮內別立慧義殿專為法集之所招引名儔自立二諦法身義

曰天監之十七屬儲德之方宣惟玉帛之光盛

金一





信昌符之在焉於是上照天下漏泉輪困之氣  
吐煙日月之景揚員乃聖武之龍飛載爲家於  
天下思承規於景數遂長發而明社若重光於  
有周似二英於皇夏方前星而列曜播洪鐘於  
胤雅去茲永福來即東朝文物是紀聲明是昭  
發玄章於粉績靡青綏於翠翹鑿納那而垂藻  
笳和鳴以承簫載錫其光令聞令望察情幄帳  
讓齒虞庠性與天道言爲珪璋詩史遙集禮易  
翱翔義華洛水文麗清漳昔七覺之吐華高人

天而爲長道西被乎日用法東流而未朗故授  
神茹於文昌寄寶船於明兩異昔談而同世亦  
千年而影響聞填填之法雷見慧雲之初爽真  
如之軌旣接發揮之功已躡開金泥剖玉牒削  
蒸栗之簡採羅樹之葉石室靈篇南宮神篋所  
以一音不已而待規重矩疊者矣惟至人之講  
道必山林之間曠彼柰園與杏壇深淨名與素  
王模清遊之浩瀆擬樂賢之隆壯睿情杳然是  
焉供帳乃高談玄圃之苑張樂宣猷之上觀夫



靈圃要妙總禁林之叫窾稟輦道之三星躔離  
宮之六曜寫溟浚沼方華作峭其山則刻苑狎  
豸碣誦詭坂墀截崕夏含霜雪下則谿壑泓  
澄虹躡降升上則青霄丹氣雲霞鬱蒸金華琳  
碧燭銀硯石藻玉摘白丹瑕流赤周以玉樹灌  
叢紫桂香楓篔簹含人桃枝育蟲妙草的皪靈  
果垂蔓長卿寒翠簡子秋紅崖戴雲而吐雨水  
鳴條而起風中有蘭渚華池淥流滌潭激水推  
移彌望杳溟倒飛閣之差峩漾釣臺而浮迴張

翠帷於鴻船泛羽旒於雀艇鳥則杉雞繡質木  
客錦章戴勝吐綬鷓鴣鷗香璧龜紫鱉鷓鷯鴛  
鴦風鳴日思高廣浮長內則錢苻菱華菡萏散  
葩硨磲巨石潰澁碧砂離筵比目累綺紅蝦漂  
青綸之蓑折蕩碧組之髮髻銅龜受水而獨涌  
石鯨吐浪而戴華所以藉園籟之壯觀將髮像  
於毗耶於是清宮廣闢宿設宵張華燈熠燿火  
樹散芒斂閃六尺籠叢九光穎若流金之出沙  
嶼粲若列宿之動天潢朝矚朗而戒旦雲依霏



而卷簇輕輦西園齊宮北園文衛濟濟僧徒肅  
肅法鼓朗而震音衆香秘而流馥亦有百獸  
眈眈眇眇雲車九層芝駕四鹿吳姬楚豔胡笳燕  
筑常從名倡戲馬蹋鞠巡少陽渡紫複繞崇賢  
瞰承祿揚散華之飄颻響清梵於林木燈王歸  
而贈筵香積來而獻熟似衆聖之乘空若能仁  
之在目旣而俄軒有睟肆筵授几高殿肅而神  
嚴微言欣而奏理煥嘉語於丹青得親承於音  
旨智周物而爲心情研幾而盡諦言超超而出  
象理疊疊而踰繫魏兩娛心之談未足云晉儲  
真假之理豈能逮史臣乃載筆撰功請事其職  
賦金相模玉式世旣聞甘露之言民已登仁壽  
之域矣將奉瑤宮之軌陪雲樓之軼福穰穰委  
如山長莫長永無極

紀行

玄覽賦

梁元帝

河上公老子章句曰心居玄冥之處  
覽知萬物謂之玄覽 帝七歲封湘



東王初試會稽太守尋入尹丹陽出  
牧荊州後召為護軍領石頭戍至是  
復塞帷江州遂鋪叙宦跡該乎此篇  
淮史大同庚申十二月帝被江州之  
命篇首司空故是冬月旃蒙定屬乙  
年錯違五歲有清梁典 太清中岳  
陽王府僚蔡大寶使江陵帝示此賦  
令注解三日而畢帝大嗟賞贈遺甚  
厚

歲次旃蒙月建司空變凌陰之呂扇廣莫之風  
蕭子寒帷九水作牧三宮乃盱衡而言曰惟天  
惟大惟堯則之惟地惟厚惟王國之粵我皇之  
握鏡實乃神而乃聖陳六聯於八則弘九職於

三令運璇樞而御宇執玉衡而齊政大矣廣矣  
無德而稱俯齟齬於軒羲諒斗筭於子姒包河  
圖與洛書括龍官乎鳳紀超大德於百王高鴻  
名於萬祀惟天縱於副后踰啓誦而惟首旣論  
儒於肅成復斷獄於長壽豈止丕莊屈膝將令  
班鄭捧筵譬衢樽而待酌若懸鐘之須扣業踰  
繫象之外聲高洙泗之右伊俯已之顛愚謬聯  
萼於天衢筮東門而畫野創南國而分墟詔伯  
宗以爲儉誥內史而策書用分茲於茅社從侯



服而俾予類金虎以封建非桐珪以錫處爾其  
湘水之東即我龜蒙魏甘露而分邑吳太平而  
定中鎮麟山之崔嵬傍龍跡其穹窿金城高而  
相屬石燕起而依風豈連鑣於分陝羨追蹤於  
二公彼琅臺之作守有彭泗之嘉名殊並海之  
分地異魚石之所城經沈子之高墉蓋水運之  
堤封謝禮樂之于櫓閱武騎之輶衝軾錦車而  
前驚驅魚軒而繼蹤無復鸞歌鳳舞惟對綠柳  
青松留吳宮之宿鸞響平陵之夜鐘飛余轡而

西征戍太真之舊營鳴節鼓之金鐻屯戎車於  
石城戮滔天之封豕斬橫海之長鯨每輟書而  
歎息景樹德之風聲從王役於鏡中浮文鷁而  
載鴻經謝亭而帳飲想彥伯之高風度五城而  
騁望見三冀之無窮故以飛雲蒼隼白鱧青桐  
金吾舍利鳴鶴紫宮眺方嶽乎雲間望赤坂之  
珠殷想真長之送別懷思曠之還山此檜楫而  
方遠彼松舟而未閑倦旅泊於新丘同渭水之  
不流或千人而竝唱乍萬人而相鈎毀橋由於



瑗度鑿空資於仲謀睇三茅之靈秘懷九轉之  
仙記紫臺石室之文青首銀函之宇獨有披霧  
之心彌軫凌雲之志捫殷碑之愴望挹延州之  
高讓并虜沸而蜿壇勢崎嶇而低昂見傳巴之  
度曲聞安歌之浩唱想觀樂乎朝陽憶紆衣乎  
夕張迴余舫之美風聳余棹乎雲陽彼桑梓之  
必敬况枌榆之舊鄉將遊目於五湖乃浩覽於  
姑蘇臨閶門之跨水聳重闕而開都睇太伯之  
卜祀爰避國於句吳去西滸之樂政尊東夷之

楷模時渡谷水之陽尚想嘉禾之方壯慶亭於  
吳后雄構李於越王觀泉亭之涌波崖巍巍而  
峩峩張素蓋而縈州嶼馳白馬而越江洩鼓洪  
濤於萬里曾未動於織羅及戾止乎東甌登玉  
筍與銅牛山東武而遙集鴈南海而飛浮巖亭  
亭其似蓋氣茗茗其若樓登舜橋而延首瞰禹  
井而淹留御史之牀猶在督護之門不修雖濫  
同於借寇愧民瘼之何求皇覽揆余之忠誠詔  
入謁於承明旣攝州於淮海且作尹乎中京慕



張生之謫伏挹邊延之勵精珥金貂而待問鳴  
玉佩而趨庭兼三河及三輔總九緯乎九經揚  
王庭之俊選聞袞然於前則時濫假於中台掌  
邦教之觀國乍南宮而薦士且右鄉而表德判  
辟雍之樂語辯金馬之儒墨驅安車以騁望壯  
天居之麗極詳夫皇王爰處本無定所堯都平  
陽舜在冀方玄王居亳成周卜洛故知黃旗紫  
蓋域中爲大天地之所合風雨之所會陰美氣  
之葱葱浮卿雲之靄靄聳梁山而成闕縈長淮

而似帶昔者甘泉暉章平樂未央凌霄飛雨麒麟  
鳳凰九華仁壽百福明光玉階紫闥雕柱錦  
墀木蘭爲棟文杏爲梁溫臺冬煥秋窻夏涼甲  
乙之帳庚辛之房未有祇園之右齊之仁壽用  
擬舟航長爲稱首日殿月宮金池珠叢七重迢  
遞千柱玲瓏虹橋左跨鴈苑南通紫紉之堂臨  
水青蓮之臺帶風及夫曠光未旭更籌曙促猶  
然陽燧之火尚執驪龍之燭或帶桃花之綬乍  
響玄山之玉爰八命而建旗誠非親而勿居應



鳴鞞於龍角覆緹幕於熊車開轅門於淮渚泛  
餘皇之容與吟紫騮之長歌奏玄雲之疊鼓開  
右座而納文設左廣而接武旣風起而雲飛復  
摧斑而拉虎泛樓船而鬱紆憶霸楚之雄圖悲  
騅馬之不逝忘鹿逐之長驅豈烏江之天險資  
赤帝之神符於是途經灌壘水分當利彼吳王  
之連和延魏后之交質趙將軍之建節辛侍中  
之奉使亮鼎足其何言限修江而爲二泊九井  
而問津蓋六服之都曾方函谷之設險譬魯陽

之襟帶觀棄繻之裂帛見高車之輔軼顧濡須  
之故巘每當食而忘飯鬪二虎於江干爭兩龍  
於修坂旣凱捷而來旋遂鳴鑣而獨返彼銅山  
之可傷何驕容之無方已築長洲之苑復實海  
陵之倉遂稱兵而內侮宜朝起而夕亡原西陵  
以肇基始衝梯於士治載爲前茅之首實表勤  
王之師同蕙苾之興謗成貝錦之深疑良弓藏  
而高鳥盡入不謙而出不辭遊雷中而徬徉遇  
日吉而辰良祀公瑾以桂酒薦忠肅以椒漿實



討曹之英策蓋謀桓之秘方衣披披而屢舞神  
欣欣而樂康弔劉安於下雉聊載懷於惇史或  
策杖而龍飛或叱石而羊起將雞鳴於天上遂  
埋冤於蒿里匪仙道之云僞蓋爲仁其由已經  
釣臺而高邁過鄂渚而西浮變青門之三襲爲  
黃塵之一丘城逶迤而中斷階坡陁而半留分  
沙羨而啓鎮即閑蕃於夏州星尚連於翼軫舍  
兼分於斗牛麗滄浪之水清良信美乎濯纓嗟  
其釣而非釣復何慮而何營羌有願而不獲拂

蘭橈而上征冬已謝而春辭聊方舟而水嬉看  
白沙而似雪望却月而成眉臨石渚其如鏡玩  
弱柳其猶絲停赤壁而延佇聊愴望而方思吳  
水鄉之舟楫魏陸產之臯豸本吳長而魏短况  
地利與天時結憤風而炎上燎原火於驚颺灰  
霧霏而擊馬箭參差而麗龜成班車之逸氣碎  
當途於鹿麋分洞庭於吳土限東益於巴丘如  
淄澠之相別似涇渭之分流雖滔滔而直瀉終  
耿耿而橫浮想蘭香之薦枕懷娥皇之夜遊若



夫子瑜設險之記閭遨遊湧之地既下車而踐境早詢求於方志曉泊鬻拳之津夕瞻荒谷之寺居柳下而布德坐棠陰而高視班六條於宰邑賢十部於從事每題輿於仲舉豈虛名乎叔治藉務隙於登臨乃紛吾之本志時復設羽蓋揚旌旆乘雕玉從貝帶浮雲起登高唐泛枉渚望涔陽荆棘生於龍門之下狐兔穴於馬牧之旁臨章華而流盼見舊楚之淒涼試極目乎千里何春心之可傷其渚宮也夾江帶阡布濩井

田通達交道高門接連人腰水心之劔家給火耕之田既追隨而得性寔燕處而超然若平臺之中觀閣相通雄梁渡水壯翼臨空金堤之路銅鞮之宮閣寫陵霄樓布麗譙橫走馬而爲觀擬牽牛而作橋爾乃樹之榛栗椅桐梓漆三色黃茸千戶朱橘桃陰井而成蹊萍浮江而泛實蟬鳴枝而候稻范飛冠而吐蜜復有水底石髮山筋地骨書帶新抽屏風牙發反魂長生靈壽女貞金鹽玉豉堯非舜榮交讓之目代謝之名



忘憂長樂桃杷鼓箏竹則簣管綠箒交戰策皮  
淚沾虞后龍還葛陂便娟防露檀欒夾池聊右  
書而左琴且繼踵於華陰彼門人之問道各蒙  
求而有心先鈇擿於魚魯乃紛定於陶陰識三  
家之云謬知五門之可尋時仰稟於皇猷討巴  
濮於禪儵乃稜威於華墨出車檻之云修觀月  
窟之入附覩日勒之來遊旣虎牙而成號又龍  
額而爲侯仰皇德之洪深欵侏離於韎任見白  
題之蹋鼓看烏孫之學琴獻挂條之良賁奉桃

枝之怪琛啗聚米於馬援晒畫地於臧旻彼蠢  
爾之爲鯁伊憑陵而未靜異黃金於黑山非綠  
林於青嶺余喟然以指蹤實濟寬而待猛負步  
光之文劔驚漢陽之夕景麾靈琚之左轉光玳  
簪而右簪白雲生而陣合紅塵起而軍暗於是  
驅驪驪命蹶張迴翠蓋之金爪臨絳宮之玉堂  
擬都護之戊巳模荆尸之甲裳作齊軍之滅竈  
敦燕師之卧墻觀田峻於虞澤命車右而前驅  
猶從戎於細柳若驅馬於長榆矜猿鳴之抱木



傷兔走之依株每愀然而作色方載馳而轉軾  
闕放麇而興憫對亂鱗而動惻引高宴於城隅  
駐五馬而踟躕乃有青琴碧玉絳樹綠珠西河  
王豹東野綿駒蘭缸夕然合璧斜天照流風之  
迴雪映出水之初蓮非吾心之所悅會未始而  
流連濫叨榮於分陝踰一紀之星躔子旣生而  
冠字嗟留滯以迴遘罷臨邊之瑞節觀楚黎之  
臥轍向秋野之蒼茫對寒江之幽咽散歸雲之  
鬱翳吐長風之颼颼聞羌笛之哀怨聽胡笳之

悽切慘余袂兮淚成行攀余轅兮不忍別奉信  
珪而入朝驅駟馬而乘輶旣總司於戎旅亦兼  
飾於豐貂登贔踞而目極忽平原之已超帶方  
達之九軌接馳道之三條彼重門之擊柝馮霞  
起以建標雜丹樓以藻井間青山於綺寮瞰落  
星之嵒龍覩燿火之迢遶鬱如蓬萊之臨滄海  
憬如崑崙之出絳霄函夏之所覲江漢之所朝  
若夫天不愛道地不愛寶賓連紫達華萃朱草  
麒麟五色飛兔雙翼集我君圃之旁遊我帝梧



之側於斯時也天子郊禘於園丘高玉簡於東漢邁金版於西周奏蒼璧而服大裘樂有雲翹之舞牲非蠶粟之牛設黃琮而禮地望方澤乎神州節會咸池之瑄冕無繁露之旒觀三農乎九穀薦黍稷之種稷命甸師而清塵詔封人而出宿敬青壇而致虞動翠耜而祈穀時季春之上巳臨祓禊乎沼沚杏花發於露寒棘實浮於濛汜爰長久之御節採日精於山趾天策夜而動星鈎陳朝而按軌余是時也陪玉軼飾金羈

驅駟躍翠罷乘倜儻控權音寶劔昭晰綵鞵陸離乍俯馬足時仰月支見靈鳥之占巽觀司南之候離習執鞭而珥筆雖日夕而忘疲奧重明堂地丙巳乎正陽乃八牕而四達開上圓而下方置陰鑿之明水設珪瓚而盈觴諄天官乎豕宰服端委而辯方虔植物之蘊藻鄙將饗之牛羊藉鴻私而置傳復推轂而懷方泝蛟川於匯澤泂鵠塞於潯陽何蠡川之浩浩而匡岫之蒼蒼其匡岫也盤紆嶒嶸嶻嶭嶻嶭峻極於天



千霄秀出岑嶽嶠巖鳥兔蔽虧崕岬岬豁開背原  
面野噴飛流於天末鼓雷霆於巖下聳高館於  
雲中聯藁祠於星社雕薨綺閣吁可畏其欲落  
雲霧杳冥縈萬嶺而俱青照曜山莊岩巖石梁  
鴈門餘帳隆安故床鏡臨江而分影鑪銜花而  
共香若乃羽族徘徊察風應雷鴛鴦感夢乾鵲  
知來露華挾雌而嘯侶御環帶壟而含猜孔接  
影而颺颺鷗交頸而陪鰓爾其彭蠡際天用長  
百川沸渭渝溢湫淡連延大則浩汗滉漾細則

澆灌潺湲遇神颺之沸爽彼祈報之無憊且搏  
搖以九萬乍高颺而三千其中則有澆滯嘉魚  
鷺羽龍鬚戴星含石蒲身雉軀乍浮圓鏡時泛  
明珠報蕩子之長信送仙人之短書耻觀魚而  
爲樂解舒鴈於高繳必冀孔愉之龜當如噲叅  
之鶴愾衝冠而發憤嗟吾人之施薄觀進退於  
我生每篤靖而居貞羞爲金谷之富不矯石閭  
之清每鞠躬而遵節藉王道之旣平貴靜者人  
所便予得之於自然非三百之不足惜五十於



續文選卷一  
豐年笑汗邪之行潦喜甘雨於石田飛新梅於  
倡粉拂輕絮於房綿月芝抽而曉落燈花開而  
夜燃菊從風而金散荷帶水而珠圓已寤歌於  
折柳復行吟而採蓮課七分與六日推兩地與  
參天夕章程而鉤股亦刺注而叅連幼墳藉以  
自娛迄方今而不渝雲氣芝英之簡懸針倒薤  
之書緘乎蒸栗之帙飾乎酸棗之珠擬河獻之  
留真希淳于之席珍臨秋水之至樂登春臺而  
自欣鑿戶牖而長望混木鴈而兼陳嗟今來而  
古往聊絕筆於獲麟

南征賦

張伯緒

南史張纘傳纘爲湘州刺史述職經全作南征賦

歲次姬訾月惟中呂余謁帝於承明將述職於  
南楚忽中川而反顧懷舊鄉而延佇路漫漫以  
無端情容容而莫與乃弭節歎曰人之寓於宇  
宙也何異夫栖蝸之爭戰附蜻之遊禽而盈虛  
倚伏俯仰浮沉矜榮華於尺景總萬慮於寸陰



彼忘機於粹日。乃聖達之明箴。妙品物於貞觀。曾何足而繫心。撫余躬之末迹。屬興王之盛世。蒙三樂之休寵。荷通家之渥惠。登石渠之三閣。典校文乎六藝。振長纓於承華。眷儲皇之上。獻居銜觴而接席。出方舟以同濟。彼華坊與禁苑。常宵盤而晝憇。思德音其在耳。若清塵之未逝。經二紀以及茲。悲明離之永翳。惟平生之福能。實有志於棲息。慙滅沒之千里。謝韓哀於八極。如蓑裘之代用。譬輪輶之曲直。愧周任之清規。

諒無取於陳力。逢濯纓之嘉運。遇井汲之明時。懷君恩而未答。顧靈瑣而依遲。總端揆以居副。長庶僚而稱師。猶深泉之短綆。若高墉而無基。伊吾人之菲薄。豈斯滿之能持。奉皇命以奏舉。方驅傳於衡疑。遵夕宿以言邁。戒晨裝而永辭。行搖搖於南逝。心眷眷而西悲。爾乃橫濟牽牛。傍瞻雉庫前。觀隱脉却視雲布。追晉氏之啓戎。覆中州之鼎祚。鞠三川於茂草。霑兩京於朝露。故黃旗紫蓋。運在震方。金陵之兆。允符厥祥。及



歸命之銜璧爰獻璽於武王。啓中興之英主。宣  
十世而重光。觀其內招人望。外攘千紀。草創江  
南。締構基址。豈徒能布其德。主晉有祀。雲漢作  
詩。斯于見美而已哉。乃得正朔相承於茲。四代  
多歷年所。二百餘載。割疆場於華戎。拯生靈於  
宇內。不被髮而左衽。繫明德其是賚。次臨滄之  
層巘。尋叔寶之舊堦。蘊珠玉之餘潤。昭羅綺之  
遺妍。懷若人之遠理。豈喜愠其能遷。雖魂埋於  
百世。猶映徹於九泉。經法王之梵宇。覩因時之

或躍從四海之宅心。故取亂而誅虐。在蒼精之  
將季。翦洪柯以銷落。旣觀竭而逞刑。又施獸而  
爲謔。候高塗以巧笑。俟長星而懽噓。何慄慄之  
黔首。思假命其無託。信人欲而天從。爰物覩而  
聖作。皇帝膺錄。受圖聰明。神武乘輿。而運席卷  
三楚。師克在和。仁義必取。形猶積決。應若飈舉。  
於是殪桑林之封豨。繳青丘之大風。戢干戈以  
耀德。肆時夏而成功。放流聲於鄭衛。屏豔質於  
傾宮。配軒皇以邁迹。豈商周之比隆。化致升平。



於茲四紀六夷膜拜八蠻同軌教穆於上庠  
寃申於大理顯三光之照燭降五靈之休祉  
諒殊功於百王固無得而稱矣沂金牛之迅渚  
覩靈山之雄壯實江南之丘墟平雲霄而竦狀  
標素嶺乎青壁葺頽文於翠嶂跳巨石以驚湍  
批衝巖而駭浪鏗千尋之峭岸滾萬流之大壑  
隱日月以蔽虧搏風煙而回薄崖映川而晃朗  
水騰光而倏爍積霜霰之往還鼓波濤之前却  
下流沫以洊險上岑崟而將落聞知命之是虞  
故違

風而靡託訊會骸之詭狀云怒特之來奔及漁  
人之垂餌沈潛鎖於洪源鑿幽塗於忠武馳四  
馬之高軒不語神以徵怪情存之而勿論曬姑  
熟之舊朔訪遺迹兮宣武挾仲謀之雄氣朝委  
裘而作輔歷祖宗之明君猶負芒於盛主勢傾  
河以覆岱威回天而震宇雖明允之篤誠在伊  
稷而未舉矧有功而無志豈季葉其能處懼貽  
笑於文景憂象賢之覆餗雖苞蘖以代興終夷  
宗而殄族彼儋石之羸儲尚邀之而俟福况神



明之大寶乃闇于於天祿造扁鍵之候司發傳  
書於關尉據輟轅乎伊洛守衡津於河渭無矯  
旦以招賓闕捐縑而待貴實祇敬於王典懷鞠  
躬而屏氣惟函谷之襟帶疑武庫之精兵採風  
謠於往昔聞乳虎於甯成在當今而簡易止譏  
鑿其姦情陋文仲之廢職鄙彤門之食征於是  
近睇赭岑遙瞻鵲岸島嶼蒼茫風雲蕭散屬時  
雨之新晴觀百川之浩泝水泓澄以闇夕山參  
差而辨旦忽臨睨於故鄉眇江天其無畔遡洄

流而右阻遵長薄而左貫獨向風以舒情塞芳  
洲其誰翫息銅山而繫纜訪叔文之靈宇得舊  
名而猶存皆攢蕪而積楚想夫君之令問實有  
聲於前古拯巴漢之廢業爰配名於鄒魯辨山  
精以息訟對祠星而寤主每撫事以懷人非末  
學其能覩嘉梅根之孝女尚乘肥於媵姬嗟吳  
人之重辟憂峻網於將貽彼沈瓜而顯義指滄  
波而爲期此浮履以明節赴丹爛其何疑信理  
感而情悼實悽悵於余悲空沈吟以遐想愧耶



鄆之妙詞望南陵以寓目美牙門之守志當晉  
師之席卷豈藩籬而不庇携老弱於窮城猶區  
區乎一簣雖挈瓶之小善實君子之所識

舊唐書

是謂事人之禮入雷池之長浦想恭  
岱之芳塵臨魚官以輟膳踐寒蒲之抽筠又有  
生爲令德沒爲明神或捐家事主携手拜親或  
正身殉義哀感市人所以家稱純孝國號能臣  
揚清徽於上列並異世而爲鄰發曉渚而遡風  
苦神吳之難習岸擢舟而不進水騰沙以驚急

天曠曠其垂陰雨霏霏而來集愍征夫之勞瘁  
每舉帷而佇立由江沱之派別望彭匯之通津  
塗未中乎及絳日已盈於浹旬於是千流共歸  
萬嶺分狀倒景懸高浮天瀉壯清江洗滌平湖  
夷暢鬪光轉彩出沒搖漾岷山嶓冢悠遠寂寥  
青湓赤岸控汐引潮望歸雲之蒼蒼揚清風之  
飄飄界飛流於翠薄耿長虹於青霄若夫灌莽  
川涯層潭水府游泳之所往還喧鳴之所攢聚  
羣飛沙漲掩薄草渚竒甲異鱗雕文絳羽聽寡



鶴之偏鳴聞孤鴻之慕侶在客行而多思獨傷  
魂而悽楚美中流之衝要因習坎以守固旣因  
之而設險又居之而務德南通珠崖夜郎西欵  
玉津華墨莫不內清姦宄外弭苛慝籬屏京師  
事有均於齊德也眇匡嶺以躊躇想霞裳於雲  
仞流嫦娥之逸響發王子之清韻若夜光而可  
投豈榮華之難擯羨還丹其何術佇一九於來  
信徑遵途乎鄂渚迹孫氏之霸基陳利兵而蓄  
粟抗十倍之銳師在賢才之必用寧推誠而恐

欺圖富強以法立屢貞臣而日嬉識徐基於江  
畔云釣臺之舊址方戰國之多虞猶從容而宴  
喜欽輔吳之忠諒歎仲謀之虛已處君臣而並  
得良致霸其有以伊文侯之雅望誠一代之偉  
人禰觀書以心服玉比德而譽均邁時雄之應  
運方協義以經綸名旣逼而愈賞言雖聞而彌  
親惜勤王於延獻俾漢京之惟新何天命其弗  
與悲盛業之未申汎蘆洲以延佇聞伍員之所  
濟出懷珠而免讎歸投金以答惠彼無求於萬



鍾惟長歌而鼓柅慨斯誠之未感乃沈軀以明  
誓空負恨其何追徒臨食而先祭及旋師於鄭  
國美邀福於來裔入郢都而抵掌壯天險之難  
窺允分荆之勝略成百代之良規賈生方於指  
大應侯譬之木披所以居宗振末強本弱枝聞  
古今之通制歷盛衰而不移可不謂然與美經  
國之遠體也酌忠言於城郢播終古之芳猷忘  
我躬之匪閱顧社稷而懷憂服莊王之高義乃  
徵名於夏州耻蹊田之過罰納申叔之嘉謀觀

巫臣之獻箴鑒厲書以明咎何自謀其多僻要  
桑中而遠赴若葆申之誅丹實匡君以成務在  
兩臣而優劣居二主其並裕臨赤崖而慷慨摧  
雄圖於魏武乘戰勝以長驅志吞吳而并楚終  
八州之毅卒期姑蘇而振旅時有便乎建瓴事  
無留於蕭斧霸孫赫其霆奮杖邁俗之英輔裂  
宇宙而三分誠決機乎一舉嗟玄德之矯矯思  
興復於舊京招臥龍於當世配管仲而稱英收  
散亡之餘弱結與國而連橫延五紀乎岷漢紹



四百於炎精望巴丘以邇回遵洞庭而敞悅沈  
輕舟而不繫何靈胥之浩蕩眺君福之雙峰徒  
臨風以增想償瑤觴而一酌駕彩蜺而獨往爾  
乃南奠衡霍北距沮漳包括沅澧汲引瀟湘漈  
漈長邁漫漫回翔蕩雲沃日吐霞含光青碧潭  
嶼萬頃澄澈綺蘭從風素沙被雪雜雲霞以舒  
卷間河洲而斷絕回曉仄於中川起長飈而半  
滅稅遺構之舊浦瞻汨羅以隕泗豈懷寶而迷  
邦猶殷勤而一致蘊芳華以襲積非黨人之所

媚合小雅之怨辭兼國風之美志譬彈冠而振  
衣猶自別於泥滓且殺身以成義寧露才而揚  
已悲先生之不辰逢椒蘭之妬美有驂騮而不  
馭焉遑遑於千里旣踐境以思人彌流連其無  
已修行潦之薄薦敢憑誠於沼沚謁黃陵而展  
敬奠瑤席乎川湄具蘭香以膏沐懷椒糝而要  
之延帝子於三后降夔龍於九疑騰河靈之水  
駕下太一之靈旗撫安歌以會儻踈緩節而依  
遲日徘徊以將暮情眇默而無辭愠秦皇之川



幸尤土壤以加戮昧天道之無親勤望祀以祈  
福將人怨而神怒故飛川而蕩谷推冥理以歸  
讐遂刊山而赭木於是下車入部班條理務砥  
課庸薄夕惕兢懼存問長老隱恤氓庶奉宣皇  
恩寬徭省賦遠哉盛乎斯邦之舊也有虞巡方  
以託終夏后開圖而疏決太伯讓嗣以來遊漢  
臣祈仙而齊潔固是明王之塵軌聖賢之蹤轍  
也若夫屈平懷沙之賦賈子遊湘之篇史遷摛  
文以投弔揚雄反騷而沈川其風謠雅什又是

詞人之所流連也亦有仲宣感德仍世相繼父  
子三台緇衣改敝古初抱於烈火劉先高而忤  
世蔣公琰之弘通桓伯緒之匡濟鄧克時之紀  
述谷思恭之藻麗實川嶽之精靈常間出而無  
替也至於殊庭之客帝鄉之賢神奔鬼化吐吸  
雲煙玉笥登之而却老金人植杖以尊泉蘇生  
騎龍而出入處靜駕鹿以周旋配北燭之神女  
偶南榮之偃佺時髣髴其遙見亦徃徃而有焉  
爾乃歷省府庭周行街術山川遠覽邑居近悉



割黔中以置守獻青陽而背質鄒生所謂還舟  
楚王於焉乘驛巡高山之累仍褒吳文之爲宰  
彼非劉而八王皆國士而身醢在長沙而著令  
經五葉其未改知天道之福謙勝一時之經始  
尋太傅之故宅今築室以安禪邑無改於舊井  
尚開流而冽泉懷伊管之政術遇庸臣而見遷  
終被知於時主嗟漢宗之得賢受齊居之遠託  
豈理謝而生全哀懷王之不秀遂抱恨而傷年  
修定祀於北郭對林野而幽藹庶無吐於馨香

祀瓊茅而沃醑景十三以啓國惟君王其能大  
迨炎正之中微實斯藩而是賴顧四阜之紆餘  
乍升高以遊目審山川之面帶將取名於衡麓  
下彌漫以爽塏上嶽虧而重複風瑟瑟以鳴松  
水琤琤而響谷低四照於若華竦千尋於建木  
冀躑塵之可屏登巖阿而寤宿捨域中之常戀  
慕遊仙之靈族是時涼風暮節萬實西成華池  
迥遠飛閣淒明嘉南洲之炎德愛蘭蕙之秋榮  
下名其於曲榭採芳菊於高城樹羅軒而並列



續文選卷一  
竹被嶺而叢生翫棲禽之夕返送旅鴈之晨征  
悲去鄉而遠客寄覽物而娛情惟傳車之所驚  
實薦揚其是掌或解組以立威乍露服而加賞  
遵聖主之恩刑荷天地之厚德沾河潤於九里  
澤自家而刑國闕小道之可觀寧畏塗其易克  
眇高衢而願騁憂取累於長纆聞困石之非據  
承炯戒乎明則愧壽陵之餘子學邯鄲而匍匐  
也

續文選卷之一



續文選卷之二

武原胡震亨孝轅撰

賦二

草木

梅花賦

梁簡文帝

層城之宮靈苑之中奇木萬品庶草千叢光分  
影雜條繁幹通寒圭變節冬灰徙筍竝皆枯悴  
色落摧風年歸氣新搖芸動塵梅花特早偏能





識春或承陽而發蒼乍雜雪而披銀吐裏四照  
之林舒榮五衢之路旣玉綴而珠離且冰懸而  
電布葉嫩出而未成枝抽心而挿故標半落而  
飛空香隨風而遠度挂靡靡之遊絲雜霏霏之  
晨霧爭樓上之落粉奪機中之織素乍開華而  
傍巘或含影而臨池向玉階而結采拂網戶而  
低枝於是重閨佳麗貌婉心嫺憐早花之驚節  
訝春光之遣寒袂衣始薄羅袖初單折此芳花  
舉茲輕袖或挿鬢而問人或殘枝而相授恨鬟  
前之大空嫌金鈿之轉舊顧影丹墀弄此嬌姿  
洞開春牖四卷羅帷春風吹梅畏落盡賤妾爲  
此歛蛾眉花色時相比恒愁恐失時

枯樹賦

庾子山

張鷟朝野僉載曰信初至北方文士  
多輕之信將枯樹賦示之於後無敢  
言者

殷仲文風流儒雅海內知名世異時移出爲東  
陽太守常忽忽不樂顧庭槐而歎曰此樹婆娑



生意盡矣至如白鹿貞松青牛文梓根柢盤魄  
山崖表裏桂何事而銷亡桐何爲而半死昔之  
三河徙植九畹移根開花建始之殿落實睢陽  
之園聲含嶰谷曲抱雲門將雛集鳳比翼巢鴛  
臨風亭而唳鶴對月峽而吟猿乃有拳曲擁腫  
盤坳反覆熊彪顧盼魚龍起伏節豎山連文橫  
水蹙匠石驚視公輸眩目雕鐫始就剗削仍加  
平鱗鏟甲落角摧牙重重碎錦片片真花紛披  
草樹散亂煙霞若夫松子古度平仲君遷森梢

百頃槎枿千年秦則大夫受職漢則將軍坐焉  
莫不苔埋菌壓鳥剝蟲穿低垂於霜露撼頓於  
風煙東海有白木之廟西河有枯桑之社北陸  
以楊葉爲關南陵以梅根作冶小山則藁桂留  
人扶風則長松繫馬豈獨城臨細柳之上塞落  
桃林之下若乃山河阻絕飄零離別拔本垂淚  
傷根流血火入空心膏流斷節橫洞口而歌臥  
頓山腰而半折文表者合體俱碎理正者中心  
直裂戴癭銜瘤藏穿抱穴木魅暘睽山精妖孽



况復風雲不感羈旅無歸未能採葛還成食薇  
沈淪窮巷蕪沒荆扉旣傷搖落彌嗟變衰淮南  
云木葉落長年悲斯之謂矣乃爲歌曰建章三  
月火黃河千里槎若非金谷滿園樹卽是河陽  
一縣花桓大司馬聞而歎曰昔年移柳依依漢  
南今看搖落悽愴江潭樹猶如此人何以堪

鳥獸

舞馬賦

并序

張士簡

梁書張率傳天監四年袂飲華光殿其日河南國獻舞馬率與到洽周興嗣同奉詔爲賦高祖以率與興嗣爲工

臣聞天用莫如龍地用莫如馬故禮稱驪駟詩  
誦駟駱先景遺風之美世所得聞吐圖騰光之  
異有時而出洎我大梁光有區夏廣運自中圓  
照無外日入之所浮深委贄風被之域越險効  
珍軫服鳥號之駿駒駮豢龍之名而河南又獻  
赤龍駒有竒貌絕足能拜善舞天子異之使臣  
作賦曰



維梁受命四載元符旣臻協律之事具舉膠庠  
之教必陳檀輿之用已偃玉輅之御方巡考帝  
文而率通披皇圖以大觀慶惟道而必先靈匪  
聖其誰贊見河龍之瑞唐矚天馬之禎漢旣叶  
符而比德且同條而共貫詢國美於斯今邁皇  
王於曩昔散大明以燭幽揚義聲而遠斥固施  
之於不窮諒無所乎朝夕並承流以請吏咸向  
風而率職納竒貢於絕區致龍媒於殊域伊況  
古而赤文爰在茲而朱翼旣効德於炎運亦表  
祥於尚色資皎月而載生祖河房而挺授種北  
唐之絕類嗣西宛之鴻胥稟妙足而逸倫有殊  
姿而特茂善環旋於齊夏知蹈躡於金奏超六  
種於周閑踰八品於漢廐伊自然之有質寧改  
觀於肥瘦豈徒服阜而養安與進駕以馳驟爾  
其挾尺縣鑿之辨附蟬伏兔之別十形五觀之  
姿三毛八肉之勢臣何得而稱焉固已詳於前  
製徒觀其神爽視其豪異軼跨野而忽踰輪齊  
秀騏而並未駟貶代盤而陋小華越定單而少



天驥信無等於漏面孰有取於決鼻可以迹章  
亥之所未遊踰禹益之所未至將不得而屈指  
亦何暇以理轡若跡遍而忘反非我皇之所事  
方潤色於前古邈深文而儲思旣而機事多暇  
青春未移時惟上巳美景在斯遵鎬飲之故實  
陳洛讌之舊儀漕伊川而分派引激水以回池  
集國良於民雋列樹茂於皇枝紛高冠以連袵  
鏘鳴玉而肩隨清輦道於上林肅華臺之金座  
望發色於綠苞佇流芬於紫裏聽磬罇之畢舉

聆韶夏之咸播承六奏之旣闕及九變之已成  
均儀禽於唐序同舞獸於虞廷懷夏后之九代  
想陳王之紫駢乃命涓人効良駿經周衛入鉤  
陳言右牽之已來寧執朴而後進旣傾首於律  
同又蹠足於鼓振擢龍首回鹿軀睨兩鏡感雙  
鳧旣就場而雅拜時赴曲而徐趨敏躁中於促  
節捷繁外於驚桴騏行驥動虎發龍驤雀躍鷺  
集鵠引鳧翔妍七盤之綽約陵九劔之抑揚豈  
借儀於綸袂寧假器於髦皇婉脊投頌俛膺合



雅露沫歎紅沾汗流赭乃却走於集靈馴惠養  
於豐夏鬱風雷之壯心思展足於南野若彼符  
瑞之富可以臻介丘而昭卒業縉紳羣后誠希  
末光天子深穆爲度未之訪也何則進讓殊事  
豈非帝者之彌文哉今四衛外封五岳內郡宜  
弘下禪之規增上封之訓背清都而日行指云  
郊而玄運將絕塵而弭轍類飛鳥與駟驢總三  
才而驅騫按五御而超攄翳卿雲於華蓋翼條  
風於屬車無逸御於玉軫不泛駕於金輿飾中

岳之絕軌營奉高之舊墟訓厚況於人神弘施  
育於黎獻垂景炎於長世集繁祉於斯萬在庸  
臣之方剛有從軍之大願必自茲而展采將同  
畀於庖輝悼長卿之遺書憫周南之留恨

志

哀江南賦

并序

庾子山

宋玉招魂曰魂兮歸來哀江南周  
書庾信傳信留周雖位望通顯常有  
鄉關之思乃作哀江  
南賦以致其意云



粵以戊辰之年建亥之月大盜移國金陵瓦解  
余乃竄身荒谷公私塗炭華陽奔命有去無歸  
中興道銷窮於甲戌三日哭於都亭三年囚於  
別館天道周星物極不反傳燹之但悲身世無  
處求生袁安之每念王室自然流涕昔桓君山  
之志士杜元凱之生平並有著書咸能自序潘  
岳之文彩始述家風陸機之詞賦先陳世德信  
年始二毛即逢喪亂貌是流離至於暮齒燕歌  
遠別悲不自勝楚老相逢泣將何及畏南山之

雨忽踐秦庭讓東海之濱遂飡周粟下亭漂泊  
高橋羈旅楚歌非取樂之方魯酒無忘憂之用  
追爲此賦聊以記言不無危苦之詞唯以悲哀  
爲主日暮途遠人間何世將軍一去大樹飄零  
壯士不還寒風蕭瑟荆璧睨柱受連城而見欺  
載書橫階捧珠盤而不定鍾儀君子入就南冠  
之囚季孫行人留守西河之館申包胥之頓地  
碎之以首蔡威公之淚盡加以血釣臺移柳  
非玉關之可望華亭唳鶴非河橋之可聞孫策



以天下爲三分衆纔一旅項籍用江東之子弟  
人唯八千遂乃分裂山河宰割天下豈有百萬  
義師一朝卷甲芟夷斬伐如草木焉江淮無涯  
岸之阻亭壁無藩籬之固頭會箕歛者合從締  
交鋤耨棘矜者因利乘便將非江表王氣終於  
三百年乎是知併吞六合不免軹道之災混一  
車書無救平陽之禍嗚呼山嶽崩頽旣履危亡  
之運春秋迭代必有去故之悲天意人事可以  
悽愴傷心者矣况復舟楫路窮星漢非乘槎可

上風飈道阻蓬萊無可到之期窮者欲達其言  
勞者須歌其事陸士衡聞而撫掌是所甘心張  
平子見而陋之固其宜矣

我之掌庾承周以世功而爲族經邦佐漢用論  
道而當官稟嵩華之玉石潤河洛之波瀾居負  
洛而重世邑臨河而晏安逮永嘉之艱虞始中  
原之乏主民枕倚於墻壁路交橫於豺虎值五  
馬之南奔逢三星之東聚彼凌江而建國始播  
遷於吾祖分南陽而賜田裂東嶽而胙土誅茅



宋玉之宅穿徑臨江之府水木交運山川崩竭  
家有直道人多全節訓子見於純深事君彰於  
義烈新野有生祠之廟河南有胡書之碣况乃  
少微真人天山逸民階庭空谷門巷蒲輪移談  
講樹就簡書筠降生世德載誕貞臣文詞高於  
甲觀模楷盛於漳濱嗟有道而無鳳歎非時而  
有麟旣姦回之異匿終不悅於仁人王子洛濱  
之歲蘭成射策之年始含香於建禮仍矯翼於  
崇賢遊游雷之講肆齒明離之胄筵旣傾彘而

酌海遂側管以窺天方塘水白釣渚池圓侍戎  
輜於武帳聽雅曲於文絃乃解懸而通籍遂崇  
文而會武居筮轂而掌兵出蘭池而典午論兵  
於江漢之君拭玉於西河之主於時朝野歡娛  
池臺鐘鼓里爲冠蓋門成鄒魯連茂苑於海陵  
跨橫塘於江浦東門則鞭石成橋南極則鑄銅  
爲柱橘則園植萬株竹則家封千戶西賈浮玉  
南琛沒羽吳歛越吟荆豔楚舞草木之藉陽春  
魚龍之逢風雨五十年中江表無事王歛爲和



親之侯班超爲定遠之使馬武無預於甲兵馮  
唐不論於將帥豈知山嶽闇然江湖潛沸漁陽  
有間左戍卒離石有將兵都尉天子方刪詩書  
定禮樂設重雲之講開士林之學談劫燼之灰  
飛辨常星之夜落地平魚齒城危獸角臥刀斗  
於滎陽絆龍媒於平樂宰衡以干戈爲兒戲縉  
紳以清談爲廟略乘漬水以膠船馭奔駒以朽  
索小人則將及水火君子則方成猿鶴弊算不  
能救鹽池之鹹阿膠不能止黃河之濁旣而魴

魚頰尾四郊多壘殿狎江鷗宮鳴野雉湛盧去  
國餘艤失水見被髮於伊川知百年爲戎矣彼  
姦逆之熾盛久遊魂而放命大則有鯨有鯢小  
則爲梟爲獍負其牛羊之力凶其水草之性非  
玉燭之能調豈璿璣之可正值天下之無爲尚  
有欲於羈縻飲其琉璃之酒賞其虎豹之皮見  
胡桐於大夏識鳥卵於條支豺牙密厲虺毒潛  
吹輕九鼎而欲問聞三川而遂窺始則王子召  
戎姦臣介冑旣官政而離邊遂師言而泄漏望



廷尉之逋囚反淮南之窮寇飛狄泉之蒼鳥起  
橫江之困獸地則石鼓鳴山天則金精動宿北  
闕龍吟東陵麟鬪爾乃桀黠構扇憑陵畿甸擁  
狼望於黃圖填廬山於赤縣青袍如草白馬如  
練天子履端廢朝單于長圍高宴兩觀當戟千  
門受箭白虹貫日蒼鷹擊殿竟遭夏臺之禍遂  
視堯城之變官守無奔問之人干戚非平戎之  
戰陶侃空爭米船顧榮虛搖羽扇將軍死綏路  
絕長圍烽隨星落書逐鳶飛遂乃韓分趙裂鼓

卧旗折失羣班馬迷輪亂轍猛士嬰城謀臣卷  
舌昆陽之戰象走林常山之陣虵奔穴五郡則  
兄弟相悲三州則父子離別護軍慷慨忠能死  
節三世爲將終於此滅濟陽忠壯身參末將兄  
弟三人義聲俱唱主辱臣死名存身喪敵人歸  
元三軍悽愴尚書多算守備是長雲梯可拒地  
道能防有齊將之閉壁無燕師之臥墻大事去  
矣人之云亡申子奮發勇氣咆勃實總元戎身  
先士卒胄落魚門兵填馬窟屢犯通中頻遭刮



骨功業天枉身名埋沒或以隼翼鷄披虎威狐  
假沾漬鋒鏑脂膏原野兵弱虜強城孤氣寡聞  
鶴唳而虛驚聽胡笳而淚下據神亭而亡戟臨  
橫江而棄馬崩於鉅鹿之沙碎於長平之瓦於  
是桂林顛覆長洲麋鹿潰潰沸騰茫茫塏黷天  
地離阻人神慘酷晉鄭靡依魯衛不睦競動天  
關爭迴地軸探雀斂而未飽待熊蹯而詎孰乃  
有車側郭門筋懸廟屋鬼同曹社之謀人有秦  
庭之哭爾乃假刻璽於關塞稱使者之酬對逢

鄂坂之譏嫌值彤門之征稅乘白馬而不前策  
青驪而轉礙吹落葉之扁舟飄長風於上游彼  
鋸牙而鈎爪又巡江而習流排青龍之戰艦鬪  
飛鷺之船樓張遼臨於赤壁王濬下於巴丘乍  
風驚而射火或箭重而沉舟未辨聲於黃蓋以  
先沉於杜侯落帆黃鶴之浦藏船鸚鵡之洲路  
已分於湘漢星猶看於斗牛若乃陰陵失路鈞  
臺斜趣望赤岸而沾衣艤烏江而不渡雷池柵  
浦鵠陵焚戍旅舍無煙巢禽無樹謂荆衡之杞



梓庶江漢之可恃淮海維揚三千餘里過漂渚  
而寄食託蘆中而渡水屆於七澤濱於十死嗟  
天保之未定見殷憂之方始本不達於危行又  
無情於祿仕謬掌衛於中軍濫尸承於御史信  
生世等於龍門辭親同於河洛奉立身之遺訓  
受成書之顧託昔三世而無慙今七葉而方落  
泣風雨於梁山惟枯魚之銜索入歌斜之小徑  
掩蓬藿之荒扉就汀洲之杜若待蘆葦之單衣  
於時西楚霸王劍及繁陽麾兵金匱校戰玉堂

蒼鷹赤雀鐵舳牙檣沉白馬而誓衆負黃龍而  
渡江海潮迎艦江萍送王戎車屯於石城戈船  
掩于淮泗諸侯則鄭伯前驅盟主則荀罃暮至  
剖巢燻穴奔魑走魅埋長狄於駒門斬蚩尤於  
中冀然腹爲燈飲頭爲器直虹貫壘長星屬地  
昔之虎據龍盤加以黃旗紫氣莫不隨狐兔而  
窟穴與風塵而殄悴西瞻博望北臨玄圃月榭  
風臺池平樹古倚弓於玉女窻扉繫馬於鳳皇  
樓柱仁壽之鏡徒懸茂陵之書空聚若夫立德



立言謨明寅亮聲超於繫表道高於河上旣不  
遇於浮丘遂無言於師曠以愛子而托人知西  
陵而誰望非無北闕之兵猶有靈臺之仗司徒  
之表裏經綸狐偃之惟王實勤橫琯戈而對霸  
主執金鼓而問賊臣平吳之功壯於杜元凱王  
室是賴深於温太真始則地名全節終則山稱  
枉人南陽校書去之已遠上蔡逐獵知之何晚  
鎮北之負譽矜前風颯凜然水神遭箭山靈見  
鞭是以螫熊傷馬浮蛟沒船才子併命俱非百

年中宗之夷凶靖亂大雪寃耻去代邸而承基  
遷唐郊而纂祀反舊章於司隸歸餘風於正始  
沉猜則方逞其欲藏疾則自矜於已天下之事  
沒焉諸侯之心搖矣旣而齊交北絕秦患西起  
况背關而懷楚異端委而開吳驅綠林之散卒  
拒驪山之叛徒營軍梁溘蒐乘巴渝問諸淫昏  
之鬼求諸厭劾之巫荆門遭廩延之戮夏口濫  
達泉之誅茂因親以教愛忍和樂於彎弧慨無  
謀於肉食非所望於論都未深思於五難先自



擅於二端登陽城而避險臥砥柱而求安旣言  
多於忌刻實志勇而刑殘但坐觀於時變本無  
情於急難地惟黑子城猶彈丸其怨則黷其盟  
則寒豈寃禽之能塞海非愚叟之可移山况以  
沴氣朝浮妖精夜殞赤烏則三朝夾日蒼雲則  
七重圍軫亡吳之歲旣窮入郢之年斯盡周含  
鄭怒楚結秦寃有南風之不競值西隣之責言  
俄而梯衝亂舞冀馬雲屯棧秦車於暢轂沓漢  
鼓於雷門下陳倉而連弩渡臨晉而橫船雖復

楚有七澤人稱三戶箭不麗於六麋雷無驚於  
九虎辭洞庭兮落木去涔陽兮極浦熾火兮焚  
旗貞風兮害蠱乃使玉軸揚灰龍文折柱下江  
餘城長林故營徒思箝馬之秣未見燒牛之兵  
章曼支以轂走宮之竒以族行河無冰而馬渡  
關未曉而雞鳴忠臣解骨君子吞聲章華望祭  
之所雲夢僞遊之地荒谷縊於莫敖冶父囚於  
羣帥劓穿摺拉鷹鷗批攢寃霜夏零憤泉秋沸  
城崩杞婦之哭竹染湘妃之淚水毒秦涇山高



續文選卷二  
趙陘十里五里長亭短亭饑隨蟄鷺暗逐流螢  
秦中水黑關上泥青於時瓦解冰泮風飛雹散  
渾然千里淄澠一亂雪暗如沙冰橫似岸逢赴  
洛之陸機見離家之王粲莫不聞隴水而掩泣  
向關山而長歎况復君在交河妾在清波石望  
夫而逾遠山望子而逾多才人之憶代郡公主  
之去清河栩陽亭有離別之賦臨江王有愁思  
之歌別有飄飄武威羈旅金微班超生而望返  
溫序死而思歸李陵之雙鳧永去蘇武之一鴈

空飛若江陵之中否乃金陵之禍始雖借人之  
外力實蕭牆之內起撥亂之主忽焉中興之宗  
不祀伯兮叔兮同見戮於猶子荆山鵲飛而玉  
碎隨岸蛇生而珠死鬼火亂於平林殤魂遊於  
新市梁故豐徙楚實秦亡不有所廢其何以昌  
有媯之後將育於姜輸我神器居爲讓王天地  
之大德曰生聖人之大寶曰位用無賴之子弟  
舉江東而全棄惜天下之一家遭東南之反氣  
以鶉首而賜秦天何爲而此醉且夫天道迴旋



生民預焉余烈祖於西晉始流播於東川洎余  
身而七葉又遭時而北遷提挈老幼關河累年  
死生契闊不可問天况復零落將盡靈光巋然  
日窮于紀歲將復始逼切危慮端憂暮齒踐長  
樂之神臯望宣平之貴里渭水貫於天門驪山  
迴於地市幕府大將軍之愛客丞相平津侯之  
待士見鐘鼎於金張聞絃歌於許史豈知灞陵  
夜獵猶是故時將軍咸陽布衣非獨思歸王子

音樂

金錚賦

并序

梁簡文帝

國語曰戰以錚于儆其民也樂書曰錚于以銅爲之其形象鐘頂大腹擦口弁上以伏獸爲鼻內懸子鈴銅舌又齊始興王傳曰錚于高三尺六寸六分圍三尺四寸圓如箭上有銅馬以繩懸馬令去地尺餘灌之以水又以器盛水於下以芒莖當心跪注錚于以手振芒則聲如雷清響良久乃絕序稱舍弟西中郎所致帝弟湘東廬陵邵陵三王並經爲西中郎將未定爲何

舍弟西中郎致金錚一枚周禮云鼓人掌六鼓



四金以節聲樂以和軍旅以金錚和鼓金鐻節鼓注曰錚錚于也圓如碓頭大上小下樂作鳴之與鼓相和淮南云兩軍相當鼓錚相望若古之禮器飾軍和樂者矣吾竒而賦之其辭曰有錚于之麗器實軍樂之兼珍伊前古以爲美成名都之匠人採赤塗於蜀壘求銅精於灌濱若夫鼓以陽鑪營之陰炭是鑄是刻載輝載煥笑烏獲之奮槌踰嵇生之善鍛實規形之可悅以妙聲之遠聞譬洪鐘之虎鈕學章鼎之龍文

至於篋簾先列金石俱諧八能效技六變程才觀雲龍之鬱郁望威鳳之徘徊沛縣留三日之飲平樂有十千之杯揮秦箏之慷慨伐晉鼓之擘擘皆能協宮和徵節往通來宣奏有序度曲可觀鄙金鋪之非德啻商鼓之易殫應南斗之鳴瑟雜西漢之金丸若夫伏波出討貳師遠征蒲昌對戰孤竹臨兵映似月之遙羽飛如鳧之去旌軍魚麗而齊上陣龍膝而俱行望烏雲之臨敵聞條風之入營壯士被犀良馬絡鐵野曠



塵昏星流電掣日侵山而欲隱霧凌空而不滅  
望水色其如花覩奔沙之似雪咸聽響而先登  
並聞鳴而爲節當此時也盡角耻吟胡笳不思  
刁斗暫捐金鉦虛置何資和之不營而吐聲之  
雄異制六師之進旅驚三軍之武志嗟吾弟之  
博物實愛竒之已深識且鑒於鳴石貺有踰於  
兼金如陳器於栢寢似出鼎於汾陰豈寶玦之  
爲貴非瑚璉之可欽昔武都之一扇乃銘功以  
述心矧元常之五璽又刻篆以書音况茲贈之

爲美而古跡之可尋聊滌翰而操筆終有愧於  
璆琳

箏賦

梁簡文帝

說文曰箏五絃筑身樂也風俗通曰  
今箏形如瑟不知誰改傅子曰箏者  
上圓象天下平象地中空准  
六合絃柱十二擬十二月

江南之竹弄玉有鳴鳳之簫焉洞陰之石范女  
有遊仙之磬焉若夫排雲入漢之美含商觸徵  
之竒罷雍祠之麗響絕漢殿之容儀別有泗濱



之梓聳幹孤峙負陰拂日停雪栖霜嶽峯崖孽  
玄嶺相望寄丹崖而茂采依青壁而懷芳奔電  
礪突而彌固嚴風猗拔而無傷途畏峰澀人羣  
罕至乃命夔班翦而成器隆殺得宜修短合思  
矩制端平雕鏤綺媚旣而春桑已舒暄風晻曖  
丹萸成葉翠陰如黛佳人採掇動容生態值使  
君而有辭逢秋胡而不對里閭旣返伏食蠶饑  
五色之繆雖亂八紘之緒方治異東垂之野繭  
非山經之歐絲於是制絃擬月設柱方時若夫

鏗鏘奏曲溫潤初鳴或徘徊而蘊藉或慷慨而  
逢迎若將連而類絕乍欲緩而頻驚陸離抑按  
磊落縱橫竒調間發美態孤生若將往而自返  
似欲息而復征聲習習而流韻時怳怳而不竝  
如浮波之遠驚若麗樹之爭榮譬雲龍之無蒂  
如笙鳳之有情學離鷗之弄響擬翔鴛之妙聲  
朱絃在手擊重還輕爾其曲也雅俗兼施諧雲  
門與四變雜六列與咸池王讚旣工阮賦亦竒  
曹后聽之而懽謙謝相聞之而涕垂至若登山



望別之心臨流送歸之目隴葉夜黃關雲曉伏  
覩獨鴈之寒飛望交河之水縮聽鳴箏之弄響  
聞茲絃之一彈足使遊客戀國壯士衝冠若夫  
楚王怡蕩楊生娛志小國寡民督郵無事乃有  
燕餘麗妾方桃譬李本住南城經移東里納千  
金之重聘擅專房之宴私方美珥而不減擬其  
橘而無啜開削成於斜領照玉緻於鉛脂度玲  
瓏之曲閣出翡翠之香帷腕凝紗薄珮重行遲  
爾乃促筵命友銜觴置酒耳熱眼花之娛千金

萬年之壽白日蹉跎時淹樂久玩飛花之度窻  
看春風之入柳合麗人於玉席陳寶器於紈羅  
撫鳴箏而動曲譬輕薄之經過黛眉如掃睽睽  
成波情長響怨意滿聲多奏相思而不見吟夜  
月而怨歌笑素彈之未工疑秦宮之詎和若夫  
釣竿復發蛺蝶初揮動玉匣之餘怨鳴陽鳥之  
始飛逐東趨於鄭女和西舞於荆妃足使長廊  
之瓦虛墜梁上之塵染衣鱣魚遊而不沒白鶴  
至而忘歸於是乎餘音未盡新弄縈纏參差容



續文選卷之二  
與顧慕流連落橫釵於袖下歛垂衫於膝前乍  
含猜而移柱或斜倚而續絃照瓊環而俯捻度  
玉爪而徐牽見微嘖之有趣看巧笑之多妍抗  
長吟之靡曼雜新歌之可憐歌曰年年花色好  
足侍愛君傍影入著衣鏡裙含辟惡香鴛鴦七  
十二亂舞未成行故乃宋偉綠珠之好聲文君  
慎女之清角尚掩面而不言韜輝而耻學實  
獨立之麗人乃入神之佳樂

續文選卷之二



續文選卷之三

武原胡震亨孝轅撰

詩一

前選分二十二類  
今十二類有詩

獻詩

入隋侍宴應詔


陳後主

平陳記後主從隋文帝  
東巡登華山侍飲賦詩

日月光天德山河壯帝居太平無以報願上東

封書

銷





公讌

九日侍宴樂游苑應令

庾子慎

南朝宮苑記曰樂游苑在覆舟山南

轍跡光周頌巡游盛夏功鉤陳萬騎轉閭闔九  
關通秋暉逐行漏朔氣繞相風獻壽重陽節迴  
鑾上苑中疏山開輦道間樹出離宮玉醴吹巖  
菊銀牀落井桐御梨寒更紫仙桃秋轉紅飲羽  
山西射浮雲冀北驟塵飛金埒滿葉破柳條空  
騰猿疑矯箭驚鴈避虛弓彫材濫杞梓花綬接  
鷓鴻愧乏天庭藻徒叅文雅雄

秋日侍宴婁湖苑應詔

江揔持

金陵志曰婁湖在城東南十五里吳張昭創以溉田昭封婁侯故名婁湖湖上有婁湖苑

翠渚還鑾輅瑤池命羽觴千門響雲蹕四澤動  
榮光玉軸昆池浪金舟太液張虹旗照島嶼鳳  
蓋繞林塘野靜重陰闊淮秋水氣涼霧開樓闕



近日迴煙波長洛宴諒斯在鎬飲詎能方朽劣  
叨榮遇簪笏奉周行

祖餞

從鎮江州與故游夜別

何仲言

按梁書何遜傳初為建安王水曹參軍後為廬陵王記室並隨齊江州

歷稔共追隨一旦辭羣匹復如東注水未有西  
歸日夜雨滴空堦曉燈暗離室相悲各罷酒何  
時同促膝

與胡興安夜別

何仲言

居人行轉軾客子暫維舟念此一筵笑分爲兩  
地愁露濕寒塘草月映清淮流方抱新離恨獨  
守故園秋

相送

何仲言

客心已百念孤遊重千里江暗雨欲來浪白風  
初起



相送聯句三首

寸陰常可惜別至倍傷神子瞻天際水予望路  
中塵韋黯憫憫歧路側去去平生親一朝事千里  
流涕向三春何遜

其二

昔共入門笑今成送別悲君還舊聚處爲我一  
嘔眉王江乘於今還促膝自此客江湄願子俱停  
駕看我獨解維何遜

其三

高軒雖駐軫餘日久無輝以我辭鄉淚沾君送

別衣

何遜

重別周尚書二首

庾子山

陳書周弘正字思行汝南安城人歷都官尚書天嘉元年使長安三年自

還

陽關萬里道不見一人歸惟有河邊鴈秋來南

向飛

河橋兩岸絕橫歧數路分山川遙不見懷袖遠



相聞

游覽

登城

梁簡文帝

日影半東簷靖念空杼軸小堂倦縹書華池厭  
 修竹寂寞既寡棕登城望原陸遙山半吐雲巖  
 飈時響谷靡靡見墟煙森森視寒木落霞乍續  
 斷晚浪時迴復遠矚既濡翰徒自勞心目短歌  
 雖可裁緣情非霧縠

往虎窟山寺

梁簡文帝

京口志招隱山在城西南七里本名  
 獸窟山山下有招隱寺寰宇記云梁  
 昭明太子於此讀書按唐代諱虎為  
 獸獸窟即虎窟也簡文經蒞六州遺  
 跡並誤屬昭明  
 又不獨南徐矣

塵中喧慮積物外衆情捐茲地信爽塏墟壠暖  
 阡綿藹藹車徒邁飄飄旌旆懸細松斜遶逕峻  
 嶺半藏天古樹無枝葉荒郊多野煙分花出黃  
 鳥挂石下新泉蓊鬱均雙樹清虛類八禪栖神



紫臺上縱意白雲邊徒然嗟小藥何由齊大年  
奉和往虎窟山寺

王臺卿

我王宗勝道駕言從所之輜軒轉朱轂驪馬躍  
青絲清渠影高蓋游樹拂行旗賓徒紛雜沓景  
物共依遲飛梁通澗道架宇接山基叢花臨迴  
砌分流遶曲墀誰言非勝境雲山獨在茲塵情  
良易著道性故難緇承恩奉教義方當弘受持  
北寺寅上人房望遠岫翫前池

王元禮

安期逐長往交甫稱高讓遠迹入滄溟輕舉馳  
昆閬良由心獨善兼且情由放豈若尋幽棲即  
目窮清曠激水周堂下屯雲塞檐向開牖聽奔  
濤開窻延疊嶂前階復虛汭瀾迤成洲漲雨點  
散圓文風生起斜浪遊鱗互澆灑羣飛皆哢  
蓮葉蔓田田菱花動搖漾浮光曜庭廡流芳襲  
帷帳匡坐足忘懷詎思江海上

游鍾山開善寺



徐隱忍

續高僧傳寶誌禪師安鍾章  
於其前建塔寺名開三

聊追鄴城友躡步出蘭宮  
法侶殊人世天花異俗中  
鳥聲不測處松吟未覺風  
此時超愛網還復洗塵蒙

奉和同泰寺浮圖

庾子山

釋法琳十代奉佛篇云  
是年造同泰寺殿臺等  
七

峇峇凌太清照殿北東京  
長影臨雙闕高層出九城  
栱積行雲礙幡搖度鳥驚  
鳳飛如始泊蓮合似初生  
輪重對月滿鐸韻擬鸞聲  
盡水流全住圖雲色半輕  
露晚盤猶滴珠朝火更明  
雖連博望苑還接銀沙城  
天香下桂殿仙梵入伊笙  
庶聞八解樂方遣六塵情

詠懷

詠懷

吳叔庠



續文選卷三  
元叔勢位卑長卿宦情寡二頃且營田三錢聊  
飲馬懸峰白雲上挂月青山下心中欲有言未  
得忘言者

和張侍中述懷

庾子山

陽窮乃悔吝世季誠屯剝奔河絕地維折柱傾  
天角成羣海水飛如雨天星落負鍾遂移山藏  
舟終去壑生民忽已魚君子徒爲鶴疇昔逢知  
已生平荷恩渥胡組竟無聞程嬰空寂寞永嘉

獨流寓中原惟鼎鑊道險臥槐櫨身危累素殼  
張翰不歸吳陸機猶在洛漢陽錢遂盡長安米  
空索時占季主龜乍販韓康藥伏轅終入絆垂  
翅猶離繳徒懷琬琰心空守黃金諾號鄩終無  
寄齊秦竟何託大夫唯閔周君子常思毫寂寥  
共羈旅蕭條同負郭農談止穀稼野膳唯藜藿  
操樂楚琴悲忘憂魯酒薄渭濱觀坐釣谷口看  
秋穫唯有丘明耻無復祭期樂夷則火星流天  
根秋水涸冬嚴日不暖歲晚風多朔揚浮有恠



雲細凌聞災電木皮三寸厚涇泥五斗濁雖忻  
曲轅樹猶懼雕陵鵲生涯實有始天道終虛索  
且悅善人交無疑朋友數何時得雲雨復見翔  
寥廓

哀傷

過建昌故臺

庾子慎

梁書庾亮傳亮字景明京師綽詔遣  
亮至建昌界久之得  
赴江陵  
有臺此

魯國觀遺殿韓城想舊臺仲宣原隰滿子建悲  
風來夏蓮猶反植秋牕尚左開圖雲仍溜雨畫  
水即生苔及君歡四望知余念七哀

奉和東宮經故妃舊殿

江總持

故殿看看冷空階步步悲猶憶窺牕處還如解  
珮時苔生無意早燕入有言遲若令歸就月照  
見不須疑

贈答



暮秋答朱記室

何仲言

游揚日色淺騷屑風音勁寒潭見底清秋色極  
天淨寸陰坐銷鑠千里長遼迴桃李爾繁華松  
柏余本性故心不存此高文徒可詠

遇長安使寄裴尚書

江摠持

傳聞合浦葉遠向洛陽飛北風尚嘶馬南冠獨  
陳書江摠傳侯景之亂摠舅蕭勃先據廣州往依焉自此流寓嶺南積歲

不歸去雲目徒送離琴手自揮秋蓬失處所春  
草屢芳菲太息關山月風塵客子衣

寄王琳

庾子山

梁有三王琳一司徒左長史見梁書王份傳一元帝寵姬兄初名珣改名琳見元帝紀一中書舍人見太平廣記攸諧部即段少卿雜俎作韋姓者時地皆與此詩不合陳世無王琳

玉關道路遠金陵信使疎獨下千行淚開君萬  
里書



山齋獨坐贈薛內史

楊處道

隋書薛道衡傳文帝時徵直內史省數歲授內史侍郎

巖壑澄清景，景清巖壑深。  
白雲飛暮色，綠水激清音。  
澗戶散餘彩，山牕凝宿陰。  
花草共榮暎，樹石相陵臨。  
獨坐對陳榻，無客有鳴琴。  
寂寂幽山裏，誰知無悶心。

贈薛播州

楊處道

隋書薛道衡傳曰煬帝嗣位授播州刺史楊素傳曰素嘗以五言詩十四首寄贈薛道衡詞氣宏拔風韻秀上為一時盛作未幾而卒道衡歎曰人之將死其言也善豈若是乎

滔滔彼江漢，實為南國紀。  
作牧求明德，若人應斯美。  
高臥未褰帷，飛聲已千里。  
還望白雲天，日暮秋風起。  
峴山君儻游，淚落應無已。  
北風吹故林，秋聲不可聽。  
鴈飛窮海寒，鶴唳霜臯淨。  
含毫心未傳，聞音路猶負。  
唯有孤城月，徘徊獨臨映。  
弔影余自憐，安知我疲病。



行旅

初發新林

何仲言

金陵志新林浦在城西南二十里

伊昔負薪暇慕義游梁楚短翮忘連翮追飛散  
容與優游沐道教漸漬淹寒暑大德本無酬輕  
生竊自許舟歸屬海運風積如鵬舉浮水暗舟  
艫合岸喧徒侶凜凜窮秋暮初寒入洲渚鏡吹  
響清江懸旗出長嶼危檣迥不進杳浪高難拒

回首泣親賓中天望宛許帝城猶隱約家園無  
處所去矣方悠悠含意將何語

入若邪溪

王文海

水經注若邪溪吳越春秋所謂歐冶  
澗以鑄五劍上承焦峴麻溪下注大  
湖水至清照衆山倒影窺之如畫  
梁書王籍傳曰籍除湘東王參軍隨  
府會稽境有雲門天柱山籍嘗游之  
累月不返至若邪溪賦詩云蟬噪林  
逾靜鳥鳴山更幽當時以為文外獨  
絕顏之推家訓曰籍詩簡文吟詠不  
能忘之孝元諷味以為不可復得詩  
云蕭蕭馬鳴悠悠旆旌毛傳曰言不



餘艤何汎汎空水共悠悠陰霞生遠岫陽景逐  
迴流蟬噪林逾靜鳥鳴山更幽此地動歸念長  
年悲倦游

上虞鄉亭觀濤津渚學潘安仁河陽縣詩

劉孝綽

劉孝綽傳歷太子洗馬掌東宮  
管三出為  
東還上表辭與并江合漢曹娥父  
呼之為清  
死上虞  
葬在江之  
道南

昔余筮賓始衣冠仕洛陽無貲徒有任一命忝  
為郎再踐神仙側三入崇賢旁東朝禮髦俊虛  
薄厠才良遊談侍名理搦管創文章引籍陪下  
膳橫經叅上庠誰謂服事淺契闊變炎涼一朝  
謬為吏結綬去承光烹鮮徒可習治民終未長  
化雞仰季智馴雉推仲康此城鄰夏穴楠蠹茂  
筠篁孝碑黃絹語神濤白鷺翔遨遊佳可望釋  
事上川梁秋江凍雨絕返景照移塘織羅殊未  
動駭水忽如湯乍出連山合時如高蓋張漂沙



黃沫聚。礫石素波揚。榜人不敢唱。舟子詎能航。  
離家復臨水。眷然思故鄉。中來不可絕。奕奕苦  
人腸。沂洄若無阻。謝病返清漳。

帆渡吉陽洲與孝威同賦

劉孝儀

廬陵志。贛江經墨潭而下。與永豐江  
合。有洲曰江中。二水委蛇繚繞。狀如  
吉字。故曰吉陽。

揚帆乘浪華。摻鼓要風力。近樹儵而遐。遙山俄  
已逼。欲比驚龍掣。將頓陽鳥翼。客行悲道遠。唯

須前路極

渡青草湖

陰子堅

荊州記曰。巴陵南有青草湖。周迴百  
里。日月出沒其中。湖南有青草山。故  
因爲名。即洞庭湖也。

洞庭春溜滿。平湖錦帆張。沅水桃花色。湘流杜  
若香。穴去茅山近。江連巫峽長。帶天澄迥碧。映  
日動浮光。行舟逗遠樹。度鳥息危樯。滔滔不可  
測。一葦詎能航。



於長安歸還揚州九月九日行薇山亭賦  
韻

江總持

高史江總傳陳亡總入隋後歸江都卒

心逐南雲逝形隨北鴈來故鄉籬下菊今日幾  
花開

樂府上

子夜歌

梁武帝

唐書樂志曰子夜歌晉曲也晉有女子名子夜造此聲聲過哀苦樂府解題曰後人更為四時行樂之辭謂之子夜四時歌

恃愛如欲進含羞未肯前朱口發豔歌玉指弄  
嬌絃

子夜四時歌夏歌二首秋歌一首

梁武帝

閨中花如繡簾上露如珠欲知有所思停織復  
踟躕

玉盤著朱李金杯盛白酒雖欲持自親復恐不



其口

繡帶合歡結錦衣連理文懷情入夜月含笑出朝雲

歡聞歌

梁武帝

豔豔金樓女心如玉池蓮持底報郎恩俱期遊梵天

白紵辭

梁武帝

宋書樂志白紵辭宜是吳舞樂府解題曰古辭盛稱舞者之美宜及芳時為樂

朱絲玉柱羅象筵飛瑄促節舞少年短歌流目未肯前含笑一轉私自憐

纖腰嫋嫋不任衣嬌怨獨立特為誰赴曲君前未忍歸上聲急調中心飛

龍丘引



梁簡文帝

琴操曰楚引者楚遊子龍丘高所作  
龍丘高出遊三年思歸故鄉望楚而  
長歎故曰楚引  
即龍丘引也

龍丘一回首楚路蒼無極水照弄珠影雲吐陽  
臺色浦狹村煙度洲長歸鳥息遊蕩逐春心空  
憐無羽翼

烏棲曲

梁簡文帝

烏棲曲  
世為  
所出  
按宋沈攸之

作烏夜飛曲通志云亦曰  
棲烏夜飛其名或本此矣

織成屏風金屈膝朱脣玉面燈前出相看氣息  
望君憐誰能含羞不自前

烏棲曲

梁元帝

沙棠作船桂為檝夜渡江南採蓮葉復值西施  
新浣紗共向江干眺月華

起夜來

柳文暢



樂府解題曰起夜來其辭  
意猶念疇昔思君之來也

城南斷車騎閣道覆青埃露華光翠網月影入  
蘭臺洞房且莫掩應門或復開颯颯秋桂響非  
君起夜來

行路難

王元禮

樂府解題曰行路難前言世路艱難  
及難則思君之來也  
千門皆閉夜何央百憂俱集斷人腸探揣箱中  
取刀尺拂拭機上斷流黃情人逐情雖可恨復

畏邊遠乏衣裳已縹一罽催衣縷復擣百和薰  
衣香猶憶去時腰大小不知今日身短長襦襜  
雙心共一袜裊復兩邊作八襪襟帶雖安不忍  
縫開孔裁穿猶未達胸前却月兩相連本照君  
心不照天願君分明得此意勿復流蕩不如先  
含悲含怨判不死封情忍思待明年

游獵篇

劉孝威

左克明樂府曰亦謂  
之行行遊且獵篇



之罘講射所上林娛獵場選徒驕楚客召狩誇  
胡王罕車已戒道風鳥復起行伙飛具矰繳材  
官命蹶張高且掩月兔勁矢射天狼躡地不遑  
逸排虛豈及翔日暮勾陳轉風清鏡吹颺歸來  
宴平樂寧肯滯禽荒

陌上桑

王臺卿

樂府解題古辭言羅敷採桑為使君所邀盛誇其夫為侍中郎以拒之此與古辭稍異

鬱鬱陌上桑盈盈道傍女送君上河梁拭淚不能語

度關山

戴嵩

左克明樂府曰古辭曹魏樂奏武帝所賦天地間人為貴言人君當自勤苦省方黜陟省刑薄賦也若梁戴嵩但錄征人行役之思

昔聽隴頭吟平居已流涕今上關山望長安樹  
如薺千里非鄉邑四海皆兄弟軍中大體自相  
褒其間得意各分曹博陵輕俠皆無位幽州重



氣本多豪馬銜首蒼葉劒瑩鷓鴣膏初征心未  
習復值鴈飛入山頭看月近草上知風急笛喝  
曲難成笳繁響還澀武帝初承平東伐復西征  
薊門海作塹榆塞冰爲城催令四校出倚望三  
邊平箭服朝來動刀環臨陣鳴將軍一百戰都  
護五千兵且決雄雌眼前利誰道功名身後事  
丈夫意氣本自然來時辭第已聞天但令此身  
與命在不持烽火照甘泉

玉樹後庭花

陳後主

南史曰後主每引賓客游宴使諸貴  
人女學士與狎客共賦新詩采其尤  
豔麗者以爲曲調被以新聲選宮女  
千數歌之其曲有玉樹後庭花等大  
抵皆美張貴妃  
孔貴嬪之容色

麗宇芳林對高閣新粧豔質本傾城映戶凝嬌  
乍不進出帷含態笑相迎妖姬臉似花含露玉  
樹流光照後庭

新成安樂宮

陰子堅



樂府解題曰新成安樂官行備言雕飾刻斲之美 三國典略曰徐陵言陰鏗於陳主陳主召使賦新成安樂宮鏗援筆便就甚歎賞之

新宮實壯哉雲裏望樓臺迢遞翔鷗仰連翩賀  
燕來重欄寒霧宿丹井夏蓮開砌石披新錦梁  
花畫早梅欲知安樂盛歌管雜塵埃

### 關山月

徐孝穆

樂府解題曰關山月傷離別也漢橫吹曲二十八解關山月長安道等八曲後世所加

關山三五月客子憶秦川思婦高樓上當牕應  
未眠星旗映踈勒雲陣上祁連戰氣今如此從  
軍復幾年

### 烏棲曲

徐孝穆

卓女紅妝期此夜胡姬沽酒誰論價風流荀令  
好兒郎偏能傳粉復薰香

繡帳羅帷隱燈燭一夜千年猶不足唯憎無賴  
汝南雞天河未落猶爭啼



當壚曲

岑思禮

漢書曰司馬相如與文君俱之臨邛  
盡賣車騎買酒舍乃令文君當壚顏  
師古曰賣酒之處累土爲壚以居酒  
甕四邊隆起其一面高形如鍛壚故  
名壚當壚  
曲蓋取此

明月二八照花新當壚十五晚留賓回眸百萬  
橫自陳

長安道

阮卓

長安馳道上鐘鳴官寺開殘雲銷鳳闕宿霧歛  
章臺騎轉金吾度車鳴丞相來藹藹東都晚羣  
公騶御回

關山月

王子淵

關山夜月明秋色照孤城影虧同漢陣輪滿逐  
胡兵天寒光轉白風多暈欲生寄言亭上吏遊  
客解雞鳴

烏夜啼



庾子山

唐書樂志曰烏夜啼宋臨川王義慶所作元嘉十七年徙彭城王義康於豫章義慶時為江州至鎮相見而哭文帝聞而怪之徵還慶大懼伎妾夜聞烏夜啼聲扣齋閣云明日應有赦其年更為南兗州刺史因此作歌今所傳歌辭及諸家擬作皆非義慶本旨

促柱繁絃非子夜歌聲舞態異前溪御史府中  
何處宿洛陽城頭那得棲彈琴蜀郡卓家女織  
錦秦川竇氏妻詎不自驚長淚落到頭啼烏恒  
夜啼

出塞

楊處道

晉書樂志出塞曲李延年造按西京雜記云戚夫人歌出塞入塞望歸之曲則高帝時已有之疑不起於延年也

漢虜未和親憂國不憂身握手河梁上窮涯北  
海濱據鞍獨懷古慷慨感良臣歷覽多舊迹風  
日慘愁人荒塞空千里孤城絕四鄰樹寒偏易  
古草衰恒不春交河明月夜陰山苦霧辰鴈飛  
南入漢水流西咽秦風霜久行役河朔備艱辛



薄暮邊聲起空飛胡騎塵

從軍行

盧子行

王僧虔技錄平調七曲有從軍行樂府解題曰從軍行皆軍旅苦辛之辭

朔方烽火照甘泉長安飛將出祁連犀渠玉劍  
良家子白馬金羈俠少年平明偃月屯右地薄  
暮魚麗逐左賢谷中石虎經銜箭山上金人曾  
祭天天涯一去無窮已薊門迢遞三千里朝見  
馬嶺黃沙合夕望龍城陣雲起庭中竒樹已堪

攀塞外征人殊未還白雪初下天山外浮雲直  
上五原間關山萬里不可越誰能坐對芳菲月  
流水本自斷人腸堅冰舊來傷馬骨邊庭節物  
與華異冬霰秋霜春不歇長風蕭蕭渡水來歸  
鴈連連映天沒從軍行軍行萬里出龍庭單于  
渭橋今已拜將軍何處覓功名

聽鳴蟬篇

盧子行

北史盧思道傳周武帝平齊授思道儀同三司追赴長安與同輩陽休之



等數人作聽鳴蟬篇思道所為詞意  
清切新野庾信徧覽諸同作者而歎  
之美

聽鳴蟬此聽悲無極群嘶玉樹裏迴噪金門側  
長風送晚聲清露供朝食晚風朝露實多宜秋  
日高鳴獨見知輕身蔽數葉哀鳴抱一枝流亂  
罷還續酸傷合更離慙聽別人心即斷纔聞客  
子淚先垂故鄉已超忽空庭正蕪沒一夕復一  
朝坐見涼秋月河流帶地從來險峭路干天不  
可越紅塵早敝陸生衣明鏡空悲潘掾髮長安

城裏帝王州鳴鐘列鼎自相求西望漸臺臨太  
液東瞻甲觀距龍樓說客恒持小冠出越使常  
懷寶劔遊學仙未成便尚主尋源不見已封侯  
富貴功名本多豫繁華輕薄盡無憂詎念嫫姚  
嗟木梗誰憶田單倦土牛歸去來青山下秋菊  
離離日堪把獨焚枯魚宴林野終成獨校子雲  
書何如還驅少游馬

昔昔鹽

薛玄卿



樂苑曰昔昔鹽羽調曲洪邁曰歌詩謂之鹽者如吟行曲引之類隋唐嘉話曰煬帝善屬文不欲人出其右薛道衡由是得罪後因事誅之曰更能作空梁落燕泥否

垂柳覆金堤  
薜蘿葉復齊  
水溢芙蓉沼  
花飛桃李蹊  
採桑秦氏女  
織錦賈家妻  
關山別蕩子  
風月守空閨  
恒歛千金笑  
長垂雙玉啼  
盤龍隨鏡隱  
彩鳳逐帷低  
飛魂同夜鵲  
倦寢憶晨雞  
暗牖懸蛛網  
空梁落燕泥  
前年過代北  
今歲往遼西  
一去無消息  
那能惜馬蹄

入關

虞茂世

樂府解題入關曲亦李延年所造

隴雲低不散  
黃河咽復流  
關山多道里  
相接幾重愁

從軍行

明餘慶

三邊烽亂驚  
十萬且橫行  
風卷常山陣  
笳喧細柳營  
劍花寒不落  
弓月曉逾明  
會取河西地  
持




作朔方城

續文選卷三

三

續文選卷之三

國家圖書館, NATIONAL CENTRAL LIBRARY, TAIWAN, R.O.C.





續文選卷之四

武原胡震亨孝轅撰

詩二

樂府下

上卷以梁隋標界此卷不無犬牙如  
魚游女本入殷年汝墳漢廣通稱周什既  
譜樂之年斯在當不以作者為限至吳歌  
西曲歌雖出晉宋齊世亦罕值本辭應梁  
時謠詠未少竄入觀夫三洲舊曲不廢宮  
懸丹陽諸篇半仍舞列附之橫吹抑亦  
合例并與雜曲時代莫詳者綴卷末焉

梁鼓角橫吹曲辭

自漢以來北狄樂總歸鼓吹署有鼓角  
者為橫吹用之軍中馬上所奏是也





企喻歌辭四曲

古今樂錄曰企喻本北  
歌後一首是苻融詩

男兒欲作健結伴不須多鷄子經天飛羣雀兩  
向波

放馬大澤中草好馬著臆牌子鐵襴襠鈇鉞鶴  
尾條

前行看後行齊著鐵襴襠前頭看後頭齊著鐵  
鈇鉞

男兒可憐蟲出門懷死憂尸喪狹谷中白骨無

人收

瑯琊王歌辭

左克明曰最後云廣平公按晉書  
載記是姚弋仲之子泓之弟也

新買五尺刀懸著中梁柱一日三摩娑劇於十  
五女

東山看西水水流盤石間公死姥更嫁孤兒甚  
可憐

客行依主人願得主人彊猛虎依深山願得松  
柏長



憎馬高纏駿遙知身是龍誰能騎此馬唯有廣平公

### 黃淡思歌辭

古今樂錄曰思音相思之思

心中不能言腹作車輪旋與郎相知時但恐傍人聞

### 地驅樂歌辭四曲

古今樂錄曰側側力力以下八句是今歌有此曲

青青黃黃雀石積唐槌殺野牛押殺野羊

驅羊入谷字羊在前老女不嫁蹋地喚天  
側側力力念君無極枕郎左臂隨郎轉側  
摩將郎鬚看郎顏色郎不念女不可與力

### 地驅樂歌

月明光光星欲墮欲來不來早語我

### 隴頭流水歌辭三曲

後漢志漢陽郡有八阪名隴坂辛氏三秦記曰其阪九廻上者七日乃越清水四注下郭仲產秦州記曰登山嶺東望秦川四五百里極目泱然京人行役升此而顧瞻者莫不悲思



隴頭流水流離西下念吾一身飄然曠野  
西上隴阪羊腸九回山高谷深不覺脚酸  
手攀弱枝足踰弱泥

隴頭歌辭三曲

隴頭水流離山下念吾一身飄然曠野  
朝發欣城暮宿隴頭寒不能語舌卷入喉  
隴頭流水鳴聲幽咽遙看秦川心肝斷絕

捉搦歌四曲

粟穀難舂付石臼弊衣難護付巧婦男兒千凶  
飽人手老女不嫁只生口

誰家女子能行步反著袂禪後裙露天生男女  
共一處願得兩箇成翁媪

華陰山頭百丈井下有流水徹骨冷可憐女子  
能照影不見其餘見斜領

黃桑柘屐蒲子履中央有絲兩頭繫小時憐母  
大憐婿何不早嫁論家計

折楊柳歌辭

遙看孟津河楊柳鬱婆娑我是虜家兒不解漢



兒歌

健兒須快馬快馬須健兒  
跣跋黃塵下然後別  
雄雌

折楊柳枝歌四曲

上馬不捉鞭反拗楊柳枝  
下馬吹長笛愁殺行  
客兒

門前一株棗歲歲不知老  
阿婆不嫁女那得孫  
兒抱

敕敕何力力女子臨牕織  
不聞機杼聲唯聞女

歎息

問女何所思問女何所憶  
阿婆許嫁女今年無  
消息

幽州馬客吟歌辭

快馬常苦瘦勦兒常苦貧  
黃禾起羸馬有錢始  
作人

南山自言高只與北山齊  
女兒自言好故入郎  
君懷

高陽樂人歌二曲



古今樂錄曰魏高陽王樂人所作

可憐白鼻騮相將入酒家無錢但共飲畫地作交賒

何處蹀觴來兩頰色如火自有桃花容莫言人勸我

### 木蘭詩

古今樂錄曰木蘭不知名詐作男子代父征行其辭最苦按黃州志黃陂縣北木蘭山有木蘭將軍冢廟相傳朱氏女子代父從征郡先有木蘭縣隋書云開皇十八年改名亦猶曹江漆亭之日矣

唧唧復唧唧木蘭當戶織不聞機杼聲唯聞女  
歎息問女何所思問女何所憶女亦無所思女  
亦無所憶昨夜見軍帖可汗大點兵軍書十二  
卷卷卷有爺名阿爺無大兒木蘭無長兄願爲  
市鞍馬從此替爺征東市買駿馬西市買鞍韉  
南市買轡頭北市買長鞭旦辭爺孃去暮宿黃  
河邊不聞爺孃喚女聲但聞黃河流水鳴濺濺  
旦辭黃河去暮至黑山頭不聞爺孃喚女聲但  
聞燕山胡騎鳴啾啾萬里赴戎機關山度若飛



朔氣傳金柝寒光照鐵衣將軍百戰死壯士十年歸歸來見天子天子坐明堂策勳十二轉賞賜百千疆可汗問所欲木蘭不用尚書郎願借明駝千里足送兒還故鄉爺孃聞女來出郭相扶將阿姊聞妹來當戶理紅粧小弟聞姊來磨刀霍霍向豬羊開我東閣門坐我西間牀脫我戰時袍著我舊時裳當牕理雲鬢挂鏡帖花黃出門看火伴火伴皆驚忙同行十二年不知木蘭是女郎雄兔脚撲朔雌兔眼迷離雙兔傍地

走安能辨我是雄雌

### 近代吳歌

晉書樂志曰吳歌雜曲並出江南東晉已來稍有增廣其始皆徒歌既而被之管絃蓋自永嘉渡江之後下及梁陳咸都建業吳聲歌曲始於此也

### 子夜歌

芳是香所爲冶容不敢當天不奪人願故使儂見郎

宿昔不梳頭絲髮被兩肩婉伸郎膝上何處不可憐



今日已歡別合會在何時明燈照空局悠然未  
有期

學梳北牕臥郎來就儂嬉小喜多唐突相憐能  
幾時

郎爲傍人取負儂非一事攤門不安橫無復相  
關意

學裙未結帶約眉出前牕羅裳易飄颺小開罵  
春風

歡從何處來端然有憂色三喚不一應有何比

松柏

我念歡的的子行由豫情霧露隱芙蓉見蓮不  
分明

子夜四時歌

春歌

光風流月初新林錦花舒情人戲春月窈窕曳  
羅裙

碧樓冥初月羅綺垂新風含春未及歌桂酒發  
清容



春林花多媚春鳥意多哀春風復多情吹我羅裳開

明月照桂林初花錦繡色誰能不相思獨在機中織

夏歌

高堂不作壁招取四面風吹歡羅裳開動儂含笑容

反覆華簾上屏帳了不施郎君未可前待我整容儀

情知三夏熱今日偏獨甚香巾拂玉席共郎登樓寢

輕衣不重綵颺風故不涼三伏何時過許儂紅粉粧

秋歌

開牕取月光滅燭解羅裳含笑帷幌裏舉體蘭蕙香

涼風開牕寢斜月垂光照中宵無人語羅幌有雙笑



初寒八九月獨纏自絡絲寒衣尚未了郎喚儂底爲

秋風入牕裏羅帳起飄颺仰頭看明月寄情千里光

冬歌

淵冰厚三尺素雪覆千里我心如松柏君情復何似

寒鳥依高樹枯林鳴悲風爲歡顛顛盡那得好顏容

躡履步荒林蕭索悲人情一唱泰始樂枯草銜花生

歡聞歌一首

迢遙天無柱流漂萍無根單身如螢火持底報郎恩

歡聞變歌

古今樂錄曰歡聞變歌者晉穆帝升平中童子輩忽歌於道曰阿子聞曲終輒云阿子汝聞不無幾而穆帝崩褚太后哭阿子汝聞不聲既悽苦因以名之



缺臂飲清血牛羊持祭天沒命成灰土終不罷相憐

駛風何曜曜帆上牛渚磯帆作繖子張船如侶馬馳

### 前溪歌

吳興記曰前溪在縣南東流入太湖謂之風渚晉書騎將軍沈玩作前溪歌曲傳者以為指此溪也

黃葛結蒙籠生在洛溪邊花落隨流去何見逐流還還亦不復鮮

殷勤黃葛生爛熳誰能斷葛根寧斷嬌兒乳不斷郎

### 黃生曲

以所歡名曲首云黃生無誠信是也

松柏葉青蒨石榴花葳蕤迺置前後事歡今定憐誰

### 黃鵠曲四首

列女傳曰魯陶嬰者少寡養幼孤魯人或聞其義將求焉嬰聞之恐不得免乃作黃鵠歌明已之不更二庭也按黃鵠本漢橫吹曲名



黃鵠參天飛半道鬱徘徊腹中車輪轉君知思  
憶誰

黃鵠參天飛半道還哀鳴三年失羣侶生離傷  
人情

黃鵠參天飛凝融爭風回高翔入玄闕時復乘  
雲頽

黃鵠參天飛半道還後渚欲飛復不飛悲鳴覓  
羣侶

長樂佳

小庭春映日四角佩琳琅玉枕龍鬚席郎瞑首  
何當

懊儂歌

通志曰懊儂一作懊惱古今樂錄曰  
晉石崇綠珠所作絲布澀難縫一曲

江陵去揚州三千三百里已行一千三所有二  
千在

長檣鐵鹿子布帆阿那起詫儂安在間一去三  
千里

懊惱柰何許夜聞家中論不得儂與汝



華山畿

古今樂錄曰宋少帝時南徐一士子  
 從華山畿往雲陽見客舍有女子年  
 十八九悅之無日遂感心疾母為至  
 華山尋訪見女年長女聞感之因脫  
 蔽膝令母密置於下臥之旬已少日  
 果差忽舉身死後瘞遂食而死氣  
 歎絕謂曰葬我於華山度母  
 從其意也女聞年不葬於女粧點  
 才不葬也葬於華山畿為儂死獨  
 指應聲曰女家入葬女即打  
 無知之乃合葬呼女家

未敢便相許夜聞儂家論不持儂與汝  
 將懊惱石闕晝夜題碑淚常不燥

相送勞勞渚長江不應滿是儂淚成許

奈何許天下人何限慊慊只為汝

讀曲歌

宋書樂志曰讀曲歌民間為彭城王  
 義策作歌云死罪劉領軍誤殺劉第  
 四是也古今樂錄曰元嘉十七年袁  
 后崩百官不敢作聲歌或因酒讌止  
 竊聲讀曲細吟  
 而已以此為名

花釵芙蓉髻雙鬢如浮雲春風不知著好來動

羅裙

念子情難有已惡動羅裙聽儂入懷不



娑拖何處歸。道逢播柎郎。口朱脫去盡。花釵復低昂。

柳樹得春風。一低復一昂。誰能空相憶。獨眠度三陽。

柰何許。石闕生口中。銜碑不得語。

合冥過藩來。向曉開門去。歡取身上好。不爲儂作慮。

黃天不滅解。甲夜曙星出。漏刻無心腸。復令五更畢。

含笑來向儂。一抱不能置。領後千里帶。那頓誰多媚。

暫出白門前。楊柳可藏烏。歡作沈水香。儂作博山鑪。

閨閣斷信使的的。兩相憶。譬如水上影。分明不可得。

罷去四五年。相見論故情。殺荷不斷藕。蓮心已復生。

黃竹子歌一首



唐李康成曰黃竹子歌今時吳歌也

故鄉 江邊黃竹子堪作女兒箱一船使兩槳得孃還

### 近代西曲歌

古樂苑云西曲歌出於荆郢樊鄧之間其聲節送和與吳歌亦異

烏夜啼

可憐烏曰鳥彊言知天曙無故三更啼歡子冒  
聞去

莫愁樂

唐書樂志曰莫愁樂者出於石城樂石城有女子名莫愁善歌謠石城樂和中復有忘愁聲因有此歌樂府解題曰古歌有莫愁洛陽女與此不同

不流 聞歡下揚州相送楚山頭探手抱腰看江水斷

### 估客樂二曲

古今樂錄曰估客樂者齊武帝所製帝布衣時嘗遊樊鄧登祚以後追憶往事而作歌帝本辭一曲釋寶月又上二曲此二曲是後人所作詩紀附寶月

大編珂峨頭何處發揚州借問編上郎見儂所



歡不

初發揚州時船出平津泊五兩如竹林何處相尋博

襄陽樂

表子野中丞劉道產為襄陽太守有善歌樂人戶豐瞻望表子野中丞劉道產為襄陽太守有善歌樂人戶豐瞻望

朝發襄陽城暮至大堤宿大堤諸女兒花豔驚郎目

江陵三千三百西塞陌中夫但問相隨否何計道

里長

揚州蒲緩環白錢兩三叢不能買將還空手攬抱儂

女蘿自微薄寄託長松表何惜負霜死貴得相纏繞

三洲歌三曲

古今樂府詩歸曰三洲歌者南朝數游巴陵三洲口在是因此作此歌

送歡板橋灣相待三山頭遙見千幅帆知是逐風流



風流不暫停三山隱行舟願作比目魚隨歡千里遊

湘東醺醪酒廣州龍頭錨玉樽金鏤椀與郎雙杯行

### 江陵樂

通典曰江陵古荊州之域東晉齊梁以為重鎮梁元帝都之

不復出場戲踈場生青草試作兩三回踈場方就好

陽春二三月相將蹋百草逢人駐步看楊聲皆

言好

### 安東平

按第五曲云東平劉生復感人情橫吹曲有東平劉生歌其辭曰東平劉生安東子樹木稀屋裏無人看阿誰安東平疑本此

淒淒烈烈北風為雪船道不通步道斷絕  
吳中細布濶幅長度我有一端與郎作袴  
微物雖輕拙手所作餘有三丈與郎別厝  
製為輕巾以奉故人不持作好與郎拭塵

### 來羅四曲



鬱金黃花標下有同心草。草生日已長。人生日就老。

君子防未然。莫近嫌疑邊。瓜田不躡履。李下不正冠。

故人何怨新。切少必求多。此事何足道。聽我歌來羅。

白頭不忍死。心愁皆敖然。遊戲泰始世。一日當千年。

那呵灘六曲

古今樂錄那呵蓋灘名也。多叙江陵及揚州事。

我去只如還。終不在道邊。我若在道邊。良信寄書還。

汭江引百丈。一濡多一艇。上水郎擔篙。何時至江陵。

江陵三千三。何足特作遠。書疏數知聞。莫令信使斷。

聞歡下揚州。相送江津灣。願得篙櫓折。交郎到頭還。



篙折當更覓櫓折當更安各自是官人那得到  
頭還

百思纏中心顛顛爲所歡與子結終始折約在  
金蘭

孟珠二曲

玉臺新詠作丹陽孟  
珠宜是婦人名也

人言孟珠富信實金滿堂龍頭銜九花玉釵明  
月璫

陽春二三月草與水同色攀條摘香花言是歡

氣息

又一曲

可憐景陽山茗茗百尺樓上有明天子麟鳳戲  
中州

翳樂一曲

人生歡愛時少年新得意一旦不相見輒作煩  
冤思

又二曲

陽春二三月相將舞翳樂曲曲隨時變持許豔



卽目

人言揚州樂揚州信自樂總角諸少年歌舞自相逐

雙行纏二曲

朱絲繫腕繩真如白雪凝非但我言好衆情共所稱

新羅繡行纏足趺如春妍他人不言好獨我知可憐

黃督二曲

喬客他鄉人三春不得歸願看楊柳樹已復藏斑騅

籠車度蹋衍故人求寄載催牛閉後戶無預故人事

白附鳩一曲

古今樂錄曰白附鳩亦曰白浮鳩古樂苑曰宋彭城王忌檀道濟誅之時人歌曰可憐白浮鳩枉殺檀江州此曲始於此事

石頭龍尾灣新亭送客渚酤酒不取錢郎能飲幾許



作蠶絲

春蠶不應老晝夜常懷絲何惜微軀盡纏綿自有時

西鳥夜飛

通志作棲鳥夜飛古今樂錄宋荊州刺史沈攸之舉兵東下未敗之前思歸京師作西鳥夜飛古樂苑曰此非攸之本辭

日從東方出團團雞子黃夫婦恩情重憐歡故在傍

月節折楊柳歌

四月歌

芙蓉始懷蓮何處覓同心俱生世尊前折楊柳  
捻香散名花志得長相取

雜曲

聖郎曲一首

古今樂錄聖郎  
嬌女並神弦歌

左亦不佯佯右亦不翼翼仙人在郎傍玉女在  
郎側酒無沙糖味爲他通顏色

嬌女詩二曲



北遊臨河海遙望中菰菱芙蓉發盛華淥水清  
且澄弦歌奏聲節髣髴有餘音

蹀躞越橋上河水東西流上有神仙居下有西  
流魚行不獨自三三兩兩俱

### 陽春曲

樂府解題曰陽春傷也  
沈約江南弄有陽春曲

芡苡生前逕含桃落小園春心自搖蕩百舌更  
多言

### 樂辭

繡幙圍香風耳節朱絲桐不知理何事淺立經  
營中愛惜加窮袴防閑託守宮今日牛牟上丘  
隴當年近前面發紅

### 西洲曲

憶梅下西洲折梅寄江北單衫杏子紅雙鬢鴉  
雛色西洲在何處兩槳橋頭渡日暮伯勞飛風  
吹烏臼樹樹下即門前門中露翠鈿開門郎不  
至出門採紅蓮採蓮南塘秋蓮花過人頭低頭  
弄蓮子蓮子清如水置蓮懷袖中蓮心徹底紅



憶郎郎不至。仰首望飛鴻。鴻飛滿西洲。望郎上青樓。樓高望不見。盡日欄杆頭。欄杆十二曲。垂手明如玉。卷簾天自高。海水搖空綠。海水夢悠悠。君愁我亦愁。南風知我意。吹夢到西洲。

長干曲

逆浪故相邀。菱舟不怕搖。妾家楊子住。便弄廣陵潮。

歎疆場

樂苑曰歎疆場官調曲也

聞道行人至。粧梳對鏡臺。淚痕看尚在。笑靨自然開。

雜歌

東飛伯勞歌

梁武帝

東飛伯勞西飛燕。黃姑織女時相見。誰家兒女對門居。開顏發豔照里閭。南窻北牖桂月光。羅帷綺帳脂粉香。女兒年幾十五六。窈窕無雙顏如玉。三春已暮花從風。空留可憐誰與同。



河中之水歌

梁武帝

河中之水向東流洛陽女兒名莫愁莫愁十三  
能織綺十四採桑南陌頭十五嫁爲盧家婦十  
六生兒字阿侯盧家蘭室桂爲梁中有鬱金蘇  
合香頭上金釵十二行足下絲履五文章珊瑚  
掛鏡爛生光平頭奴子擎履箱人生富貴何所  
望恨不早嫁東家王

行幸甘泉宮歌

劉孝威

關輔志甘泉宮以山爲名漢武建元  
中增廣周十九里元和郡縣志武帝  
以五月避暑者於  
此八月乃還

漢家迎夏畢避暑甘泉宮棧車鳴里鼓駟馬駕  
相風校尉烏桓騎待制樓煩弓後旌猶五柞前  
笳度九巖才人豹尾內御酒屬車中輦迴百子  
閣扇動七輪風鳴鐘休衛士披圖召後宮材官  
促校獵涼秋戲射熊

挾琴歌



魏伯起

春風宛轉入曲房。兼送小苑百花香。白馬金鞍去未返。紅妝玉筯下成行。

敕勒歌

樂府廣題曰北齊神武攻周玉壁士卒死者十四五神武恚憤疾發周王下令曰高歡鼠子親犯玉壁劍弩一發元兇自斃神武聞之勉坐以安士眾悉引諸貴使解律金唱敕勒神武自和之其歌本鮮卑語易為齊言故其句長短不齊

敕勒川陰山下天似穹廬籠蓋四野天蒼蒼野

茫茫風吹草低見牛羊



續文選卷之四

國家圖書館, NATIONAL CENTRAL LIBRARY, TAIWAN, R.O.C.





續文選卷之五

武原胡震亨孝轅撰

詩三

雜詩

詠螢

梁簡文帝

本將秋草并。今與夕風輕。  
騰空類星質。拂樹若花生。  
屏疑神火照。簾似夜珠明。  
逢君拾光彩。不忤此身傾。



愁閨照鏡

梁簡文帝

別來顛顚久。他人怪容色。只有匣中鏡。還持自相識。

行雨

梁簡文帝

襄陽耆舊傳赤帝女瑤姬未行而卒葬於巫山之陽旦為行雲暮為行雨宋玉神女賦序楚襄王遊于雲夢之浦使玉賦高唐之事其夜玉寢夢與神女遇其狀甚麗王寢今本誤作王寢

本是巫山來。無人覩顏色。唯有楚王臣。曾言夢相識。

賦得竹

梁元帝

嶰谷管新抽。淇園節復修。作龍還葛水。為馬向并州。柯亭臨絕澗。桃枝夾細流。冠學芙蓉勢。花堪威鳳遊。邛王若有獻。張騫應拜侯。

春別應令

梁元帝



蕭子顯作春別詩簡文和之此應簡文令

門前楊柳亂如絲直置佳人不自持適言新作裂紈詩誰悟今成織素辭

別詩

梁元帝

三月桃花合面脂五月新油好煎澤莫復臨時不寄人謾道江中無估客

擣衣詩

柳文暢

南史柳惲傳惲少工篇什為詩云亭臯木葉下隴首秋雲飛王融見而嗟賞因書齋壁及所執白團扇

行後滯風波游人淹不歸亭臯木葉下隴首秋雲飛寒園夕鳥集思牖草蟲悲嗟矣當春服安見禦冬衣

襍詩

柳文暢

雲輕暮色轉草綠晨芳歸山墟罷寒晦園澤潤朝暉春心多感動睹物情復悲自君之去矣蘭



堂罷鳴機徒知遊宦是不念別離非

詔問山中何所有賦詩以答

陶通明

賦詩以答詔問山中何所有賦詩以答詔問  
詔問山中何所有賦詩以答詔問  
詔問山中何所有賦詩以答詔問

山中何所有英英多白雲只可自怡悅不堪持  
寄君

邊城將

吳叔庠

聞君報一餐遠送出平野玉標丹霞劍金絡豔  
光馬高旗入漢飛長鞭歷地寫曙星海中出曉  
月山頭下歲晏坐論功自有思臣者

寶劍

吳叔庠

我有一寶劍出自昆吾溪照人如照水切玉如  
切泥鐔邊霜凜凜匣上風淒淒寄語張公子何  
當來見携

詠美人治粧



江洪

上車畏不妍。顧眄更斜轉。大恨畫眉長。猶言顏色淺。

和蕭諮議岑離閨怨

何仲言

曉河沒高棟。斜月半空庭。窻中度落葉。簾外隔飛螢。含情下翠帳。掩泣閉金屏。昔期今未返。春草寒復青。思君無轉易。何異北辰星。

詠早梅

何仲言

按遜為建安王水曹掾王傳正刺揚州可判杜詩疑案揚治建業非廣陵

兔園標物序。驚時最是梅。銜霜當路發。映雪擬寒開。枝橫卻月觀。花繞凌風臺。朝灑長門泣。夕駐臨邛杯。應知早飄落。故逐上春來。

照水聯句

插花行理鬢。遷延去復歸。雖憐水上影。復恐濕羅衣。何遜臨橋看黛色。映渚媚鉛暉。不顧春荷動。

彌畏小禽飛。劉綺



和衛尉新渝侯巡城口號

王元禮

南史蕭暎字文明始興王憺子封新渝侯歷衛尉卿簡文帝庾肩吾同和

閶闔曖已昏。鈞陳杳將暮。棲鳥城上返。晚雀林中度。屯衛時巡警。凝威肆安步。閣道趨文昌。禁兵連武庫。銅烏迎早風。金掌承朝露。杳息分曉色。睥睨生秋霧。維城任寄隆。空想靈均賦。伊余方病免。丘園保恬素。

和皇太子重雲殿受戒

庾子慎

華林園宮苑記曰梁武帝於景陽山次東嶺起通天觀觀前起重閣上曰重雲殿下曰光嚴殿

皇明執東曜。帝宸居北辰。小乘開治道。大覺拯蒼民。殊塗同義路。分流合智津。傳香引上德。列伎進名臣。連閣翻如畫。圖雲更似真。鏡山銜殿影。梅梁落梵塵。苑桂恒留雪。天花不待春。萬年逢瑞應。千生值法身。天衣初拂石。豆火欲燃薪。



重善終無報。輕毛庶有因。

奉和春夜應令

庾子慎

春牖對芳洲。珠簾新上鈎。燒香知夜漏。刻燭驗  
更籌。天禽下北閣。織女入西樓。月皎疑非夜。林  
疎似夏秋。水光懸蕩壁。山翠下添流。詎假西園  
讌。無勞飛蓋遊。

和徐主簿望月

庾子慎

樓上徘徊月。牕中愁思人。照雪光偏冷。臨花色  
轉春。星流時入暈。桂長欲侵輪。願以重光曲。承  
君歌扇塵。

賦得轉歌扇

庾子慎

團紗映似月。蟬翼望如空。迴持掩曲態。轉作送  
聲風。

詠殘燈

紀幼瑒



殘燈猶未滅將盡更揚輝唯餘一兩焰纔得解  
羅衣

侯司空宅詠妓

陰子堅

南史侯安都字武  
佳人徧綺席妙曲動鳴瑟樓似陽臺上池如洛  
水邊鶯啼歌扇後花落舞衫前翠柳將斜日俱

照晚粧鮮

西游咸陽中

陰子堅

阮籍詠懷詩曰西游咸陽中

上林春色滿咸陽遊俠多城斗疑連漢橋星象  
跨河影裏看飛轂塵前聽遠珂還家何意晚無  
處不經過

山齋

徐孝穆



續文選卷五  
桃源驚往客。鶴嶠斷來賓。復有風雲處。蕭條無俗人。山寒微有雪。石路本無塵。竹徑蒙籠巧。茅齋結構新。燒香披道記。懸鏡厭山神。砌水何年溜。簷桐幾度春。雲霞一已絕。寧辨漢將秦。

姬人怨

江攄持

天寒海水慣相知。空牀明月不相宜。庭中芳桂憔悴葉。井上疎桐零落枝。寒燈作花羞夜短。霜鴈多情恒結伴。非爲隴水望秦川。直置思君腸

自斷

擣衣

溫鵬舉

相傳此篇是樂府。然郭左二本通不載。故當入詩爾。

長安城中秋夜長。佳人錦石擣流黃。香杵紋砧知近遠。傳聲遍響何淒涼。七夕長河爛。中秋明月光。蟾蜍塞邊絕。候鴈鴛鴦樓上望。天狼

幽居值春

庾子山



山人久陸沈幽逕忽春臨決渠移水碓開園掃  
竹林欹橋久半斷崩岸始邪侵短歌吹細笛低  
聲泛古琴錢刀不相及耕種且須深長門一紙  
賦何處覓黃金

和趙王看伎

庾子山

綠珠歌扇薄飛燕舞衫長琴曲隨流水簫聲逐  
鳳皇細縷纏鍾格圓花釘鼓牀懸知曲不誤無

事畏周郎

渭濱作

庾子山

樹似新亭岼沙如龍尾灣猶言吟暝浦應有落  
帆還

暮秋野興賦得傾壺酒

庾子山

劉伶正捉酒中散欲彈琴但使逢秋菊何須就  
竹林



塵鏡

庾子山

明鏡如明月恒常置匣中何須照兩鬢終是一  
秋蓬

詠鴈

庾子山

南思洞庭水北想鴈門關稻梁俱可戀飛去復  
飛還

和崔侍中從駕經山寺

蕭仁祖

鈞陳夜警徼河漢曉參橫游騎騰文馬前驅轉  
翠旌野禽喧曙色山樹動秋聲雲表金輪見巖  
端畫栱明塔疑從地涌蓋似積香成泉高下溜  
急松古上枝平儀台多壯思麗藻蔚綠情自嗤  
非照廡何以繼連城

秋思

蕭仁祖

三國典畧曰齊蕭愨為太子洗馬嘗  
於秋夜賦詩其兩句云芙蓉露下落



楊柳月中疎邢子才曰仁祖斯文可謂離章間出類黃門云吾愛其蕭散宛然在耳而盧思道之徒雅所不恆其畢殊好理固宜然

清波收潦日華林鳴籟初芙蓉露下落楊柳月中疎燕帷細綺被趙帶流黃裾相思阻音息結夢感離居

### 賦昆明池一物得織女石

虞茂世

漢書昆池武帝元狩三年所穿昆明池以習水戰

於池之東西以象天河

隔河圖列宿清漢象昭回支機就鯨石拂鏡取池灰船疑海槎渡珠似客星來所恨雙蛾歛逢秋遂不開

雜擬

### 代美女篇

蕭景陽

歌錄曰美女齊瑟行也陳思王有美女篇曰美女妖且閒採桑歧路間

邯鄲暫輟舞巴姬請罷弦佳人淇洧出豔趙復



傾燕繁穠既爲李。照水亦成蓮。朝酤成都酒。暝  
數河間錢。餘光幸未惜。蘭膏空自煎。

擬詠懷詩

庾子山

阮明宗集有詠  
懷詩八十一篇

日晚荒城上。蒼茫餘落暉。都護樓蘭返。將軍疎  
勒歸。馬有風塵氣。人多鬪塞衣。陣雲平不動。秋  
蓬卷欲飛。聞道樓船戰。今年不解圍。

續文選卷之五



續文選卷之六

武原胡震亨孝轅撰

騷

文體前選有今選無者並存元目輕綴私音九懷以下靡追逸步况復系絕章句族散別

集者焉

七

原始七竅方倚風骨故非時賢所屈契勵兩作亦季孟之間

詔

天嘉六年修前代墓詔

疑劉師知所草師知傳云天嘉元年坐事免尋起為中書舍人掌詔誥知六年已在職者其明年改元天康傳云預受顧命也 陳天嘉詔草書錄別為三卷





續文選卷六  
意當時已  
自賞重

梁室多故禍亂相尋兵甲紛紜十年不解不逞  
之徒虐流生氣無賴之屬暴及徂魂江左肇基  
王者攸宅金行水位之主木運火德之君時更  
四代歲逾二百若其經綸王業縉紳民望忠臣  
孝子何世無才而零落丘山變移陵谷咸皆翦  
伐莫不侵殘玉杯得於民間漆簡傳於世載無  
復五株之樹罕見千年之表自大祚光啓恭惟  
揖讓爰暨朕躬聿修祖武雖復旂旗服色猶行

杞宋之邦車駕巡遊眇瞻河雒之路故喬山之  
祀蘋藻弗虧驪山之墳松栢恒守唯戚藩舊壠  
士子故塋掩殫未周樵牧猶衆或親屬流隸負  
土無期子孫冥滅手植何寄漢高留連於無忌  
宋祖惆悵於子房丘墓生哀性靈共惻者也朕  
所以興言永日思慰幽泉維前代王侯自古忠  
烈墳冢被發絕無後者可檢行修治墓中樹木  
勿得樵採庶幽顯咸暢稱朕意焉

勅

前選無釋名曰勅飾也漢制度曰帝之下書  
有四一曰策書二曰制書三曰詔書四曰誡



天平元年被命作答齊神武勅

温鵬舉

高歡擁立魏孝武於洛陽自歸鄴都  
已解斯屈擇帝漸與歡隙封隆之孫  
騰亡奔歡復其謀帝規欲討歡假稱  
將伐句吳且備宇文賀拔歡亦表稱  
勅兵四道伏聽處分仍申信誓云為  
雙律所聞一旦賜疑若負陛下身受  
天殃子孫終絕一二佞臣願量廢  
世命人子昇草勅答之子昇  
遠邇未敢作命僕胡牀  
後則作色不違律爾

前持心血遠以示王深冀彼此共相體悉而不

良之徒坐生間貳近孫騰倉卒向彼致使間者  
疑有異謀故遣御史中尉綦雋且申朕懷今得  
王啓言誓懇惻反覆思之猶所未解以朕眇身  
遇王武略不勞尺刃坐為天子所謂生我者父  
母貴我者高王今若無事背王規相攻討則使  
身及子孫還如王誓皇天后土實聞此言近慮  
宇文為亂賀拔勝應之故纂嚴欲與王俱為聲  
援宇文今日使者相望觀其所為更無異迹賀  
拔在南開拓邊境為國立功念無可責君若欲



分謗何以爲辭東南不賓爲日已久先朝已來  
置之度外今天下戶口減半未宜窮兵極武朕  
旣闇昧不知佞人是誰可列其姓名令朕知也  
如聞庫狄干語王云本欲取懦弱者爲主王無  
事立此長君使其不可駕御今但作十五日行  
自可廢之更立餘者如此議論自是王間勲人  
豈出佞臣之口去歲封隆之背叛今年孫騰逃  
走不罪不送誰不怪王騰旣爲禍始曾無愧懼  
王若事君盡誠何不斬送二首王雖啓圖西去

而四道俱進或欲南度洛陽或欲東臨江左言  
之者猶應自怪聞之者寧能不疑王若守誠不  
貳晏然居北在此雖有百萬之衆終無圖彼之  
心王脫信邪棄義舉旗南指縱無匹馬隻輪猶  
欲奮空拳而爭死朕本寡德王已立之百姓無  
知或謂實可若爲他所圖則彰朕之惡假令還  
爲王殺幽辱壅粉了無遺恨何者王旣以德見  
推以義見舉一朝背德舍義便是過有所歸本  
望君臣一體若合符契不圖今日分疎到此古



語云越人射我笑而道之吾兄射我泣而道之  
朕既親王情如兄弟所以投筆拊膺不覺歔歔  
冊史記卷一百一十五孝經有譽將往則典誥  
事聞罪家再禹之事世不然而子  
令

### 霸府禁奢令

梁武帝

夫在上化下草偃風從世之澆淳恒由此作自

永元失德書契未紀窮凶極悖焉可勝言既而  
璇室外構傾宮內積竒技異服殫所未見上慢  
下暴淫侈競馳國命朝權政移近習販官鬻爵  
賄貨公行並甲第康衢漸臺廣室長袖低昂等  
和戎之賜珍羞百品同伐冰之家愚人因之浸  
以成俗驕豔競爽夸麗相高至乃市井之家貂  
狐在御工商之子緹繡是襲日入之次夜分未  
反昧爽之朝期之清旦聖明肇運厲精惟始雖  
曰纘戎殆同創革且淫費之後繼以興師巨橋



鹿臺凋罄不一孤忝荷大寵務在澄清思所以  
仰述皇朝大帛之旨俯厲微躬鹿裘之義解而  
更張斲雕爲樸自非可以奉粢盛修紱冕習禮  
樂之容繕甲兵之備此外衆費一皆禁絕御府  
中署量宜罷省掖庭備御妾之數大饗絕鄭衛  
之音其中有可以率先卿士准的毗庶菲食薄  
衣請自孤始加羣才竝軌九官咸事若能人務  
退食競存約已移風易俗庶朞月有成昔毛玠  
在朝士大夫不敢靡衣偷食魏武歎曰孤之法  
不如毛尚書孤雖德謝往賢任重先達實望多  
士得其此心外可詳爲條格

### 與湘東王令

### 梁簡文帝

南史王規字威明琅琊臨沂人博涉  
有口辯爲晉安王諮議參軍後爲長  
史王立爲太子仍爲中庶子辭疾居  
鍾山卒皇太子臨哭與湘東王令  
劉子謂中庶子遵也規大同二年卒  
遵先一年卒尺牘清裁世說新語補  
以簡文爲昭明書記洞  
詮以遵爲孝綽均誤

威明昨宵奄復殂化甚可痛傷其風韻適上神



峰標映千里絕迹百尺無枝文辯縱橫才學優  
瞻跌宕之情彌遠濠梁之氣特多斯實俊民也  
一爾過隙永歸長夜金刀掩芒長淮絕澗去歲  
冬中已傷劉子今茲寒孟復悼王生俱往之傷  
信非虛說

答勸進羣下初令

梁元帝

侯景廢簡文帝立豫章嗣王棟尋弒簡文帝時元帝承制江陵尚書令王僧辨等奉表勸進帝奉諱大臨三日帝表不許

孤以不德天降之災枕戈飲膽扣心泣血風樹  
之酷萬始不追霜露之哀百憂總萃甫聞伯升  
之禍彌切仲謀之悲若封豕旣殲長虵卽戮方  
欲追延陵之逸軌繼子臧之高讓豈資秋亭之  
壇安事繁陽之石侯景項籍也蕭棟殷辛也赤  
泉未賞劉邦尚曰漢王白旗弗懸周發猶稱太  
子飛龍之位孰謂可躋附鳳之徒旣聞來議羣  
公卿士其諭孤之志無忽

送葬徐則下書



隋煬帝

隋書隱逸傳曰徐則剡人入天台山絕穀養性隆冬不服絲絮晉王鎮揚州手書召之則詣揚州王請受道法辭以時日不便其後夕死支體柔弱如生王下書送天台定葬是時自江都至天台在道多見則徒步云得放還

天台真隱東海徐先生虛確居宗沖玄成德齊物處外檢行安身草褐蒲衣餐松餌木棲隱靈嶽五十餘年卓矣仙才飄然勝氣千尋萬頃莫測其涯寡人欽承道風久餐德素頗遣使乎遠

此延屈冀得虔受上法式建良緣至止甫爾未淹旬日厭塵羽化反真靈府身體柔軟顏色不變經方所謂屍解地仙者哉誠復師禮未申而心許有在雖忘怛化猶愴於懷喪事所資隨須供給霓裳羽蓋既且騰雲空桴餘衣詎藉墳壠但杖舄猶存示同俗法宜遣使人送還天台定葬

教

招隱逸教



蕭彥達

南史本傳曰天監七年遷荊州刺史  
辟處士韓懷明韓望庾承先郭麻等  
懷明上黨人母病於星下祈禱聞空  
中人語須臾便瘥喪父幾至滅性負  
土成墳贈助無所受望無孝承先字  
子通鄆陵人沈靜有志操玄經釋典  
九流七畧咸所該練隱居士臺山而  
終麻即懷明鄉人與懷明承先俱師  
南陽劉虬

夫鶉火之禽不匿影於丹山昭華之寶乍耀采  
於藍田是以江漢有濯纓之歌空谷著來思之  
詠弘風闡道靡不由茲處士河東韓懷明南平

韓望南郡庾承先河東郭麻並脫落風塵高蹈  
其事兩韓之孝友純深庾郭之形骸枯槁或操  
飯菁羹惟日不足或葭墻艾席樂在其中昔伯  
武貞堅就仕河內史雲孤劭屈志陳留豈曰場  
苗實惟攻玉可加引辟并遣諭意既同魏侯致  
禮之請庶無辟疆三緘之歎

表

南朝策集已軼隋世北朝猶餘刑獄釋李諸  
問若規製通爾脫刀啜藩素應獨苦孝秀

請徵補謝朓何胤表



梁武帝

肱字敬冲陳郡陽夏人齊吳興太守  
胤字子季廬江潯人齊國子祭酒同  
時謝職棲隱永元中徵肱為侍中太  
子少傅胤為散騎常侍太子詹事並  
不屈時東昏皆命迫遣會高祖平京  
邑霸府初開表請補軍諮祭酒並不  
至

夫窮則獨善達以兼濟雖出處之道其揆不同  
用捨惟時賢哲是蹈前新除侍中太子少傅肱  
前新除散騎常侍太子詹事都亭侯胤羽儀世  
胄徽猷冠冕道業德聲康濟雅俗昔居朝列素

無宦情賓客簡通公卿罕預簪紱未禡而風塵  
擺落且文宗儒肆互居其長清規雅裁兼擅其  
美竝達照深識預覩亂萌見庸質之如初知貽  
厥之無寄拂衣東山眇絕塵軌雖解組昌運寔  
避昏時家膺鼎食而甘茲橡艾世襲青紫而安  
此懸鶉自澆風肇扇用南成俗淳流素軌餘烈  
頌存誰其激貪功歸有道康俗振民朝野一致  
雖在江海而勲同魏闕今泰運甫開賤貧為耻  
况乎久蘊瑚璉暫厭承明而可得求志海隅永



追松子臣負荷殊重叅贊萬機寔賴羣才共成  
棟榦思挹清源取鏡止水愚欲屈居僚首朝夕  
諮諏庶足以翼宣寡薄式是王度

爲王僧辨勸進梁元帝初表

沈初明

太清五年十月上 陳書沈炯傳簡  
文遇害四方岳牧皆上表江陵勸進  
僧辨令炯製表其文  
甚工當時莫有逮者

衆軍薄伐塗次九水卽日獲臨城縣使人報稱  
侯景弒逆皇帝賊害太子宗室在寇庭者竝罹

禍酷六軍愾哭三辰改曜 皇極四海崩心

我大梁纂堯構緒基商啓祚太祖文皇帝徇齊  
作聖肇有六州高祖武皇帝聰明神武奄龕天  
下依日月而和四時履至尊而制六合麗正居  
貞大橫固祉四葉相係三聖同基蠢爾凶渠遂  
馮天邑閭闔受白登之辱象魏致堯城之疑雲  
辰承華一朝俱酷金楨玉幹莫不同寃悠悠彼  
蒼何其罔極臣聞喪君有君春秋之茂典以德  
以長先王之通訓少康則牧衆撫職祀夏所以



配天平王則居正東遷宗周所以卜世漢光以  
能捕不道故景歷重昌中宗以不違羣議故江  
東可立儔今考古更無二謀伏惟陛下至孝通  
幽英武靈斷當七九之厄而應千載之期啓殷  
憂之明而居百王之會取威定霸嶮阻艱難建  
社治兵載循古道家國之事一至於斯天祚大  
梁必將有主軒轅得姓存者二人高祖五王代  
實居長乘屈完而陳諸侯拜子武而服大輅功  
齊九有道濟生民非奉聖明誰嗣下武臣聞日

月貞明太陽不可以闕照天地貞觀乾道不可  
以久惕黃屋左纛本爲億兆而尊鸞輅龍章蓋  
以郊禋而貴寶器存乎至重介石慎於易差黔  
首豈可少選無君宗祏豈可一日無主伏願陛  
下掃地升中柴天改物事迫凶危運鍾擾攘蓋  
不勞宗正奉詔博士擇時南面即可居尊西向  
無所讓德四方旣知有奉八百始可同期殘寇  
潛居器藏社處乾象旣傾坤儀已覆斬莽輓車  
燒卓照市廓清函夏正爲瑩陵開雪宮闈庶存



鐘鼎彼黍離離伊何可言陛下繼明闡祚即宮  
舊楚左廟右社之制可以權宜五禮六樂之容  
歲時取備金芝九莖瓊茅三脊要衛率職尉候  
相望坐廟堂以朝四夷登靈臺而望雲物禪梁  
甫而封泰山臨東濱而禮日觀然後與三事大  
夫更謀都鄙左瀍右澗夾維可以爲居抗殿疏  
龍惟王可以在鎬何必勤勤建業也哉臣等不  
勝控款之至謹拜表以聞

第二表

沈初明

太清五年  
十一月上

紫宸曠位赤縣無主百靈聳動萬國回皇雖醉  
醒相扶同歸景亳式歌且誦總赴唐郊猶懼陛  
下俛首潛然讓德不嗣傳車在道方慎宋昌之  
謀法駕已陳尚杜耿純之勸岳牧翹首天民累  
息臣聞星回日薄擊雷鞭電者之謂天岳立川  
流吐霧蒸雲者之謂地苞天地之混成洞陰陽  
之不測而以財成萬物者其在聖人乎故云天



地之大德曰生。聖人之大寶曰位。黃屋廟堂之下，本非獲已。而居明鏡四衢之罇，蓋由應物取訓。伏惟陛下稽古文思，英雄特達，比以周旦則文王之子，方之放勛，則帝摯之季。千年旦暮，可不在斯庭。闕湮亡鐘鼎，淪覆嗣膺景歷，非陛下而誰。豈可使赤眉更立盆子，隗囂託置高廟。陛下方復從容高讓，用執謙光，展其矯行，僞書誣罔。正朔見機，而作斷可識矣。匪疑何卜，無待著龜。日者公卿失馭，禍纏霄極，獯羯憑陵，姦臣互

起。率戎伐，頽無處不然。勸明誅晉側足，皆爾刀斗夜鳴，烽火相照。中朝人士相顧，銜悲涼州。義徒東望，殞涕慄慄，黔首將欲安歸。陛下英略緯天，沈明內斷，橫劔泣血，枕戈嘗膽。農山圯下之策，金匱玉鼎之謀，莫不定算展帷，決勝千里。擊靈鼉之鼓，而建翠華之旗，驅六州之兵，而總九伯之伐。四方雖虞一戰，以霸斬其鯨鯢。旣章大戮，荷校滅耳，莫匪姦回。史不絕書，府無虛月。自洞庭安波，彭蠡底定，文昭武穆，芳若椒蘭。敵國



降城和如親戚九服同謀百道俱進國耻家怨  
計期就雪社稷不墜繫在聖明今也何時而申  
帝啓之避凶危若此方陳泰伯之辭國有具臣  
誰敢奉詔天下者高祖之天下陛下者萬國之  
歡心萬國豈可無君高祖豈可廢祀即日五星  
夜聚八風通吹雲煙紛郁日月光華百官象物  
而動軍政不戒而備飛艦巨艦竟水浮川鐵馬  
銀鞍陵山跨谷英傑接踵忠勇相顧湛宗族以  
酬恩焚妻子以報主莫不覆楯銜威提斧擊衆  
風飛電耀志滅凶醜所待陛下昭告后土虔奉  
上帝廣發明詔師出以名五行夕返六軍曉進  
便當盡司寇之威窮蚩尤之伐執石趙而求璽  
斬姚秦而取鐘脩掃瑩陵奉近宗廟陛下豈得  
不仰存國計俯從民請漢宣嗣位之後卽遣蒲  
類之軍光武登極旣竟始有長安之捷由此言  
之不無前准臣等或世受朝恩或身荷重遇同  
休等戚自國刑家苟有腹心敢以死奪不任悽  
悽之至謹重奉表以聞



第三表

沈初明

太清六年三月僧辯等平侯景傳首江陵復奉表勸進帝尚未從十月四方征鎮王公卿士復勸進表三上乃許之

衆軍以今月戊子總集建康賊景烏伏獸窮頻擊頻挫姦竭詐盡深溝自固臣等分勒武旅百道同趨突騎短兵犀函鐵楯結隊千羣持戟百萬止紂七步圍項三重轟然大潰羣凶四滅京師少長俱稱萬歲長安酒食於此價高九縣雲

開六合清明矧伊黔首誰不載躍伏惟陛下咀痛茹哀嬰憤忍酷自紫庭絳闕胡塵四起壘垣好時冀馬雲屯泣血臨兵嘗膽誓衆而吳楚一家方與七國俱反管蔡流言又以三監作亂西涼義衆阻秦塞而不通并州遺民跨飛狐而見絕豺狼當路非止一人鯨鯢不梟倏焉五載英武克振怨耻並雪永尋霜露伊何可勝臣等輒依故實奉修社廟使者持節分告園陵嗣后升遐龍輻未殞承華掩曜梓宮莫測並即隨由備



辨禮具凶荒四海同哀六軍袒哭聖情孝友理  
當感慟日者百司岳牧仰祈宸鑒以錫珪之功  
既歸有道當璧之禮允屬聖明而優詔謙冲宵  
然凝邈飛龍可躋而乾爻在四帝闢云呬而聞  
闔未開謳歌載馳是用翹首所以越人固執熏  
丹穴以求君周民樂推踰岐山而事主漢王不  
即位無以貴功臣光武止蕭王豈謂紹宗廟黃  
帝迷於襄城尚訪御人之道放勛入於姑射猶  
使罇俎有歸伊此儻來豈聖人所欲帝王所應

不獲已而然伏讀璽書尋諷制旨領懷物外未  
奉慈衷陛下日角龍顏之姿表於狗齊之日彤  
雲素靈之瑞基於應物之初博學則大哉無所  
與名深言則曄乎文章之觀忠爲令德孝實動  
天加以英威茂略雄圖武算指麾則丹浦不戰  
顧眄則阪泉自蕩地維絕而重紐天柱傾而更  
植鑿河津於孟門百川復啓補穹儀以五石萬  
物再生縱陛下拂袵衣而遊廣成登崦山而去  
東土羣臣安得仰訴兆庶何所歸仁况郊祀配



天壘篚禮曠齋宮清廟匏竹不陳仰望鸞輿匪  
朝伊夕瞻言法駕載渴且飢豈可久稽衆議有  
曠曩則舊邦凱復函洛已平高奴櫟陽宮館雖  
毀濁河清渭佳氣猶存臯門有亢其泉四敞土  
圭測景仙人承露斯蓋九州之赤縣六合之樞  
機博士捧圖書而稍還太常定禮儀其已列豈  
得不揚清警而赴名都具玉鑿而旋正寢昔東  
周旣遷鎬京遂其不復長安一亂郊洛永以爲  
居夏后以萬國朝諸侯文王以六州匡天下方

之跡基百里劔杖三尺以殘楚之地抗拒六戎  
一旅之卒翦夷三叛坦然大定御辯東歸解五  
牛於冀州秣六馬於譙郡緬求前古其可得歟  
對揚天命無所讓德有理存焉敢重新奏

經通天臺奏漢武帝表

沈初明

三輔黃圖曰武帝元封二年作其泉  
通天臺去地百餘丈以候天神元鳳  
間自毀陳書沈炯傳曰荊州陷爲  
西魏所虜以母老在東恒思歸國嘗  
獨行經漢武通天臺爲表奏之陳已  
思歸之意其夜夢有官禁之所兵衛



甚嚴便以情事陳訴聞有人言甚不  
惜放卿還幾時可至少日便獲東歸

臣聞橋山雖掩鼎湖之竈可祠有魯遂荒大庭  
之跡無泯伏惟陛下降德猗蘭纂靈豐谷漢道  
既登神仙可望射之杲於海浦禮日觀而稱功  
橫中流於汾河指栢梁而高宴何其甚樂豈不  
然歟既而運屬上僊道窮晏駕甲帳珠簾一朝  
零落茂陵玉盃宛出人間陵雲故基共原田而  
無膺別風餘趾帶陵阜而茫茫羈旅縲臣能不  
落淚昔承明既厭嚴助東歸駟馬可乘長卿西  
反恭聞故實竊有愚心黍稷非馨敢望徼福但  
雀臺之弔空愴魏君雍丘之祠未光夏后瞻仰  
煙霞伏增悽戀

### 陳情表

沈初明

南史沈炯傳炯東歸歷司農御史中丞陳武帝受禪加通直散騎常侍表求歸養詔不許文帝嗣位又表求去詔答曰當勅所由相迎尊累使卿公私無廢也

臣嬰生不幸弱冠而孤母子零丁兄弟相長謹



身爲養仕不擇官承襲朝命偶在亂世冒危履  
險自死輕生妻息誅夷昆季屠滅餘臣母子得  
逢興運臣母妾劉今年八十有一臣叔母妾丘  
七十有五私門弟姪故自無人妾丘兒孫又久  
亡泯兩家侍養餘臣一人前帝知臣之孤煢眷  
臣以州里不欲使頓居草萊又復矜臣溫清所  
以一年之內再三休沐臣之屢披丹款頻冒宸  
鑒非欲苟違朝廷遠離畿輦一者以年將六十  
湯火居心每跪讀家書前懼後喜溫枕扇席無

復成童二者職居彛憲邦之司直若自虧身禮  
何問國章前德綢繆始許哀放內侍近臣多悉  
此旨正以選賢與能廣求明哲赳赳荏苒未始  
取才而上玄降戾奄至今日德音在耳墳土遽  
乾悠悠昊天哀此罔極兼臣私心煎切彌迫近  
時悽悽之祈轉忘塵觸伏惟陛下睿哲聰明嗣  
興下武刑于四海弘此孝理寸管求天仰歸帷  
屢有感必應實望聖明特乞霈然申其私禮則  
王者之德覃及無方矧彼翔沈孰非涵養

云  
云



勸進梁元帝表

徐孝穆

梁書元帝紀曰兼通直散騎常侍聘魏使徐文於蕭奉表

臣聞封唐有聖還承帝嚳之家居代惟賢終纂高皇之祚無爲稱於革鳥至治表於垂衣而撥亂反正非間前古至如金行重作源出東筦炎運猶昌枝分南頓豈得掩顯姓於軒轅非才子於顓頊莫不因時多難俱繼神宗者也伏惟陛下出震等於勛華鳴謙同於旦奭握圖秉鉞將

在御天玉勝珠衡先彰元后神祇所命非惟太室之祥圖畫斯歸何止堯門之瑞若夫大孝聖人之心中庸君子之德固以作訓生民貽風多士一日二日研覽萬機允文允武包羅羣藝擬茲三大賓是四門歷試諸難咸熙庶績斯無間而稱也自無妄爲象鍾禍上京梟獍虔劉宗社蕩墜嶙頭鐵額興暴皇年封豨脩虺行災中國靈心所宅下武其興望紫極而行號瞻丹陵而殞慟家寃將報天賜黃鳥之旗國害宜誅神奉



玄狐之錄尅李軼於河津征陶謙於海岱滕公  
擁樹雄氣方嚴張繡交兵風神彌勇忠誠貫於  
日月孝義感於冰霜如雷如霆非貔非虎前驅  
効命元惡斯殲旣挂膽於西州方燃臍於東市  
蚩尤三塚寧謂嚴誅王莽千刺非云明罰青羗  
赤狄同畀豺狼胡服夷言咸爲京觀邦畿濟濟  
還見隆平宗祀愔愔方承多福自氤氲渾沌之  
世驪連栗陸之君卦起龍圖文因鳥跡雲師火  
帝非無戰陣之風堯誓湯征咸用干戈之道星

躔東井時破滄潼雷震南陽初平尋邑未有援  
三靈之已墜救四海之羣飛赫赫明明龔行天  
罰如當今之盛者也於是卿雲似盖晨映姚鄉  
甘露如珠朝華原寢芝房感德咸出銅池萸莢  
伺辰無勞銀箭重以東漸玄菟西踰白狼高柳  
生風扶桑銜日莫不編名屬國歸質鴻臚荒服  
來賓遐邇同慶其文昭武穆跼葦也如彼天平  
地成功業也如此久應旁求掌故諮詢天官斟  
酌繁昌經營高邑宗王啓霸非勞武德之侯清



躡無虞何事長安之邸揚龍旂以饗帝御鳳宸  
以承天曆數在躬疇與爲讓去月二十日兼散  
騎常侍柳暉等至鄴伏承聖旨謙冲爲而不宰  
或云洛陽未復函谷無泥旋駕金陵方膺天睭  
愚謂大庭少昊非有定居漢祖殷宗皆無恒宅  
登封岱嶽且署明堂巡狩章陵時行司隸何必  
西瞻虎踞乃建王宮南望牛頭方稱天闕抑又  
聞之玄珪旣錫蒼玉無陳乃棫樸之愆期非苞  
茅之不貢雲和之瑟久廢甘泉孤竹之管無聞

方澤豈不懼歟伏願陛下因百姓之心振萬邦  
之命豈可逡巡固讓方求石戶之農高謝君臨  
徒引箕山之客未知上德之不德惟見聖人之  
不仁率土翹瞻蒼生何望昔蘇季張儀違鄉負  
俗尚復招三方以事趙請六國以尊秦况臣等  
顯奉皇華親承朝命珪璋特達通聘河陽貂珥  
雍容尋盟漳水加牢貶館隨世汗隆瞻望鄉關  
誠均休戚但輕生不造命與時乖忝一介之行  
人同三危之遠擯承閒內殿事絕耿弁之恩封



奏邊城私等劉琨之哭不勝區區之至謹拜表以聞

### 爲陳六宮謝表

江惔持

惔持預宴陳宮號爲狎客將由夾坐襃箋寧煩奉金取酒

鶴籥晨啓雀釵曉暎恭承盛典肅荷徽章步動雲袿香飄霧縠媿纏艷粉無情拂鏡愁縈巧黛息意臨牕妾聞漢水贈珠人間絕世洛川拾翠仙處無雙或有風流行雨窈窕初日聲高一笑

價起兩環乃可桂殿迎春蘭房侍寵借班姬之扇未掩驚羞假蔡琰之文寧披悚戴

### 爲晉陽公上玉律秤尺斗升表

庾子山

周代惟李榭封晉陽公自是武帥理絕正樂考周玉升銘曰惟大周保定元年晉國有司修繕倉廩獲古玉升太師晉國公以聞勅納於天府因據之以造律及衡焉晉公宇文護謚蕩陽字疑蕩字之誤

臣某言臣聞三才旣立君臣之道已陳六位時成禮樂之功斯正故以叶和日月測度陰陽悅



豫兆民儀刑萬國者也伏惟皇帝應籙馭天披  
圖受命據太陽而懸象履文昌而建極白環表  
讓德之符玄珪告成功之瑞太階旣平升中可  
襲必當水建千年山稱萬歲伏見勅旨刊正音  
律平章曆象奏黃鍾而歌大呂變孤竹而舞雲  
門莫不器取疎通聲從安樂四分旣明三微是  
定是以聞鐘洛浦卽辨聲乖聽鐸邯鄲先知響  
韻二分二至行於司曆之官九變九成被於和  
樂之職足以動天地感鬼神化被風俗平分寒

暑豈直吟嘯谿谷迴翔鸞鳳而已哉是知零陵  
廟前徒尋舜管始平城下空論周尺臣聞上制  
其禮下習其儀君定其法臣行其事謹造玉律  
一具并玉秤尺斗升合等始得成功至於分粟  
累黍量絲數籥實以仰稟聖規叅詳神思所冀  
節移陰管無勞河內之灰氣動陽鐘不待金門  
之竹而琬琰事輕般倅慮淺不足展采成均增  
耀度量賚器奉表以聞

齊王進白兔表



庾子山

周書齊煬王憲字毗賀突太祖第五子高祖時拜上柱國伐齊為前鋒平鄴多其功焉抱朴子曰兔壽千歲滿五百則色白

臣聞輿圖欲遠則玉虎晨鳴轍迹方開則銀麈入貢伏惟陛下明明在上翼翼居尊德動天關威移地軸是以風煙照燭毛羽禎祥史不絕書府無虛日臣受服元戎用綏邊鄙轅門所屆始次能山前茅慮無乃獲白兔光鮮越雉色麗秦狐月德符徵金精表瑞呈祥輿頌効異披圖尊

敬之迹既明應事之機斯兆臣之龔行實從陝略瑞以素質彌雄西氣庶重承廟算方事申威揜代偃齊分韓裂趙不任鳧藻踊躍之情云云

齊王進赤雀表

庾子山

遁甲注曰赤雀主銜書陽精也

臣某言臣聞南陽雉飛尚論秦霸建章鵠下猶明漢德當今天不愛寶地必呈祥自應長樂觀符文昌啓瑞伏惟皇帝欽明文思劬勞成務曆



象日月允釐百工海水無波天星不動去四月  
十三日獲隴右符府叅軍李暉牒稱戶屬秦州  
清水郡阿陽縣文谷林在家庭獲一赤雀光同  
朱鳳色類丹鳥降火飛精似入公車之府流金  
成製若上凌雲之臺謹按赤雀銜書止於鄠戶  
周之受命興乎此祥即事而觀同符合契實可  
圖形瑞譜書頌儒林事足成臺名堪紀號豈直  
雲中太守見赤心之奉主蓬萊童子知白環之  
報恩臣等預觀休徵情迫恒慶不任鳧藻之至

云

云







續文選卷之七

武原胡震亨孝轅撰

上書

置學奉微為雅整故當稱霸儒林而亦莒文苑

啓

謝勅賚地圖啓

梁昭明太子

漢氏輿地形茲未擬晉代方丈比此非妙匹之  
長樂唯畫古賢儔之未央止圖將帥未有洞該  
八藪混觀六合域中天外指掌可求地角河源



戶庭不出豈問千秋自識烏丸之地脫逢壯武  
方著博物之書

謝勅賜第啓

梁元帝

竊以漢錫五倫寔云清吏魏寵衛臻用旌庸直  
未如靈光輪奐睢陽爽塏北連城闕有似甄侯  
之舍東望市廛榮深豫章之圃昔狼望未平冠  
軍辭宅馬池猶隔雍丘讓邱臣慚霍曹遠志但  
識君命無違再思庸陋九殞非答

謝晉安王賜馬啓

梁元帝

繹武媿仲都遂蒙大驪之錫儒謝春卿空頒名  
馬之賚故以取方麟友自疋龍媒不待景公婉  
如齊畫無勞馬援翻等漢銅豈有滅沒黑龍連  
翩白馬錢文見重津名取貴相彼騏驥猶深戀  
主矧伊伏櫪彌結懷恩

答湘東王啓

劉孝綽



梁書孝子傳為廷尉次幼免官時湘東  
王出鎮荆湘時年十餘書孝子傳答之  
湘東王書畧云君屏居多暇搗屬之  
與益富不少至此已來來諸君待方  
其義惟自厲筆墨之功會何  
時後新有所製想能示之

伏承自薛皇邑爰至荆臺未勞刺舉且摘高麗  
近雖預觀尺錦而不覩全玉昔臨淄詞賦悉與  
楊修未殫寶笥顧慙先哲渚宮舊俗朝衣多故  
李固之薦二邦徐珍之奏七邑威懷之道兼而  
有之當欲使金石流功耻用翰墨垂迹雖乖知  
二偶達聖心爰自退居素里却掃窮閭比楊倫

之不出譬張摯之杜門昔趙卿窮愁肆言得失  
漢臣鬱志廣叙盛衰彼此一時擬非其匹竊以  
文豹何辜以文為罪由此而談又何容易故韜  
翰吮墨多歷寒暑既闕子幼南山之歌又微敬  
通渭水之賦無以自同獻笑少酬褒誘且才乖  
體物不擬作於玄根事殊宿諾寧貽懼於朱亥  
顧已及躬載懷累息但瞻言漢廣邈若天涯區  
區一心分宵九逝殿下降情白屋存問相尋食  
椹懷音矧伊人矣



謝晉安王賜宜城酒啓

劉孝儀

平書本傳晉安王出鎮襄陽引孝儀為安北坊曹史周禮酒正辨五齊之名一曰泛齊郭玄云泛者成而率淨泛泛然如今之宜成醪按宜成馬融聖賢傳以爲酒名非地名然曹植賦張華詩傳玄七九宜以士漢志南郡宜城縣也直城縣南九里志亦云出美

孝儀啓奉教垂賜宜城酒四器歲暮不聊在陰  
即慘惟斯二理抱葦一時少府鬪猴莫能致笑

大夫落雉不足解顏忽值瓶瀉椒芳壺開玉液  
漢樽莫遇殷杯未逢方平醉而遁仙羲和耽而  
廢職仰憑殊塗便申私飲未矚嚙耻已觀憤岸  
傾耳末音不聞霆擊澄神密眠豈覲山高愈疾  
消憂於斯已驗遺榮忽賤即事不欺酪酏之中  
猶知銘荷不任云云

謝東宮賜宅啓

庾子慎

肩吾居異道南才非巷北流寓建春之外寄息



靈臺之下豈望地無湫隘里號乘軒巷轉幡旗  
門容憶蓋况乃交垂五柳若元亮之居夾植雙  
槐似安仁之縣却瞻鍾阜前枕洛橋池通西舍  
之流窻映東鄰之棗來歸高里翻成待封之門  
夜坐書臺非復通燈之壁才下應王禮加温阮  
官成名立無事非恩

謝東宮賚古跡啓

庾子慎

竊以仙巖遺傳入握成塵孔壁藏文隨開已蠹

石書有暗厨畫猶飛豈有跡經四代年踰十紀  
芝英雲氣之巧未損松鈿鵲反鸞驚之勢不侵  
蒲竹必使酒肆來人池流色變將損北海之牘  
還代西河之簡

謝賚梨啓

庾子慎

睢陽東苑子圍三尺新豐箭谷枝懸六斤未有  
生因粉水產自桐丘影連鄧橘林交苑柿遠薦  
中厨爰頒下室事同靈棗有願還年恐似仙桃



無因留核

謝蒙賚朱櫻啓

庾子慎

成叢殿側猶連製賦之條結實西園非復粘蟬  
之樹異合浦之歸來疑藏朱實同秦人之逐彈  
似得金丸

謝滕王賚馬啓

庾子山

周書滕王名道字道周高安文帝子善  
屬文

期欵密情均  
紆契比金蘭

某啓奉教垂賚烏驕馬一匹柳谷未開翻逢紫  
鷲臨源猶遠忽見桃花流電爭光浮雲連影張  
敞畫眉之暇直走章臺王濟飲酒之歡長驅金  
埒謹啓

彈事

彈賈執傳湛文

劉孝儀

梁書孝儀傳大同中遷尚書左丞長  
兼御史中丞在職糾彈無所顧望



賈執傳湛無考彈文初云執湛在王座飲酒文勢正接南康嗣王後云始與齊王蕭毅設醴乖人前王座上或有脫誤始與王擔史云子亮嗣王毅失載疑又是亮子矣准陳書周敷周迪傳毅臨川內史侯景之亂失郡

長兼御史中丞劉孝儀稽首言南康嗣王府行參軍知譜事賈執與前中書舍人傅湛在王座飲酒時上不安人從臺還聖體已和湛乃揚眉瞋目謂執曰卿念天子我不見闕出悖慢言語連及於上共執忿譁湛昔經殺牛誤父自殺近效殘貪賄賂狼藉特逢解網宥其餘命自被棄

廢尤懷怨憤謗訕不遜謹按前兼通事舍人臣傅湛才薄鴛蹇特荷抽擢自預左右頻蹈極刑押對鞠書累逢闕過未聞報效反懷恚憤聖體不安臣下憂懼而湛敢生怨望輕肆慢辭醜爭及父心無愛敬戲語連上罪同悖逆未央馬瘦不覩廐令之忠甘泉道蕪遽見扶風之罪宜其徇乎東市尸彼轂門南康嗣王府參軍臣賈執始聞湛語初無逐雀之心末因私忿遂顯懷鳩之逆雖跡似折奸意由肆憾惡慢於人自彰穢



醜見辱父子已會李倫之辭爭及其父復入梁  
盼之歎是使王嬙悲於連累黑要喜於得用太  
子舍人始興蕃王臣蕭毅幸因社祚爵預藩屏  
而散金失所設醴乖人雍容之賓未遊於雕苑  
號怒之客日醉於雷池致使博徒跣弛慢醉盈  
路覩顏受辱曾無發糾並恕伯厚之心俱鳴路  
粹之責臣等參議請以見事依法免毅所居官  
解執知譜事請議貶黜付之卿論不得廝預官  
流刺尚施行輒不禁止

牋

### 辭南康王牋

#### 王僧孺

梁書南康王績字世謹高祖第四子  
僧孺傳王為南徐州刺史典籤湯道  
愍用事府內僧孺時為長史每裁抑  
之道愍遂謗訟僧孺逮請南司奉牋  
辭府南史曰初武帝問僧孺妾媵  
之數對曰臣室無傾視及在南徐州  
友人以妾寓之行還妾遂  
懷孕為道愍所糾坐免官

下官不能避溺山隅而正冠李下既貽疵辱方  
致徽繩解籙收簪且歸初服竊以董生偉器止



相驕王賈子上才爰傳卑主下官生年有值謬  
仰清塵假翼西雍竊步東閣多慙衺服取亂長  
裾高榻相望直居座右長堦如畫獨在僚端借  
其從容之詞假以寬和之色恩禮遠過申白榮  
望多厠應徐厚德難逢小人易說方謂離腸隕  
首不足以報一言露膽披誠何能以酬屢顧寧  
謂尉羅裁舉微禽先落閭闔始吹細草仍墜一  
辭九畹方去五雲縱天網是漏聖恩可恃亦復  
孰寄心骸何施眉目方當橫潭亂海就魚鼈而

爲羣披榛捫樹從虺蛇而相伍豈復仰聽金聲  
式瞻玉色顧步高軒悲如霰委踟躕下席淚若  
綆縻

奏記

所見王孝籍一篇雖詮辭  
憤率而結送婉得感人

書一

答湘東王求文集及詩苑英華書

梁昭明太子

太子嘗使劉孝綽撰錄文集爲十卷  
隋經籍志曰古今詩英華十九卷梁  
昭明太子撰



得疏知須詩苑英華及諸文製發函伸紙閱覽  
無輟雖事涉烏有義異擬倫而清新卓爾殊爲  
佳作夫文典則累野麗亦傷浮能麗而不浮典  
而不野文質彬彬有君子之致吾嘗欲爲之但  
恨未適耳觀汝諸文殊與意會至於此書彌見  
其美遠兼遠古傍槩典墳學以聚益居焉可賞  
吾少好斯文迄茲無倦譚經之暇斷務之餘陟  
龍樓而靜拱掩鶴關而高臥與其飽食終日寧  
游思於文林或日因春陽景物韶麗樹花發鶯

鳴和春泉生暄風至陶嘉月而嬉遊藉芳草而  
眺矚或朱炎受謝白藏紀時玉露夕流金風時  
扇悟秋士之心登高而遠託或夏條可結倦於  
邑而屬詞冬雪千里覩紛霏而興詠密親離則  
手爲心使昆弟宴則墨以歡露又愛賢之情與  
時而篤冀同市駿庶匪畏龍不追子晉而事似  
洛濱之遊多愧子桓而興同漳川之賞漾舟玄  
圃必集應阮之儔徐輪博望亦招龍淵之侶校  
覈仁義源本山川旨酒盈壘嘉肴溢俎曜靈旣



隱繼之以朗月高春既夕申之以清夜並命連篇在茲彌博又往年因暇搜採英華上下數十年間未易詳悉猶有遺恨而其書已傳雖未爲精覈亦粗足諷覽集乃不工而並作多麗汝既須之皆遣送也某啓

答湘東王和受試詩書

梁簡文帝

梁書庾肩吾傳曰齊永明中王融謝朓沈約文章始用四聲以爲新變至是轉拘聲韻彌尚麗靡踰於往時太子與湘東王書論之

比見京師文體儒鈍殊常競學浮疎爭事闡緩既殊比興正背風騷若夫六典三禮所施則有地吉凶嘉賓用之則有所未聞吟詠情性反擬內則之篇操筆寫志更模酒誥之作遲遲春日翻學歸藏湛湛江水遂同大傳吾既拙於爲文不敢輕有倚據但以當世之作歷方古之才人遠則楊馬曹王近則潘陸顏謝觀其遣辭用心了不相似若以今文爲是則昔賢爲非若以昔賢可稱則今體宜棄俱爲盍各則未之敢許又



時有效謝康樂裴鴻臚文者亦頗有感焉何者  
謝客吐言天拔出於自然時有不拘是其糟粕  
裴氏乃是良史之才了無篇什之美是爲學謝  
則不屆其精華但得其冗長師裴則義絕其所  
長唯得其所短謝故巧不可階裴亦質不宜慕  
故胷馳臆斷之侶好名忘實之類決羽謝生豈  
三千之可及伏膺裴氏懼兩唐之不傳故玉徽  
金銑反爲拙目所嗤巴人下里更合郢中之聽  
陽春高而不和妙聲絕而不尋竟不精討錙銖

覈量文質有異巧心終愧妍手是以握瑜懷玉  
之士瞻鄭邦而知退章甫翠履之人望閩鄉而  
歎息詩旣若此筆又如之徒以煙墨不言受其  
驅染紙札無情任其搖襞甚矣哉文章橫流一  
至於此至如近世謝朓沈約之詩任昉陸倕之  
筆斯實文章之冠冕述作之楷模張士簡之賦  
周升逸之辯亦成佳手難可復遇文章未墜必  
有英絕領袖之者非弟而誰每欲論之無可與  
語思言子建一共商確辨茲清濁使如涇渭論



茲月旦類彼汝南朱白既定雌黃有別使夫懷  
鼠知慙濫竽自恥相思不見我勞如何

與廣信侯書

梁簡文帝

綱白闕絕音旨每用延結風嚴寒勁願比怡和  
伏承淨名法席親承金口辭珍鹿苑理極鸞山

微密秘藏於斯旣隆莊嚴道場自茲彌闡豈止  
心燈夜炳亦乃意蕊晨飛况兄慧思弘明本長  
內教今陪十善之車開八正之路流波若之水  
洗意識之塵以此春翹方爲秋實綱每憶華林  
勝集亦叨末位終朝竟夜沐浴妙言至於席罷  
日餘退休傍省攜手登臨兼展談笑仰望九層  
俯窺百尺金池動月玉樹含風當於此時足稱  
法樂今卷帷之部乘傳一隅聞慧雨滂流喜躍  
充遍徒挹懸河無伸承稟空無所有不瑩情靈



緣癡有愛自嗟難拔兼下車已來義言蓋少舊  
憶已盡新解未餐既乖口誦復非心辨永謝寫  
瓶終慙深艷兄慈雲旣擁智海亦深影末波餘  
希時灑拂但睽違轉積興言盈臉願加亮納言  
不宣心謹白

答新渝侯和詩書

梁簡文帝

垂示三首風雲吐於行間珠玉生於字裏跨躡  
曹左含超潘陸雙鬢向光風流已絕九梁插花

步搖爲古高樓懷怨結眉表色長門下泣破粉  
成痕復有影裏細腰令與真類鏡中好面還將  
畫等此皆性情卓絕親致英奇故知吹簫入秦  
方識來鳳之巧鳴瑟向趙始覩駐雲之曲手持  
口誦喜荷交并也

與蕭臨川書

梁簡文帝

書記洞詮云蕭子顯宗正卿爲臨川  
內史子雲太府卿爲臨川內史未定  
爲何今考中大通二年帝以雍州刺  
史徵爲揚州刺史三年立爲皇太子



子雲則以是年出為臨川內史故書云黑水初旋未申十千之飲桂宮既啓復乖雙闕之宴尚書黑水西河惟雍州漢書孝成皇帝元帝太子也初居桂宮若子顯則先子雲為臨川帝為太子時已歷侍中國子祭酒矣

零雨送秋輕寒迎節江楓曉落林葉初黃登舟已積殊足勞止解維金關定在何日八區內侍厭直御史之廬九棘外府且息官曹之務應分竹南川剖符千里但黑水初旋未申十千之飲桂宮既啓復乖雙闕之宴文雅縱橫即事分阻清夜西園眇然未尅想征艫而結歎望桂席而

霑衿若使弘農書疏脫還鄴下河南口占儻歸鄉里必遲青泥之封且覲朱明之詩白雲在天蒼波無極瞻言歧路眷慨良深愛護波潮敬勗光彩

與劉智藏書

梁元帝

以釋命氏昉晉道安或疑智藏沙門將不有乖劉姓梁有高僧智藏又俗姓顧氏竊詳梁代尚佛帝王士女盛立法名武帝名冠達簡文帝名因理元帝名法車朝士如劉之遴名大喜王筠名慧炬通散出佛書智藏亦斯



例爾 梁平原四劉霽香敵詩並崇  
佛事今書云夢匡山而太息想桓亭  
而延佇按水經注廬陵縣即王莽之  
桓亭則其人當在尋陽豫章之間霽  
等出處理不相及惟彭城劉慧斐傳  
稱其游於匡山有終焉之志因居東  
林寺手寫佛經二千餘卷常所誦百  
餘卷晝夜行道孜孜不怠又云元帝  
及武陵王書問不絕  
歸之斯賢庶愜二證

菩薩蕭法車置郵大士劉智藏侍者自林宗端  
反玄度言歸以結元禮之心彌益真長之歎故  
以臨風望美對月懷賢有勞寤寐無忘興寢方  
今玄冥在節歲聿云邁日似青緹雲浮紅藥清

臺炭重北宮井溢想禪說爲娛稍符九次成誦  
之功轉探三密山間芳杜自有松竹之娛巖穴  
鳴琴非無薜蘿之致修德之暇差足樂也昔韓  
梅兩福求羊二仲鄭林騰名於馮翊周黨傳芳  
於太原或有百鎰可捐千金非貴松子爲餐蒲  
根是服未有高蹈真如歸宗法海梵王四鶴集  
林籟而相鳴帝釋千馬經丘園而跼步有一於  
此猶或稱竒兼而總之何其盛也故知南臨之  
水已類呂梁之川北眺之山彌同武安之嶺豈



復還思淑浦尚想疆臺睠彼漢池載懷荒谷以  
此相求心可知矣僕久厭塵邦本懷人外加以  
服膺常住諷味了因彌用思齊每增求友常欲  
登却月之嶺陰偃蓋之松挹璇玉之源解蓮華  
之劍藩維有限脫屣無由每坐向詡之牀恒思  
管寧之榻夢匡山而太息想桓亭而延佇白雲  
間之蒼江不極未因抵掌我勞如何想無金玉  
數在郵示弱水難航猶致書於青鳥流川弗遠  
佇芳音於赤玉鶴望還信以代萱蘇得志忘言  
此寧多述法車叩頭叩頭

答齊國餉雙馬書

梁元帝

按齊興值梁季歲元帝承制江陵稱  
臣於齊至承聖二年始講敵國交聘  
之禮

名重桂條形圖柳谷襄陽地穴近求未易滇池  
水裏遠訪猶難價疋龍媒聲齊驥子河精曜采  
似伏波之鑄銅震象飛文笑東瀛之刻玉加以  
控斯銀勒利此金銜鞍揭鏤衢光含兩月纏縈



紫縷色麗雙絲方。咄晉后恒乘鄭國之駟。更鄙曹君經餉蜀王之馬。

報伏士標書

徐修仁

三書伏士字士平昌安丘人爲縣令  
善書世不絕事靜時僕射徐  
志以疾去遂宅焚改書以觀其意勉  
之遂出仕  
復覽來書累牘兼翰事苞出處言兼語默事義周悉意致深遠發函伸紙倍增憤歎卿雄州擢

秀弱冠升朝穿綜百家佃漁六學觀眸表其韶  
慧視色見其英朗若魯國之名駒邁雲中之白  
鶴及占顯邑試吏朕壤將有武城弦歌桐鄉謠  
詠豈與卓魯斷斷同年而語邪方當見賞良能  
有加寵授飾茲簪帶寘彼周行而欲遠慕卷舒  
用懷愚智旣知益之爲累爰悟滿則辭多高蹈  
風塵良所欽挹況以金商戒節素秋御序蕭條  
林野無人相樂偃臥墳籍遊浪儒玄物我兼忘  
寵辱誰滯誠乃歡羨用有殊同今逃聽傍求與



懷寤宿白駒空谷。幽人引領貧賤爲耻。鳥獸難  
羣。故當捐此薜蘿。出從鷓鴣。驚無乖隱顯。不亦休  
哉。吾智乏佐時才。慙濟世稟承朝。則不敢荒寧。  
力弱途遙。愧心非一天下有道。堯人何事。得因  
疲病。念從閑逸。若使車書混合。尉候無警。作樂  
制禮。紀石封山。然後乃返。服衡門實爲多幸。但  
夙有風欬。邁茲虛眩。瘠類士安。羸同長孺。簿領  
沈廢。臺閣未理。娛耳爛腸。因事而息。非關欲追  
松子。遠慕留侯。若乃天假之年。自當靖恭所職。  
擬非倫匹。良覺辭費。覽復循環。爽焉如失。清塵  
獨遠。白雲飄蕩。依然何極。猥降書札。示之文翰。  
覽復成誦。流連縟紙。昔仲宣才敏。藉中郎而表  
譽。正平穎悟。賴北海以騰聲。望古料今。吾有慙  
德。儻成卷帙。力爲稱首。無令獨耀。隨掌空使辭  
人。扼腕式問。願見宜事。掃門亦有來思。赴其懸  
榻。輕苔魚網。別當以薦。城闕之歎。曷日無懷。所  
遲萱蘇。書不盡意。

北使還與永豐侯書



### 劉孝儀

周書蕭瑒字智退在梁封永豐侯南史武帝紀大同四年使兼散騎常侍劉孝儀聘於東魏

足踐寒地身犯朔風暮宿客亭晨炊謁舍飄颻  
 辛苦迄屆羶鄉雜種覃化頗慕中國兵傳李緒  
 之法樓擬衛律所治而毳幙難淹酪漿易饜王  
 程有限時及玉關射鹿胡奴乃共歸國刻龍漢  
 節還持入塞馬銜首帶嘶立故墟人獲蒲萄歸  
 種舊里稚子出迎善鄰相勞倦握蟹螯亟覆蝦

椀每取朱顏略多自醉用此終日亦以自娛

### 為衡山侯與婦書

### 何仲言

梁書蕭恭字敬範南平王偉子封衡山縣侯恭嘗笑文士仰眠牀上有屋梁千秋萬歲誰傳此者幸復孔璋之藻若新士會之懷有託留連遺墨快欲借子之示

昔人邀遊洛汭會遇陽臺神仙髣髴有如今別  
 雖帳前微笑涉想猶存而幄裏餘香從風且歇  
 掩屏為疾引領成勞鏡想分鸞琴悲別鶴心如



續文選卷中  
膏火獨夜自煎思等流波終朝不息始知萋萋  
萱草忘憂之言不實團團輕扇合歡之用爲虛  
路邇人遐音塵寂絕一日三秋不足爲喻聊陳  
往翰寧寫欵懷遲枉瓊瑤慰其杼軸

答許亨道書

王君才

陳書許亨字亨道新城人孤介有節  
博通羣書王僧辨以爲太尉從事中  
郎掌書記晉安王承制授給事黃  
門侍郎亨奉牋辭府僧辨答之

省告承有朝授良爲德舉卿操尚惇深文藝該

洽學優而官自致青紫况久羈駿足將成頓轡  
匡輔虛闇期寄實深旣欣遊處用忘勞屈而枳  
棘栖鷓常以增歎夕郎之選雖爲清顯位以才  
升差自無愧且卿始云知命方騁康衢未有執  
戟之疲便深夜行之慨循復來翰殊用憮然古  
人相思千里命駕素心不昧寧限城闔存顧之  
深荒慙無已

爲侯景報齊文襄書

王偉



侯景魏之懷朔鎮人事爾朱榮封濮陽郡公神武帝為魏相誅爾朱氏景以眾降神武仍為所用馭軍嚴整所向多捷搃攬兵權與神武相亞魏以為司徒南道行臺專制河南及神武疾篤謂文襄曰景我死後必不為汝用為書召景景懼及禍舉河南附梁神武薨文襄遣慕容紹宗圍景於長社景復請西魏為援文襄慮景與西南合從方為已患乃以書喻景景答之文襄覽書問為誰作或曰其行臺郎王偉文襄曰偉有才如此何因不知使我

僕鄉曲布衣本乖藝用出身為國繇歷二紀犯危履難豈避風霜遂得富貴當年榮華身世一

旦舉旗旆援鼓枹北面相抗者何哉寔以畏懼危亡恐招禍害故耳往年之暮尊王邁疾神不祐善祈禱莫瘳遂使嬖倖弄權心腹離貳妻子在宅無事見圍及迴歸長社希自陳狀簡書未遣斧鉞已臨旣旌旗相對咫尺不遠飛書每奏冀申鄙情而羣帥恃雄眇然弗顧運戟推鋒專欲屠滅掘圍堰水僅存三版舉目相看命縣漏刻不忍死亡出戰城下拘秦送地豈樂為之但禽獸惡死人倫好生僕實不辜桓莊何罪且尊



王平昔見與比肩勦力同心共獎帝室雖復權勢參差寒暑小異丞相司徒鴈行而已福祿官榮自是天爵勞而後授理不相干欲求吞炭何其謬也然竊人之財猶謂之盜祿去公室抑謂不取今魏德雖衰天命未改拜恩私第何足關言賜噓不能東封函谷受制於人當似教僕賢祭仲而褒季氏無主之國在禮未聞動而不法將何以訓竊以分財養幼事歸令終舍宅存孤誰云隙末復言僕衆不足以自彊身危如累卵

然億兆夷人卒降十亂紂之百克終自無後潁川之戰即是殷監輕重由人非鼎在德苟能忠信雖弱必彊殷憂啓聖處危何苦况今梁道邕熙招攜以禮被我虎文縻之好爵方欲苑五嶽而池四海掃氛穢以拯黎元東羈甌越西通沂隴吳越悍勁帶甲千羣秦兵冀馬控弦十萬大風一振枯幹必摧凝霜暫落秋蒂自殞此而爲弱誰足稱雄又見誣兩端受疑二國斟酌物情一何太甚昔陳平背楚歸漢則彊百里出虞入



秦斯霸蓋昏明由主用舍在人奉禮而行神其吐邪書稱士馬精新剋日齊舉誇張形勢必欲相滅竊以寒膠白露節候乃同秋風揚塵馬首何異徒知北方之力爭未識西南之合從苟欲徇意於前途不覺坑穽在其側去危就安今歸正朔轉禍爲福已脫網羅彼當嗤僕之過迷此亦笑君之晦昧今引二邦揚旌北討熊虎齊奮剋復中原荆襄廣潁已屬關右項城縣瓠亦奉江南幸自取之何勞恩賜然權變非一理有萬

塗爲君計者莫若割地兩和三分鼎峙燕衛趙晉足相俸祿齊曹宋魯悉歸大梁使僕得輸力南朝北敦姻好束帛自行戎車不駕僕立當世之功君卒父禰之業各保疆壘聘享歲時百姓又寧四民安堵孰若驅農夫於壟畝抗勅敵於三方避干戈於首尾當鋒鏑於心腹縱太公爲將不能獲存歸之高明何以克濟來書曰妻子老幼悉在司寇以此見要庶其可反當是見疑褊心未識大趣昔王陵附漢母在不歸太上囚



楚乞羹自若矧伊妻子而可介意脫謂誅之有益欲止不能殺之無損徒復阮戮家累在君何關僕也遵道所說頗亦非虛故重陳辭更論欵曲昔與盟主事等琴瑟讒人間之翻爲讎敵撫弦擲矢不覺傷懷裂帛還書其何能述

### 與兄子秀書

#### 陳暄

南史陳暄嗜酒無節操偏歷王公門沈湎誼誼過差非度其兄子秀常憂之致書於暄友人何胥冀以諷諫暄聞之與秀書

且見汝書與孝典陳吾飲酒過差吾有此好五十餘年昔吳國張長公亦稱耽嗜吾見張時伊已六十自言引滿大勝少年時吾今所進亦多於往日老而彌篤唯吾與張季舒耳吾方與此子交歡於地下汝欲笑吾所志邪昔阮咸阮籍同遊竹林宣子不聞斯言王湛能玄言巧騎武子呼爲癡叔何陳留之風不嗣太原之氣巋然翻成可怪吾旣寂漠當世朽病殘年產不異於顏原名未動於卿相若不日飲醇酒復欲安歸



汝以飲酒爲非吾不以飲酒爲過昔周伯仁度江唯三日醒吾不以爲少鄭康成一飲三百杯吾不以爲多然洪醉之後有得有失成廝養之志是其得也使次公之狂是其失也吾常譬酒之猶水亦可以濟舟亦可以覆舟故江諮議有言酒猶兵也兵可千日而不用不可一日而不備酒可千日而不飲不可一飲而不醉美哉江公可與共論酒矣汝驚吾墮馬侍中之門陷池武陵之第徧布朝野自言焦棟丘也幸苟有過

人必知之吾生平所願身受之復夏子長之故酒徒陳君之神道若斯復賈誼之慟哭者哉何水不離瓢杓汝寧與何同日而醒與吾同日而醉乎政言其醒可及其醉不可及也速營糟丘吾將老焉爾無多言非爾所及

續文選

卷中  
四冊



汝以飲酒爲非吾不以飲酒爲過昔周伯仁度江唯三日醒吾不以爲少鄭康成一飲三百杯吾不以爲多然洪醉之後有得有失成廝養之志是其得也使次公之狂是其失也吾常譬酒之猶水亦可以濟舟亦可以覆舟故江諮議有言酒猶兵也兵可千日而不用不可一日而不備酒可千日而不飲不可一飲而不醉美哉江公可與共論酒矣汝驚吾墮馬侍中之門陷池武陵之第徧布朝野自言焦棟丘也幸苟有過人必知之吾生平所願身沒之後題吾墓云陳故酒徒陳君之神道若斯志意豈避南征之不復賈誼之慟哭者哉何水曹眼不識孟鑑吾口不離瓢杓汝寧與何同日而醒與吾同日而醉乎政言其醒可及其醉不可及也速營糟丘吾將老焉爾無多言非爾所及



續文選卷之七

國家圖書館, NATIONAL CENTRAL LIBRARY, TAIWAN, R.O.C



續文選卷之八

武原胡震亨孝轅撰

書二

與詹事江揔書

陳後主

陳書陸瑜傳瑜字幹玉吳郡人少篤學美詞藻後主在東宮瑜爲學士以才學娛侍左右後兼管記遷太子洗馬中舍人卒太子爲之流涕親製祭文仍與詹事江揔書論述其美詞甚傷切

管記陸瑜奄然殂化悲傷悼惜此情何已吾生





平愛好卿等所悉自以學涉儒雅不逮古人欽  
賢慕士是情尤篤梁室亂離天下糜沸書史殘  
缺禮樂崩淪晚生後學匪無墻面卓爾出羣斯  
人而已吾識覽雖局未曾以言議假人至於片  
善小才特用嗟賞况復洪識竒士此故忘言之  
地論其博綜子史諳究儒墨經耳無遺觸目成  
誦一褒一貶一激一揚語玄析理披文摘句未  
嘗不聞者心伏聽者解頤會意相得自以爲布  
衣之賞吾監撫之暇事隙之辰頗用譚笑娛情

琴樽間作雅篇豔什迭互鋒起每清風朗月美  
景良辰對羣山之叅差望巨波之滉漾或翫新  
花時觀落葉旣聽春鳥又聆秋鴈未嘗不促膝  
舉觴連情發藻且代琢磨間以嘲謔俱怡耳目  
並留情致自謂百年爲速朝露可傷豈謂玉折  
蘭摧遽從短運爲悲爲恨當復何言遺迹餘文  
觸目增泫絕絃投筆恒有酸恨以卿同志聊復  
叙懷涕之無從言不寫意

在北齊與楊僕射書



徐孝穆

北齊書楊愔字遵彥弘農華陰人天保中爲尚書右僕射 太清二年徐陵副謝琨奉使於魏本朝隨有侯景之亂會齊受魏禪梁元承制江陵復通使於齊陵累求復命終拘留不遣乃致書僕射楊愔乞歸愔竟不報書及江陵陷齊送貞陽侯蕭淵明爲梁嗣遣陵隨還

陵叩頭叩頭夫一言所感凝暉照於魯陽一志冥通飛泉涌於疏勒况復元首康哉股肱良哉隣國相聞風教相期者也天道窮剝鍾亂本朝情計馳惶公私哽懼而骸骨之請徒淹歲寒顛

沛之祈空盈卷軸是所不圖也非所仰望也執事不聞之乎昔分鼇命鴈之世觀河拜洛之年則有日烏流災風禽騁暴天傾西北地缺東南盛旱圻三川長波含五嶽我大梁應金圖而有亢纂玉鏡而猶屯何則聖人不能爲時斯固窮通之恒理也至如荊州刺史湘東王機神之本無寄名言陶鑄之餘猶爲堯舜雖復六代之舞陳於總章九州之歌登於司樂虞夔拊石晉曠調鐘未足頌此英聲無以宣其盛德者也若使



郊禋楚翼寧非祀夏之君戡定艱難便是匡周  
之霸豈徒幽王徙雍朞月爲都姚帝遷河周年  
成邑方今越裳藐藐馴雉北飛肅春茫茫風牛  
南偃吾君之子含識知歸而答旨云何所投身  
斯其未喻一也又晉熙等郡皆入貴朝去我潯  
陽經塗何幾至於鐺鐺曉漏的的宵烽隔淞浦  
而相聞臨高臺而可望泉流寶盃遙憶湓城峰  
號香鑪依然廬嶽日者鄱陽嗣王治兵匯派屯  
戍淪波朝夕牋書春秋方物吾無從以躡屣彼

何路而齊鑣豈其然乎斯不然矣又近者邵陵  
王通和此國郢中上客雲聚魏都鄴下名卿風  
馳江浦豈盧龍之徑於彼新開銅駝之街於我  
長閉何彼途甚易非勞於五丁我路爲難如登  
於九折地不私載何其爽歟而答旨云還路無  
從斯所未喻二也晉熙廬江義陽安陸皆云歟  
附非復危邦計彼中途便當靜晏自斯以北桴  
鼓不鳴自此以南封疆未壹如其境外脫殞輕  
軀幸非邊吏之羞何在匹夫之命又此段賓遊



通無貨殖。忝非韓起。聘鄭私買玉環。吳札過徐。躬要寶劍。由來宴錫。凡厥囊裝。行役淹留。皆已虛罄。散有限之微財。供無期之久客。斯可知矣。且據圖刎首。愚者不爲。運斧全身。庸流所鑒。何則。生輕一髮。自重千鈞。不以賈盜明矣。骨肉不任。充鼎俎。皮毛不足。入貨財。盜有道焉。吾無憂矣。又公家遣使。脫有資須。本朝非隆平之時。遊客豈皇華之勢。輕裝獨宿。非勞聚橐之儀。微騎閒行。寧望輜軒之禮。歸人將從。私具驢騾。緣道

亭郵。唯希蔬粟。若曰留之。無煩於執事。遣之。有費於官司。或以顛沛爲言。或云資裝可懼。因非通論。皆是外篇。斯所未喻。三也。又若以吾徒應還侯景。侯景凶逆。殲我國家。天下含靈。人懷憤厲。旣不獲投身社稷。衛難乘輿。四冢磔蚩尤。千刀剗王莽。安所謂俛首頓膝。歸奉寇讎。佩弭腰鞬。爲其阜隸。日者通和。方敦曩睦。凶人狙詐。遂駭狼心。頗疑宋萬之誅。彌懼荀瑩之請。所以奔蹄勁角。專恣憑陵。凡我行人。偏膺讎憾。政復菹



筋醢骨抽舌探肝於彼凶情猶當未雪海內之  
所知也君侯之所具焉又聞本朝王公都人士  
女風行雨散東播西流京邑丘墟薏蓬蕭瑟偃  
師還望咸爲草萊霸陵回首俱沾霜露此又君  
之所知也彼以何義爭免寇讎我以何親爭歸  
委質昔鉅平貴將懸重於陸公叔向名流深知  
於醜箴吾雖不敏常慕前修不圖明庶有懷翻  
其以此量物昔魏氏將亡羣凶挺爭諸賢勦力  
想得其朋爲葛榮之黨邪爲邢杲之徒邪如曰

不然斯所未喻四也假使吾徒還爲凶黨侯景  
生於趙代家自幽恒居則台司行爲連率山川  
形勢軍國彛章不勞請箸爲籌便當屈指能算  
重以逋逃小醜羊豕同羣身寓江臯家留河朔  
春春井井如鬼如神其不然乎抑又君之所知  
也且夫宮闈祕事竝若雲霄英俊訐謨寧非帷  
幄或陽驚以定策或焚藁而奏書朝廷之士猶  
難參預羈旅之人何階耳目至於禮樂沿革刑  
政寬猛則謳歌已遠萬舞成風不知手之舞之



足之蹈之也。安在搖其牙齒爲間諜者哉。若謂復命西朝終奔東虜。雖齊梁有隔。尉候奚殊。豈以河曲之難淨而曰江關之可濟。河橋馬度。寧非宋典之姦。關路雞鳴。皆曰田文之客。何其通蔽。乃爾相妨。斯所未喻五也。又兵交使在。雖著前經。儻同狗僕之尤。追肆寒山之怒。則凡諸元帥。竝釋縲囚。爰及偏裨。同無翦馘。乃至鍾儀。見赦。朋笑遵途。襄老蒙歸。虞歌引路。吾等張旌。拭玉修好。尋盟步泗之與。浮河郊勞。至於贈賄。公

恩旣被。賓敬無違。今者何憊。翻蒙貶責。若以此爲言。斯所未喻六也。若曰祆氛永久。喪亂悠然。哀我奔波。存其形魄。固已銘茲厚德。戴此洪恩。譬渤海而俱深。方嵩華而猶重。但山梁飲啄。非有意於籠樊。江海飛浮。本無情於鐘鼓。况吾等營魂已謝。餘息空留。悲默爲生。何能支久。是則雖蒙養護。更天天年。若以此爲言。斯所未喻七也。若云逆豎殲夷。當聽反命。高軒繼路。飛蓋相隨。未解其言。何能善謔。夫屯亨治亂。豈有意於



前期謝常侍今年五十有一吾今年四十有四  
介已知命賓又杖鄉計彼侯生肩隨而已豈銀  
臺之要彼未從師金竈之方吾知其訣政恐南  
陽菊水竟不延齡東海桑田無由佇望若以此  
爲言斯所未喻八也足下清襟勝託書園文林  
凡自洪荒終乎幽厲如吾今日寧有其人爰至  
春秋微宜商略夫宗姬殄墜霸道昏凶或執政  
之多門或陪臣之涼德故臧孫有禮翻囚與國  
之賓周伯無憊空怒天王之使遷箕卿於兩館

繫驥子於三年斯匪貪亂之風邪寧當今之高  
例也至於雙嶠且帝四海爭雄或構趙而侵燕  
或連韓而謀魏身求盟於楚殿躬奪璧於秦庭  
輸寶鼎以託齊王馳安車而誘梁客其外膏脣  
販舌分路揚鑣無罪無辜如兄如弟逮乎中陽  
受命天下同規巡省諸華無聞幽辱及三方之  
霸也孫甘言以媵媚曹屈詐以羈縻於軫歲到  
於句吳冠蓋年馳於庸蜀則客嘲殊險賓戲已  
深共盡遊談誰云猜忤若使搜求故實脫有前



蹤恐是叔世之姦謀而非爲邦之勝略也抑又  
聞之雲師火帝澆淳乃異其風龍躍麟驚王霸  
雖殊其道莫不崇君親以詔物敦敬養以治民  
預有邦司曾無隆替吾奉違溫清仍屬亂離寇  
虜猖狂公私播越蕭軒靡御王舫誰持瞻望鄉  
關何心天地自非生憑廩竹源出空桑行路含  
情猶其相愍常謂擇官而仕非曰孝家擇事而  
趨非云忠國况乎欽承有道驂駕前王郎吏明  
經鳴鳶知禮巡方省化咸問高年東序西膠皆

尊者耆吾以圭璋玉帛通聘來朝屬世道之屯  
期鍾生民之否運兼年累載無申元直之祈銜  
泣吞聲長對公問之怒情禮之訴將同逆鱗忠  
孝之言皆應齟舌是所不圖也非所仰望也且  
天倫之愛何得忘懷妻子之情誰能無累夫以  
清河公主之貴餘姚書佐之家莫限高卑皆被  
驅略自東南醜虜抄販飢民臺署郎官俱餒墻  
壁况吾生離死別多歷暄寒孀室嬰兒何可言  
念如得身還鄉土躬自推求猶冀提攜俱免凶



虐夫四聰不達華陽君所謂亂臣百姓無冤孫  
叔敖稱爲良相足下高才重譽參贊經綸非虎  
非豹聞詩聞禮而中朝大議曾未矜論清禁嘉  
謨安能相及諤諤非周舍容容類胡廣何其無  
諍臣哉歲月如流平生何幾晨看旅鴈心赴江  
淮昏望牽牛情馳揚越朝干悲而掩泣夜萬緒  
而回腸不自知其爲生不自知其爲死也足下  
素挺詞鋒兼長理窟匡丞相解頤之說樂令君  
清耳之談向所諮疑誰能曉諭若鄙言爲戮來

旨必通分請灰釘并從斧鑊何但規規默默齟  
舌低頭而已哉若一理存焉猶希矜眷何必期  
令我等必死齊都足趙魏之黃塵加幽并之片  
骨遂使東平拱樹長懷向漢之悲西洛孤墳恒  
表思鄉之夢干祈以屢哽慟增深徐陵叩頭再  
拜

答周處士書

徐孝穆

時孝穆爲吏部尚書處士周弘讓書  
薦趙郡方圓年過強仕不慕時榮文



史足用學藝優敏中歲暫遊宛洛蒙  
弟識異其人今同在巖壑脫能登此  
仄陋則山谷咸  
勸孝穆答之

辱去年三月二十七日告仰披華翰甚慰翹結  
承歸來天目得肆閒居差有弄玉之俱仙非無  
孟光之同隱優游俯仰極素女之經文升降盈  
虛盡軒皇之圖藝雖復考槃在阿不爲獨宿詎  
勞金液唯飲玉泉比夫煮石紛紜終年不爛燒  
丹辛苦至老方成及其得道冥真何勞逸之相  
懸也又承有方生亦在天目理當仰稟明師終

斯秘要豈如張陵弟子自墜高巖孫泰門人競  
投滄海何其樂乎聖朝虚心版築尚想丘園若  
彼能赴嘉招便當謹申高命但其人往歲亦望  
至京師觀此風神確乎難拔故以忘懷爵祿詎  
持犧牲之談高視公卿獨騁蜡鯨之訓所恐有  
道三辟公車十徵若斯者終當不屈此旣然矣  
請復詳言昔楚國兩龔同時紆組漢陰二老相  
攜抱甕兄之幽貞若其鑿坏負石方同形影結  
綬彈冠無容越楚况乎糞土夔龍羶臊名器已



所不欲非應及人忽承來音良以多感何則頴陽巢父不曾令薦許由商洛園公未聞求徵綺季斯所未喻高懷而躊躇於矛楯也唯遲山阿近信更惠芳音如或誠言謹便聞奏第夙勞比劇不復多呈徐君白

### 與李那書

#### 徐孝穆

那周人爵里無考周武帝遣治御正殷不害等使陳孝穆從不害見那重陽閣詩荆州宜陽碑文因與那書知書中殷儀同即不害以那答書稱殷

御正按那失撰別集碑文不傳其重陽閣詩云銜悲向玉關垂淚上瑤臺舞閣懸新網歌梁積故埃紫庭生綠草丹墀染碧苔金扉畫常掩珠簾夜暗開方池含水思芳樹結風哀行雨歸將絕朝雲去不迴獨有西陵上松聲薄暮來書所云一詠歌梁之言是也閣周明帝所建武成二年落成帝是年即崩故詩云云殷使陳即其明年文苑英華誤作重適陽關詩詩紀因之復竄入隋代遂轉不可曉

籍甚清徽常懷虛眷山川緬邈河渭像於經星顧望風流長安遠於朝日青女戒節白露爲霜君子惟宜福履多豫雍容廊廟獻納便蕃留使



催書駐馬成檄車騎將軍賓客盈座丞相長史  
瞻對有勞脫惠箋繒慰其翹想吾栖遲茂陵之  
下臥病漳水之濱迫以崦嵫難爲砭藥平生壯  
意竊愛篇章忽覲高文載懷勞佇此後殷儀同  
至止王人授館用阻班荆常在公筵敬析名作  
獲殷公所借陪駕終南入重陽閣詩及荊州大  
乘寺宜陽石像碑四首鏗鏘並奏能驚趙鞅之  
魂輝煥相華時瞬安豐之眼山澤晡霽松竹參  
差若見三峻之峰依然四皓之廟甘泉鹵簿盡

在清文扶風輦路悉陳華簡昔魏武虛帳韓王  
故臺自古文人皆爲詞賦未有登茲舊閣歎此  
幽宮標句清新發言哀斷豈止悲聞帝瑟泣望  
羊碑一詠歌梁之言便掩盈懷之淚至如披文  
相質意致縱橫才壯風雲義深淵海方今二乘  
斯悟同免化城六道知歸皆踰火宅宜陽之作  
特會幽衿所覩黃絹之詞彌懷白雲之頌但恨  
耆闍遠嶽檀特高峰開士羅浮康公懸溜不獲  
銘茲雅頌耀彼幽巖循環省覽用忘饑渴握之



不置恒如趙璧翫之不足同於玉枕京師長者  
好事才人爭造蓬門請觀高製軒車滿路如看  
太學之碑街巷相填無異華陰之市但豐城兩  
劍尚不俱來韓子雙環必希皆見莫以好龍無  
別木鴈可啣載望瓊瑤因之行李金風已勁玉  
質宜調書不盡言但聞爰繫徐陵頓首

爲王寬與婦義安主書

伏知道

陳書王固傳子寬官至司徒  
左長史侍中義安主無考

首魚嶺逢車芝田息駕雖見妖姪終成揮忽遂  
使家勝陽臺爲歡非夢人慙蕭史相偶成仙輕  
扇初開欣看笑靨長眉始畫愁對離粧猶聞徙  
佩顧長廊之未盡尚分行憶冀迥陌之難迴廣  
攝金屏莫令愁擁恒開錦幔速望人歸鏡臺新  
去應餘落粉熏爐未徙定有餘煙淚滴芳衾錦  
花長濕愁隨玉軫琴鶴恒驚已覺錦水丹鱗素  
書稀遠玉山青鳥仙使難通綵筆試操香牋遂  
滿行雲可託夢想還勞九重千日詎想倡家單



枕一宵便如蕩子當令照影雙來一鸞羞鏡勿  
使窺牕獨坐嫦娥笑人

與周處士書

王子淵

周書王褒傳江陵平褒至長安授車  
騎大將軍又曰初褒與梁處士周弘  
讓相善及弘讓兄弘正自陳來聘高  
祖許通親知音問褒贈弘讓詩并致  
書弘讓  
復之

嗣宗窮途楊朱歧路征蓬長逝流水不歸舒慘  
殊方炎涼異節木皮春厚桂樹冬榮想攝衛惟

宜動靜多豫賢兄入關敬承欵曲猶依杜陵之  
水尚保池陽之田鏟迹幽蹊銷聲穹谷何其愉  
樂幸甚幸甚弟昔因多疾亟覽九仙之方晚涉  
世途常懷五嶽之舉同夫關令物色異人譬彼  
客卿服膺高士上經說道屢聽玄牝之談中藥  
養神每稟丹砂之說頃年事道盡容髮衰謝芸  
其黃矣零落無時還念生涯繁憂總集視陰愒  
日猶趙孟之徂年負杖行吟同劉琨之積慘河  
陽北臨空思鞏縣霸陵南望還見長安所冀書



續文選卷八  
生之魂來依舊壤射聲之鬼無恨他鄉白雲在  
天長離別矣會見之期邈無日矣援筆攬紙龍  
鍾橫集

復王少保書

周弘讓

甚矣悲哉此之爲別也雲飛泥沉金鑠蘭滅玉  
音不嗣瑤華莫因家兄至自鎬京致來書於窮  
谷故人之跡有如對面開題申紙流臉沾膝江  
南燠熱橘柚冬青渭北沍寒楊榆晚葉土風氣

候各集所安餐衛適時寢興多福甚善甚善與  
弟分袂西陝言反東區雖保周陂還依蔣徑三  
荆離析二仲不歸麋鹿爲曹更多悲緒丹經在  
握貧病莫諧芝朮可求聊因采掇昔吾壯日及  
弟富年俱值邕熙竝歡衡泌南風雅操清商妙  
曲絃琴促坐無乏夕晨玉瀝金華冀獲難老不  
虞一旦翻覆波瀾吾已惴陰弟非茂齒禽尚之  
契各在天涯永念生平難爲胸臆正當視陰數  
箭排愁破涕人生樂耳憂戚何爲豈能遽悲次



房遊魂不反。遠傷金產。骸柩無託。但願愛玉體。珍金相保。期願享黃髮。猶冀蒼鴈。頰鯉時傳尺素。清風朗月。俱寄相思。子淵子淵。長爲別矣。握管操觚。聲淚俱咽。

遺史祥書

隋煬帝

隋書史祥傳曰祥字世休朔方人以行軍總管從晉王擊突厥於靈武破之遷右衛將軍仁壽中屯弘化備胡王時在東宮遺祥書

將軍總戎塞表。胡虜清塵。秣馬休兵。猶事校獵。

足使李廣慙勇。魏尚媿能。冠彼二賢。獨在吾子。昔余監舉。推轂治兵。振皇靈於塞外。驅犬羊乎大漠。於時同行軍旅。契闊戎旃。望龍城而衝冠。眄狼居而發憤。將軍英圖不世。猛氣無前。但物不遂。心僂俛從事。每一思此。我勞如何。將軍宿心素志。早同膠漆。久而敬之。方成魚水。近者陪隨鑾駕。言旋上京。本即述職南蕃。宣條下國。不悟皇鑒。曲發備位。少陽戰戰。兢兢如臨。冰谷至如建節。邊境征伐。四方塞帷。作牧綏撫。百姓上



稟成規下盡臣節是所願也是所甘心仰慕前  
修庶得自效謬其入守神器元良萬國身輕負  
重何以克堪所望故人匡其不逮比監國多暇  
養疾閑宮厭北閣之端居罷南皮之馳射博望  
之苑旣乏名賢飛蓋之園理乖終宴親朋遠矣  
琴書寂然想望吾賢疾如疾首

### 召王貞書

### 楊世肅

隋書文學傳曰王貞字孝逸陳留人善屬文不事產業每以諷讀爲娛樂

秀才授縣尉謝病於家齊王暕鎮江都聞其名各以書召之及至待以客禮

夫山藏美玉光照廊廡之間地蘊神劍氣浮星  
漢之表是知毛遂穎脫義感平原孫慧文詞來  
于東海顧循寡薄有懷髦彥籍甚清風爲日久  
矣未獲披覲良深佇遲比高天流火早應涼飈  
凌雲僊掌方承清露想攝衛攸宜與時休適前  
園後園從容丘壑之情左琴右書蕭散烟霞之  
外茂陵謝病非無封禪之文彭澤遺榮差有歸  
來之作優游儒雅何樂如之屬當藩屏宣條揚



越坐棠聽訟事絕詠歌攀桂摘詞眷言高遁至  
於揚旌北渚飛蓋西園託乘乏應劉置醴闕申  
穆背淮之賓徒聞其語趨燕之客罕值其人卿  
道冠鷹揚聲高鳳舉儒墨淵海詞章苑囿栖遲  
衡泌懷賣迷邛狗茲獨善良以於悒今遣行人  
具宣徃意仰聖予甚於饑渴想便輕舉副此  
虛心無信石之談空慕鑿坏之逸書不盡言  
更慙詞費

與陳徐僕射求王琳首書

朱瑒

北齊書王琳傳琳字子珩會稽山陰  
人事梁元帝以軍功封建寧縣侯歷  
督廣元帝以侍中司空徵不從命討之  
不克帝受梁禪琳請齊納梁永嘉  
王琳刺史鎮壽陽又進封巴陵郡  
王陳勳吳明徹圍琳城陷彼後傳首  
建康懸之於市故吏梁驃騎府倉曹  
參軍朱瑒致書陳尚書僕射徐陵求  
琳首修葬陵嘉其志節又明徹亦數  
夢琳求首並為啓陳主而許之瑒持  
首還淮南權瘞八公山側問道北歸  
別議迎接時有揚州人茅智勝等五  
人密送葬  
柩達於鄴



竊以朝市遷貿傳骨鯁之風歷運推移表忠貞  
之跡故典午將滅徐廣爲晉家遺老當塗已謝  
馬孚稱魏室忠臣用能播美前書垂名後世梁  
故建寧公琳洛濱餘胄沂州舊族立功代邸効  
績中朝首離亂之辰總方伯之任輕躬殉主以  
身許國身許國尚思匡繼徒蘊包胥之念  
終通萇弘終通萇弘青汜青汜業光啓鼎祚有歸於是遠  
跡山東寄命河北雖輕旅臣之歎猶懷客卿之  
禮感茲知己忘此捐軀至使身沒九泉頭行萬

里誠復馬革裹屍遂其生平之志原野暴骸會  
彼人臣之節然身首異處有足悲者封樹靡卜  
良可愴焉良可愴焉勿早落勿早落僚預叅下席降薛君之吐  
握蒿握蒿用霑巾雨袂痛可識之顏用霑巾雨袂痛可識之顏  
回腸疾回腸疾猶生之面伏惟聖恩博厚明詔爰  
發赦王經之哭許田橫之葬塲雖芻賤竊亦有  
心琳經蒞壽陽頗存遺愛曾遊江右非無餘德  
比肩東閣之吏繼踵西園之賓願歸彼境還修  
窀穸孤墳旣築或飛銜土之燕豐碑式樹時



續文選卷八  
留墮淚之人。近故舊王綰等。已有論牒。仰蒙制  
議。不遂所陳。昔廉公告逝。即淝川而建瑩域。孫  
叔云。亡仍芍陂。而植楸櫟。由此言之。抑有其例。  
不使壽考。下城下。惟傳報葛之人。滄州島上。獨有  
悲田之。名味。拜。祈伏待刑憲。

續文選卷之八



續文選卷之九

武原胡震亨孝轅撰

檄

討侯景檄文

梁元帝

太清元年東魏司徒侯景以河南十  
三州內屬武帝封為河南王二年帝  
與東魏結和景懼舉兵反臨賀王正  
德率眾附之進攻都城三年與景為  
城下之盟時勤王之師畢集元帝次  
武成未進有勅班師景違盟攻圍益  
急城陷帝以憂憤崩景悉兵西上元  
帝遣王僧辨先後禽其將任約宋子



國家圖書館, NATIONAL CENTRAL LIBRARY, TAIWAN, R.O.C.



仙等景遁歸弒簡文并害諸王子尋  
僭大號六年二月王僧辨眾軍討景  
發自尋陽元帝馳檄告四方 湘東  
法曹參軍蕭賁好學有文才讀檄至  
偃師南望曰語曰如體日朝廷非關  
序賊帝收付獄遂以俄終更著懷舊  
傳謗之

夫剝極生災乃及龍戰師貞終吉方制豮豕豈  
不以侵陽蕩薄源之者亂階定龕艱難成之者  
忠義故昇澆滅於前莽卓誅於後是故使桓文  
之勲復興於周代溫陶之績彌盛於金行粵若  
梁興五十餘載平壹寓內德惠悠長仁育羣生

義征不服左伊右瀍咸皆仰化濁涇清渭靡不  
向風建翠鳳之旗則六龍驤首擊靈鼉之鼓則  
百神警肅風牧方邵之賢衛霍辛趙之將羽林  
黃頭之士虎賁緹騎之夫叱咤則風雲興起鼓  
動則嵩華倒拔自桐柏以北孤竹以南碣石之  
前流沙之後延頸舉踵交臂屈膝胡人不敢牧  
馬秦士不敢彎弓叶和萬邦平章百姓十堯九  
舜曷足云也賊臣侯景匈奴叛臣鳴鏑餘噍懸  
瓠空城本非國寶壽春畿要賞不踰月開海陵



之倉賑常平之米檄九府之費錫三官之錢冒  
干貨賄不知紀極敢興逆亂梗我王畿賊臣正  
德阻兵安忍日者結怨江芊遠適單于簡牘屢  
彰彭生之魂未弭聚斂無度景卿之誚已及爲  
虎傅翼遠相招致虔劉我人民離散我兄弟我  
是以董率臯貌躬擐甲冑霜戈照日則晨離奪  
暉龍騎蔽野則平原掩色信與江水同流氣與  
寒風俱憤凶醜畏威委命下吏乞活淮肥苟存  
徐交換汗旣行絲綸爰被我是以班師凱歸休

牛息馬賊猶不悛遂復矢流王屋兵躔象魏終  
童之觀非復聽訟之堂甘泉之宮永乖避暑之  
地坐召憲司臥制朝宰矯託天命僞作符書重  
增賦斂肆意哀剝生者逃竄死者暴尸道路以  
目庶僚鉗口刑戮失衷爵賞由心老弱波流士  
女塗炭臧獲之人五宗及賞緝紳之士三族見  
誅穀粟騰踴自相吞噬慄慄黔首路有銜索之  
哀蠢蠢黎民家隕常山之泣偃師南望無復儲  
胥露寒河陽北臨或有穹廬氊帳南山之竹未



足言其愆西山之兎不足書其罪外監陳瑩之  
至伏承先帝登遐宮車晏駕奉諱驚號五內摧  
裂州寃本毒無地容身景阻飢旣甚民且狼顧  
遂侵軼我彭蠡馮凌我郢邑竊據我江夏掩襲  
我巴丘我是以義勇爭先忠貞盡力斬馘兇渠  
不可稱算沙同赤岸水似絳河任約泥首於安  
南化仁面縛於漢口子仙乞活於鄢郢希榮敗  
績於柴桑侯景奔竄十鼠爭穴郭默清夷晉熙  
附義計窮力屈反殺後主畢原鄆郇並離禍患

凡蔣邢茅皆伏鈇鑕是可忍也孰不可容莫府  
據有上流寔惟分陝投袂荷戈志在畢命昔周  
依晉鄭漢有虛牟彼惟末屬猶能如此况聯華  
日月天下不賤爲臣爲子兼國兼家者哉咸以  
義旗旣建宜須總一共推莫府寔用主盟粵以  
不佞謬董連率遠惟國艱不遑寧處中權後勁  
冀行天罰提戈蒙險隕越以之天馬千羣長戟  
百萬驅賁獲之士資智勇之力大楚踰荆山淺  
原度彭蠡舳艫汎水以掎其南輜輳委輸以衝



其北華夷百濮羸糧影從雷震風駭直指建業  
按劍而叱江水爲之倒流抽戈而揮皎日爲之  
退舍方駕長驅百道俱入夷山殄谷克原蔽野  
挾輶曳牛之侶拔距磔石之夫騎則逐日追風  
弓則吟猿落鴈捧崑崙而壓卵傾渤海而灌熒  
如駟馬之載鴻毛若奔牛之觸魯縞以此衆戰  
誰能禦之脫復蜂虿若毒獸窮則鬪謂山蓋高  
則四郊多壘謂地蓋遠則三千弗違如彼怒蛙  
譬諸鼯鼠豈費萬鈞無勞百溢加以日臨黃道

兵起絳宮三門旣啓五將咸發舉整整之旗掃  
亭亭之氣故以臨機密運非賊所解奉義而誅  
何罪不服今遣使持節大都督征東將軍開府  
儀同三司江州刺史尚書令長寧縣開國侯王  
僧辯率衆十萬直掃金陵鳴鼓聒天縱金振地  
朱旗夕建如赤城之霞起戈船夜動若滄海之  
奔流計其同惡不盈一旅君子在野小人比周  
荷校滅耳匪朝伊夕春長狄之喉繫郅支之頸  
今司寇明罰質鈇所誅止侯景而已黎元何辜



一無所問諸君或世樹忠貞身荷寵爵羽儀鼎  
族書勲王府俛眉猾豎無由自效豈不下慙泉  
壤上愧皇天失忠與義難以自立想誠南風迺  
睠西顧因變立功轉禍爲福有能縛侯景及送  
首者封萬戶開國公絹布五萬疋有能率動義  
衆以應官軍保全城邑不爲賊用上賞方伯下  
賞剖符並裂山河以紆青紫昔由余入秦禮同  
卿佐日磬降漢且珥金貂必有其才何卹無位  
若執迷不反拒逆王師大軍一臨刑茲罔赦孟

諸焚燎芝艾俱盡宣房河決玉石同沈信賞之  
科有如皎日黜陟之制事均白水檄布遠近咸  
使聞知

### 討陳寶應都官符

陸伯玉

陳書陳寶應晉安侯官人父羽爲郡  
雄豪侯景之亂太守以郡讓羽陳武  
帝輔政聽羽傳邵寶應封侯官縣侯  
文帝即位編爲宗室子女並加封爵  
寶應娶留異女爲妻侯安都之討異  
寶應遣師助之異敗亡歸寶應又資  
周迪兵糧出寇臨川及都督章昭達  
破迪文帝因命討寶應詔宗正絕其



屬籍於是尚書下符昭  
達執送都斬於建康市

告晉安士庶昔隴西旅拒漢不稽誅遼東叛渙  
魏申宏略若夫無諸漢之策勲有扈夏之同姓  
至於納吳淠之子致橫海之師違姒啓之命有  
其誓之討况迺族不繫於宗盟名無紀於庸器  
而顯成三叛豐深四罪者乎案閩寇陳寶應父  
子卉服支孽本迷愛敬梁季喪亂閩隅阻絕父  
既豪俠扇動蠻陬椎髻箕坐自爲渠帥無聞訓  
義所資姦諂爰肆蜂豺俄而解印炎行方謝纒

漏吞舟日月居諸弃之度外自東南王氣寔表  
聖基斗牛聚星允符王迹梯山航海雖若款誠  
擅割瓌珍竟微職貢朝廷尊養含弘寵靈隆赫  
起家臨郡兼晝繡之榮裂地置州假藩麾之盛  
即封戶牖仍邑櫟陽乘華轂者十人保蔽廬而  
萬石又以盛漢君臨推恩婁敬隆周朝會迺長  
滕侯由是紫泥青紙遠賁恩澤鄉亭龜組頒及  
嬰孩自谷遷喬孰復爲擬而苞藏鳩毒敢行狼  
戾連結留異表裏周迪盟軟婚姻自爲唇齒屈



續文選卷九  
七  
疆山谷推移歲時及我毅騎防山定秦望之西  
部戈船下瀨克匯澤之南川遂敢舉斧並助凶  
孽莫不應弦摧刃盡殪醜徒每以罪在首渠憫  
茲驅逼所收俘馘並勒矜放仍遣中使爰降詔  
書天網恢弘猶許改思異旣走險迪又逃刑誑  
侮王人爲之川藪遂使袁熙請席遠歎頭行馬  
援觀蛙猶安井底至如遇絕九賦剽掠四民闔  
境資財盡室封奪凡厥蒼頭皆略黔首蝥賊相  
扇叶契連蹤乃復踰超瀛溟寇擾浹口侵軼嶺

嶠掩襲述城縛掠吏民焚燒官寺此而可縱孰  
不可容今遣沙州刺史俞文問明威將軍程文  
季假節宣猛將軍成州刺史甘他假節雲旗將  
軍譚瑱假節宣猛將軍前監臨海郡陳思慶前  
軍將軍徐智遠明毅將軍宜黃縣開國侯慧紀  
開遠將軍新除晉安太守趙彖持節通直散騎  
常侍壯武將軍定州刺史康樂縣開國侯林馮  
假節信威將軍都督東討諸軍事益州刺史余  
孝頃率羽林二萬蒙衝蓋海乘跨滄波掃蕩巢



窟此皆昆明教戰。濡須鞠旅。累從楊僕。亟走孫恩。斬蛟中流。命馮夷而鳴鼓。鼉鼉爲駕。輜方壺而建旗。義安太守張紹。賓忠誠款到。累使求軍。南康內史裴忌。新除輕車將軍。劉峰。東衡州刺史。錢道戢。並即遣人。仗與紹。賓同行。故司空歐陽公。昔有表奏。請宣薄伐。遙途意合。若伏波之論兵。長逝遺誠。同子顏之勿赦。征南薨謝。上策無忘。周南餘恨。嗣子弗忝。廣州刺史歐陽紇。充符家聲。率遵廣略。舟師步卒二萬。分趨水扼長

鯨。陸掣封豕。董率衡廣之師。會我六軍。潼州刺史李膺。明州刺史戴晃。新州刺史區白。獸壯武將軍。修行師陳留太守張遂。前安成內史闕慎。前廬陵太守陸子隆。前豫章太守任蠻。奴巴山太守黃法慈。戎昭將軍湘東公世子徐敬成。吳州刺史魯廣達。前吳州刺史遂興。縣開國侯詳。使持節都督征討諸軍事。散騎常侍護軍將軍。昭達。率緹騎五千。組甲二萬。直渡邵武。仍頓晉安。按轡揚旌。夷山堙谷。指期掎角。以制飛走。前



宣威太守錢肅臨川太守駱牙太子左衛率孫  
詡尋陽太守莫景隆豫章太守劉廣德並隨機  
鎮邊絡驛在路使持節散騎常侍鎮南將軍開  
府儀同三司江州刺史新建縣開國侯法旣戒  
嚴中流以爲後殿斧鉞所臨罪唯元惡及留異  
父子其黨主帥雖有請泥函谷相背淮陰若能  
翻然改圖因機立効非止肆眚仍加賞擢其建  
晉士民久被驅迫者大軍明加撫慰各安樂業  
流寓失鄉即還本土其餘立功立事已具賞格

若執迷不改同惡趨起斧鉞一臨罔知所赦

對問 宋玉而後希聞嗣響將繇東方揚班徒族設論爾

設論 應間達貞漢年已自岷賦難復振其豪穎

辭 其體本合詩騷蕭氏流別獨所未安

序一

### 陶淵明集序

### 梁昭明太子

沈約宋書陶潛字淵明尋陽柴桑人少有高趣爲鎮軍建威參軍後爲彭澤令解綬去職北齊陽休之序錄曰陶潛之文蕭統所撰八卷合序目



續文選卷九  
誄傳而少五孝傳及四八  
目然編錄有體次第可尋

夫自銜自媒者士女之醜行不伎不求者明達  
之用心是以聖人韜光賢人遁世其故何也含  
德之至莫踰於道親已之切無重於身故道存  
而身安道亡而身害處百齡之內居一世之中  
倏忽比之白駒寄寓謂之逆旅宜乎與大塊而  
盈虛隨中和而任放豈能戚戚勞於憂畏汲汲  
役於人間齊謳趙女之娛八珍九鼎之食結駟  
連騎之榮侈袂執圭之貴樂既樂矣憂亦隨之

何倚伏之難量亦慶弔之相及智者賢人居之  
甚履薄冰愚夫貪士競之若洩尾間玉之在山  
以見珍而終破蘭之生谷雖無人而自芳故莊  
周垂釣於濠伯成躬耕於野或貨海東之藥草  
或紡江南之落毛譬彼鷓鴣豈競鳶鷂之肉猶  
斯雜縣寧勞文仲之牲至於子常甯喜之倫蘇  
秦衛鞅之匹死之而不疑其之而不悔主父偃  
言生不五鼎食死則五鼎烹卒如其言豈不痛  
哉又楚子觀周受折於孫滿霍侯驂乘禍起於



負芒饕餮之徒其流甚衆唐堯四海之主而有汾陽之心子晉天下之儲而有洛濱之志輕之若脫屣視之若鴻毛而況於他人乎是以至人達士因以晦迹或懷釐而謁帝或被褐而負薪鼓枻清潭棄機漢曲情不在於衆事寄衆事以忘情者也有疑陶淵明詩篇篇有酒吾觀其意不在酒亦寄酒爲迹者也其文章不羣辭彩精拔跌宕昭彰獨超衆類抑揚爽朗莫之與京橫素波而傍流干青雲而直上語時事則指而可

想論懷抱則曠而且真加以貞志不休安道苦節不以躬耕爲耻不以無財爲病自非大賢篤志與道汗隆孰能如此乎余素愛其文不能釋手尚想其德恨不同時故加搜校粗爲區目白璧微瑕惟在閒情一賦揚雄所謂勸百而諷一者卒無諷諫何足搖其筆端惜哉亡是可也并粗點定其傳編之於錄嘗謂有能觀淵明之文者馳競之情遣鄙吝之意祛貪夫可以廉懦夫可以立豈止仁義可蹈抑乃爵祿可辭不必傍



游泰華遠求柱史此亦有助於風教也

### 梁簡文帝法寶聯璧序

梁元帝

隋費長房歷代三寶記曰法寶集二百卷有法寶聯璧簡文帝躬覽內經持科等法今諸學士編寫結連以類有從後有法寶聯璧南史陸單傳云作前在法寶聯璧等三十八人又高僧法寶聯璧經地區分其類

竊以觀乎天文日月所以貞麗觀乎人文藻火所以昭發况復玉毫朗照出天人之表金牒空解生文章之外雖境智冥焉言語斯絕詠歌作

焉可略談矣粵乃書稱湯誥篇陳夢說昔則王畿居亳今則帝業維揚功施天下我之自出豈與姚墟石紐譙城溫縣御龍居夏唐杜入周而已哉皇帝垂衣負屨辨方正位車書之所會同南暨交趾風雲之所沾被西漸流沙武實止戈秉宜生之劔樂彰治定滅庖犧之瑟相兼二八知微知彰將稱四七如貔如虎寧俟容成翠屋之遊廣成石室之會故以宗心者忘相歸憑者常樂昔轉輪護法南宮有金龍之瑞梵天請道



東朝開寶蓋之祥。盡善盡美。獨高皇代。古者所以出師入保。冬羽秋籥。實以周誦幼沖。用資端士。漢盈末學。取憑通議。大傳之論。孟侯小戴之談。司業山川珍異。俟郊迎而可知。帷幄後言。籍墾田而求驗。以今方昔。事則不然。我副君業邁宣尼。道高啓筮之作。聲超姬發。寧假卞蘭之頌。譬衡華之峻極。如渤海之波瀾。顯忠立孝。行修言道。博施尚仁。動微成務。智察舞雩。爰分封蟻。爰初登仕。明試以功德。加三輔威行。九流董師。

虎據操鉞。蟬冕津卿。濟沈物仰。平分之恩。沂岱邛岷。民思後來之政。陳蒼留反裘之化。淮海高墨。幘之聲威。漸黃支。化行赤谷。南通舜玉。北平堯柳。朝鮮航海。夜郎款塞。然後體道。方震雨施。雲行漢用。戊申晉維。庚午增暉。前曜獨擅。元貞恩若春風。惠如冬日。履道爲輿。策賢成駟。降意韋編。留神緗帙。許商算術。王圍射譜。南龜異說。東馳雜賦。任良弈棋。羨門式法。箴興琴劔。銘自盤盂。無不若指諸掌。尋涇辨渭。重以鳳豔。風飛



鸞文颺豎織者入無倫大者含元氣韻調律呂  
藻震玄黃豈俟取讚彥先詢聞雅主至於鹿園  
深義龍宮奧說遠命學徒親登講肆詞爲憲章  
言成楷式徃復王粲事軼魏儲酬答蔡謨道高  
晉兩似懸鐘之應響猶衢樽之待酌率邇者踵  
武逃聽者風聲是使金堅秘法寶冥夕夢無懷  
不滅華胥夜感自非建慧橋明智劔薰戒香沐  
定水何以空積忽微歷賢劫而終現黍累迴幹  
蘊珠藏而方傳加以大秦之籍非符八體康居

之篆有異六爻二乘始闢譬馬傳兔一體同歸  
棄犀崇象潤業滋多見思平積本有凝邈了正  
相因雖談假績不攝單影即此後心還蹤初焰  
俱宗出倒蓮華起乎淤泥並會集藏明珠耀於  
貧女性相常空般若無五時之說不生煩惱涅  
槃爲萬德之宗無不酌其菁華撮其旨要採彼  
玳鱗拾茲翠羽潤珠隨水抵玉崑山每至鶴關  
且啓黃綺之儔朝集魚燈夕朗陳吳之徒晚侍  
皆仰稟神規躬承睿旨爰錫嘉名謂之聯璧聯



含珠而可擬璧與日而方升以今歲次攝提星  
在監德百法明門於茲總備千金不刊獨高斯  
典合二百二十卷號曰法寶聯璧雖玉杯繁露  
若倚蒹葭金臺鑿楹似吞雲夢繹自伏櫪西河  
攝官南國十迴鳳瑄一奉龍光筆削未勤徒榮  
卜商之序稽古盛則又慙安國之製謹抄纂爵  
位陳諸左方

### 真靈位業圖序

陶通明

圖一卷真誥稽神樞闡幽微雜載真  
仙位業鬼神官府官司氏族未如此  
圖整悉序有隱居自注指目單位上  
皇道君五帝七老之類略說姓名墨  
羽孟卓之例是任同秩異金闕四帝  
太極四真及下教之例是業均迹別  
諸步綱之例也 宋傳  
霄編隱居集此序失入

夫仰鏡玄精覩景耀之巨細俯眄平區見巖海  
之崇深搜訪人綱究朝班之品序研綜天經測  
真靈之階業但名爵隱顯學號進退四宮之內  
疑似相參今正當比類經正讎校儀服埒其高  
卑區其宮域又有指目單位略說姓名或任同



秩異業均迹別者如希林真人爲太微右公而  
領九宮上相未委爲北宴上清當下親相職耶  
諸如此類難可必證謂其並繼所領而從高域  
粗事事條辯略宣後章輒以淺識下生輕品上  
聖升降失序梯級乖本懼貽謫玄府絡咎冥司  
今所詮貫者實稟注之奧旨存向之要趣祈祝  
跪請宜委位序之尊卑對真接異必究所遇之  
輕重雖同號真人真品乃有數俱目仙人仙亦  
有等級千億若不精委條領略識宗源者猶如  
野夫出朝廷見朱衣必令史句驪入中國呼一  
切爲參軍豈解士庶之貴賤辨爵號異同乎

### 後漢書注補志序

劉宣卿

後漢書序錄宋宣城太守范曄集諸  
家作十紀十志八十列傳志未成被  
誅至梁世有刻令  
劉昭者補成之

臣昭曰昔司馬遷作史記爰建八書班固因廣  
是曰十志天人經緯帝政紘維區分源奧開廓  
著述創藏山之秘寶肇刊石之遐貫誠有繁於



春秋亦自敏於改作至乎永平執簡東觀紀傳  
雖顯書志未聞推檢舊記先有地理張衡欲存  
炳發未有成功靈憲精遠天文已煥自蔡邕大  
弘鳴條寔多紹宣協妙元卓律曆以詳承洽伯  
始禮儀克舉郊廟社稷祭祀該明輪駢冠章車  
服贍列於是應譙續其業董巴襲其軌司馬續  
書總爲八志律曆之篇仍乎洪邕所構車服之  
本即依董蔡所立儀祀得於往制百官就乎故  
簿並籍據前修以濟一家者也王教之要國典

之源粲然略備可得而知矣旣接繼班書通其  
流貫體裁淵深雖難踰等序致膚約有傷懸越  
後之名史弗能罷意叔駿之書是謂十典矜緩  
殺青竟亦不成二子卒業俱稱麗富華轍亂亡  
典則借泯雅言邃義於是俱絕沈松因循尤解  
功創時改見句非更搜求加藝文以矯前棄流  
書品採自近錄初平永嘉圖籍焚喪塵消煙滅  
焉識其限借南晉之新虛爲東漢之故實是以  
學者亦無取焉范曄後漢良史誠跨衆氏序或



未周志遂全闕國史鴻曠須寄勤閑天才富博  
猶俟改具若草昧厥始無相憑據窮其身世少  
能已畢遷有承考之言固深資父之力太初以  
前班用馬史十志所因寔多徃制升入校部出  
二十載續志昭表以助其間成父述者夫何易  
哉况擘思雜風塵心撓成毀弗克員就豈以茲  
乎夫辭潤婉贍可得起改覈求見事必應寫襲  
故序例所論備精與奪及語八志頗衰其美雖  
出拔前羣歸相公也又尋本書當作禮樂志其

天文五行百官車服爲名則同此外諸篇不著  
紀傳律歷郡國必依徃式擘遺書自序應徧作  
諸志前漢有者悉欲備製卷中發論以正得失  
書雖未明其大旨也曾臺雲構所缺過乎榱桷  
爲山霞高不終踰乎一壘鬱絕斯作吁可痛哉  
徒懷纘緝理慙鈎遠迺借舊志注以補之狹見  
寡陋匪同博遠及其所值微得論列分爲三十  
卷以合范史求於齊工孰曰文類比茲闕恨庶  
賢乎已昔褚先生補子長之削少馬氏接孟堅



之不畢相成之義古有之矣引彼先志又何猜  
焉而歲代逾邈立言湮散義存廣求一隅未覲  
兼鍾律之妙素揖校讎參曆算之微有慙證辨  
星候祕阻圖緯藏嚴是須甄明每用疑略時或  
有見頗邀傍遇非覽正部事乖詳密今令行禁  
止此書外絕其有疏漏諒不足誚

### 詩評序

#### 鍾仲偉

隋經籍志詩評三卷鍾嶸撰或曰詩  
品起自古詩四十五首迄梁任沈諸

賢論其優劣分為三品一  
品之中以世代為先後

氣之動物物之感人故搖蕩性情形諸舞詠照  
燭三才暉麗萬有靈祇待之以致饗幽微藉之  
以昭告動天地感鬼神莫近於詩昔南風之辭  
卿雲之頌厥義負矣夏歌曰鬱陶乎予心楚謠  
曰名余曰正則雖詩體未全然是五言之濫觴  
也逮漢李陵始著五言之目矣古詩眇邈人代  
難詳推其文體固是炎漢之製非衰周之倡也  
自王揚枚馬之徒詞賦競爽而吟詠靡聞從李



都尉迄班婕妤將百年間有婦人焉一人而已  
詩人之風頓已缺喪東京二百載中惟有班固  
詠史質木無文降及建安曹公父子篤好斯文  
平原兄弟鬱爲文棟劉楨王粲爲其羽翼次有  
攀龍託鳳自致於屬車者蓋將百計彬彬之盛  
大備於時矣爾後陵遲衰微迄於有晉太康中  
三張二陸兩潘一左勃爾復興踵武前王風流  
未沫亦文章之中興也永嘉時貴黃老稍尚虛  
談於時篇什理過其辭淡乎寡味爰及江表微

波尚傳孫綽許詢桓庾諸公詩皆平典似道德  
論建安風力盡矣先是郭景純用雋上之才創  
變其體劉越石仗清剛之氣贊成厥美然彼衆  
我寡未能動俗逮義熙中謝益壽斐然繼作元  
嘉中有謝靈運才高詞盛富豔難蹤固已含跨  
劉郭陵轢潘左故知陳思爲建安之傑公幹仲  
宣爲輔陸機爲太康之英安仁景陽爲輔謝客  
爲元嘉之雄顏延年爲輔斯皆五言之冠冕文  
詞之命世也夫四言文約意廣取效風騷便可



多得每苦文繁而意少故世罕習焉五言居文  
詞之要是衆作之有滋味者也故云會於流俗  
豈不以指事造形窮情寫物最爲詳切者耶故  
詩有六義焉一曰興二曰比三曰賦文已盡而  
意有餘興也因物喻志比也直書其事寓言寫  
物賦也弘斯三義酌而用之幹之以風力潤之  
以丹彩使味之者無極聞之者動心是詩之至  
也若專用比興則患在意深意深則詞躓若但  
用賦體則患在意浮意浮則文散嬉成流移文

無止泊有蕪漫之累矣若乃春風春鳥秋月秋  
蟬夏雲暑雨冬月祁寒斯四候之感諸詩者也  
嘉會寄詩以親離羣託詩以怨至於楚臣去境  
漢妾辭宮或骨橫朔野或魂逐飛蓬或負戈外  
戍或殺氣雄邊塞客衣單孀閨淚盡文士有解  
珮出朝一去忘返女有揚蛾入寵再盼傾國凡  
斯種種感蕩心靈非陳詩何以展其義非長歌  
何以釋其情故曰詩可以羣可以怨使窮賤易  
安幽居靡悶莫尚於詩矣故詞人作者罔不愛



好今之士俗斯風熾矣纔能勝衣甫就小學必  
甘心而馳騫焉於是庸音雜體各爲家法至於  
膏腴子弟耻文不逮終朝點綴分夜呻吟獨觀  
謂爲警策衆覩終淪平鈍次有輕蕩之徒笑曹  
劉爲古拙謂鮑昭羲皇上人謝朓今古獨步而  
師鮑昭終不及日中市朝滿學謝朓劣得黃鳥  
度青枝徒自棄於高聽無涉於文流矣嶸觀王  
公縉紳之士每博論之餘何嘗不以詩爲口實  
隨其嗜慾商確不同淄澠並泛朱紫相奪喧議

競起準的無依近彭城劉士章俊賞之士疾其  
淆亂欲爲當世詩品口陳標榜其文未遂嶸感  
而作焉昔九品論人七略裁士校以賓實誠多  
未值至若詩之爲技較爾可知以類推之殆均  
博弈方今皇帝資生知之上才體沉鬱之幽思  
文麗日月學究天人昔在貴遊已爲稱首况八  
紘旣掩風靡雲蒸抱玉者聯肩握珠者踵武固  
以睨漢魏而不顧吞晉宋於胷中諒非農歌藪  
議敢致流別嶸之今錄庶周旋於閭里均之於



談笑耳

續文選卷九

續文選卷之九

國家圖書館, NATIONAL CENTRAL LIBRARY, TAIWAN, R.O.C



續文選卷之十

武原胡震亨孝轅撰

序二

昭明太子集序

劉孝綽

梁書劉孝綽傳太子文章繁富皆太子  
咸欲撰錄太子集三卷集五卷太子

臣竊觀大易重明之象著焉抑又聞之七聖之  
義存焉故書有孟侯之名記表元良之德歷選  
前古以洎夏周可得而稱啓誦而已雖徹聖挺





賢光乎二代高文精義閔爾無聞漢之顯宗晉  
之肅祖昔自春宮益好儒術或專經止於區易  
或持論窮於貞假子桓雖摘藻銅省集講肅成  
事在藩儲理非皇貳未有正位少陽多才多藝  
者也粵我大梁之二十一載盛德備乎東朝若  
乃有縱自天惟睿作聖顯仁立孝行於四海如  
珪如璋不因琢磨之義爲臣爲子寧待觀喻之  
言惟性道難聞而文章可見故俯同志學用晦  
生知以絃誦之餘辰總鄒魯之儒墨徧綈緗於  
七閣彈竹素於九流地居上嗣實副元首皇帝  
垂拱巖廊委咸庶績時非從守事或監撫雖一  
日二日攝覽萬幾猶臨書幌而不休對歆案而  
忘怠况復迄納侍講討論經紀去聖滋遠愈生  
穿鑿枝分葉散殊路僭馳靈臺辟雍之疑禮宗  
祭社之繆明章申老之議通顏理王之說量覈  
然否剖析同異察言抗論窮理盡微於時淹中  
稷下之生金華石渠之士莫不過衢樽而挹多  
少見斗極而曉西東與夫盡春卿之道贊仲尼



之宅非賈誼於蘇林問蕭何於棗據區區前史  
不亦慙歟加以學貫摠持辨同無礙五時密教  
見猶鏡象一乘妙旨觀若掌珠及在布金之園  
處如龍之衆開示有空顯揚權實是以徧動六  
地普雨四花豈直得解瓔須提舍鉢瓶沙騰曇  
言德梵志依風而已哉若夫天文以爛然爲美  
人文以煥乎爲貴是以隆儒雅之大成遊雕蟲  
之小道握牘持筆思若有神曾不斯須風飛雷  
起至於宴游西園祖道清洛三百載賦該極連

篇七言致擬見諸文學博奕興詠並命從游書  
令視草銘非潤色七窮煒燁之說表極遠大之  
才皆喻不備體詞不掩義因宜適變曲盡文情  
竊以屬文之體鮮能周備長卿徒善旣累爲遲  
少孺雖疾俳優而已子淵淫靡若女工之蠹子  
雲侈靡異詩人之則孔璋詞賦曹祖勸其修今  
伯喈答贈摯虞知其頗古孟堅之頌尚有似贊  
之譏士衡之碑猶聞類賦之貶深乎文者兼而  
善之能使典而不野遠而不放麗而不淫約而



不儉獨擅衆美斯文在斯假使王朗報箋卞蘭  
獻頌猶不足以揄揚著述稱贊才章况在庸才  
曾何彷彿然承華肇建濫齒時髦居陪出從逝  
將二紀譬彼登山徒仰峻極同夫觀海莫際波  
瀾但職官書記預聞盛藻歌詠不足敢忘編次  
謹爲一帙十卷第目如左日升松茂與天地而  
偕長壯思英詞隨歲月而增廣如其後錄以俟  
賢臣

御講般若經序

陸子龍

釋道宣內典錄曰摩訶般若波羅蜜  
子注經梁武帝撰帝以八部般若若是  
十方三世諸佛之母故採衆經躬述  
注解又親講讀 武帝本紀帝製涅槃  
經大品淨名三慧諸經義數百卷聽  
覽餘暇即於重雲殿及同泰寺講說  
名僧碩學四部  
聽衆常萬餘人

夫理臻畢竟而照盡空寂入三門而了觀導五  
濁而超津譬茲烈炎遠衆邪而不觸如彼出日  
示一相以趨道自羅閱闡其玄言香域弘其妙  
說彌勒表字於圓光帝釋念善於明呪受持讀



誦神力折於猛風恭敬尊重福利踰於寶塔蓋  
衆聖之圓極而萬法之本源也皇帝真智自己  
大慈應物送迎日月緯絡天地鎮三季之澆風  
緝五際之頹俗出臨衢室退事齋居非以黃屋  
爲尊每以蒼生爲念德遍區宇未足顯於至仁  
理絕名言更慤懃於密說昔慧燈隱耀法藏分  
流二乘躋駁五部乖謬訶黎狹劣徒仰黑月之  
光毗曇褊滯未見沈珠之寶自聖皇應期探盡  
幾妙決散羣迷摧伏異學極天宮之浩博窮龍

殿之秘深於是大發菩提深弘般若永斷煩惑  
同歸清淨潤甘露於羣生轉法輪而不息上以  
天監十一年注釋大品自茲已來躬事講說重  
以所明三慧最爲奧遠迺區出一品別立經卷  
亦由觀音力重特顯普門之章登住行深迺出  
華嚴之品故以撮舉機要昭悟新學者焉大僧  
正慧令蓋法門之上首亦總持之神足願等須  
提之問遂同迦葉之請迺啓請御講說斯經有  
詔許焉爰以大同七年三月十二日講金字般



若波羅蜜三慧經於華林園之重雲殿華林園者蓋江左已來後庭游宴之所也自晉迄齊年將二百世屬威夷主多奢替舞堂鐘肆等阿房之舊基酒池肉林同朝歌之故所自至人御宇屏棄聲色歸傾宮之美女共靈囿於庶人重以華園毀折悟一切之無常寶臺假合資十力而方固捨茲天苑爰建道場莊嚴法事招集僧侶肅肅神宇結翠巘之陰峩峩重閣臨丹雘之上廣博光明有邁菴羅之地身心安樂寔符歡喜之園於時三春屆節萬物舒榮風日依遲不寒不暑瑞華寶樹照曜七重玉底金池淪漪八德洞啓高門雲集大衆趨法席以沸誼聽鳴鐘而寂靜皇太子智均悉達德邁曇摩捨三殿之俗娛延二座以問道宣城王及王侯宗室等亦咸發深心並修淨行熏戒香以調善服染衣而就列廡映蟬冕委蛇冠帶排金門登玉階者濟濟成羣旣而警蹕北趨祭戟東轉門揚清梵俯吐香煙被淨居之服升須彌之座八種妙聲發言



無滯十方竦聽隨類得解甚深之義在挹注而  
難竭樂說之辯既往復而彌新至如宿學者僧  
亟淪偏執專仗數論未了經文變小意以稱量  
仰天尊而發問於是操持慧刃解除疑網示之  
迷方歸以正轍莫不渙然冰釋欣然頂戴若蓮  
華之漸開譬月初而增長凡諸聽衆自皇太子  
王侯宗室外戚及尚書令何敬容百辟卿士虜  
使主崔長謙使副陽休之及外域雜使一千三  
百六十人皆路逾九驛途遙萬里仰皇化以載

馳聞天華而躍踊頭面伸其盡禮讚歎從其下  
陳又別請義學僧一千人於同泰寺夜覆制義  
並名擅龍象智曉江河傳習譬於瀉瓶諷誦同  
於疾雨沙門釋法隆年將百歲學周三藏識洞  
入禪說法度人顯名於關塞之北聞中國應講  
摩訶般若經故自遠而至時僧正慧令猶未啓  
講京師道俗亦不知御應講也至發講之日又  
有外國僧衆不可勝數並衆所不識同集法座  
故知放光遍照地神唱告豈勞馳象之使冥符



信鼓之期會稽鄒縣阿育王寺釋法顯修習苦  
行志求慧解既等鬱多之思惟亦同波崙之懇  
到廼於講所自陳願力刺血灑地用表至誠昔  
割體供養析骨書寫歸依正法匪吝身命以今  
望古信非虛說凡講二十三日自開講迄於解  
座日設遍供普施京師文武侍衛並加班齎上  
光宅天下四十餘年躬務儉約體安菲素常御  
小殿裁庇風雨所居幄座僅於容膝外絕三驅  
之禮內屏千鍾之宴膳夫所掌歲撤萬金掖庭  
之費年減巨億兼以博收地利同入珍於撓海  
盈息泉府譬無盡於龍金故能不勞人力無損  
國度財法兼施周流不竭是講也靈異雜沓不  
可思議一則宮中佛像悉放光明二則大地震  
動備諸踊沒三則夜必澍雨朝則晴霽淑氣妍  
華埃塵不起四則犍椎旣鳴講筵將合重肩絰  
轂填溢四門而人馬調和不相驚擾五則所施  
法席止坐萬人而恒沙大衆更無迫迕六則四  
部曠遠咸聞妙說軒檻之外聽受益明七則淨



供遍設厨匪宿辦妙食應時百味盈溢八則氛  
氲異香從風滿觸九則鏗鏘雅樂自然發響十  
則同聲讚善遍於虛空斯益先佛證見諸天應  
感超躡寶於昔靈邁雨華於往瑞是時率土藻  
抃含靈慶悅願預福田爭事喜捨上皆區其心  
迹爲發大願竊以一句奉持尚生衆善二字經  
耳猶階勝報况廣運大乘遍揚正法等發慧根  
同趣妙果方當秘諸寶函傳彼金字亘萬劫以  
光明彌大千而利益盛矣哉信無德而稱也小

臣預在講筵職叅史載謹錄時事以立今序

齊竟陵王世子撫軍巴陵王法集序

釋僧祐

南齊書蕭昭胄字景胤竟陵文宣王  
世子散騎常侍太常改封巴陵王謀  
廢東昏自立被誅梁定京邑贈撫軍  
將軍法集目錄上卷造千佛願繡  
佛頌捨身序并願下卷釋迦讚十第  
子讚西方寺禪圖九相詠四城門詩  
法詠歎德佛牙讚經聲賦寶林寺禪  
房閒居頌又自寫經十部注百論一  
部

蓋聞世諦善論法海所總嚴飭文辭初位是攝



自大化東漸汾世詠歌魏來雜製間出羣集至  
於才中含章思入精理固法門之羽燾梵聲之  
金石也齊竟陵文宣王世子故撫軍巴陵王稟  
璿華於琨峰敏明璣於珠海慧發觸辰識表觴  
歲孝友淳至機穎朗徹故幼無弱弄夙有老成  
甫在志學固已摠括墳典矣雅好辭賦允登高  
之才藉意隸書均臨池之敏業盈竹素慮滿風  
月是時齊方有德文宣翼讚康衢旣熙慧教傍  
遠世子以枝葉之慶藩守浙河下專風舉昇席

治立含靜臺以御已垂簡蕙以振俗郡富名山  
巖多靈寺故勝業愈高清心彌徃每遊踐必訓  
思若淵泉信足以揄揚至道炳發玄極觀其摘  
賦經聲述頌繡像千佛願文捨身弘誓四城九  
相之詩釋迦十聖之讚並英華自凝新聲間出  
故僕射范雲篤賞文會雅相嗟重以爲後進之  
佳才也至隆昌之時始兆無妄永元之末運屬  
道消葛藟失庇磐石傾翦虎兕出柙宗室致猜  
而樂天知命夷憂味道在艱不虧其貞處約無



改其節鏡因果而靡晦洞真俗其如曉專精於  
大覺之門慄烈於經典之奧於是下帷墜戶注  
解百論拔出幽旨妙盡織典乃躬算縑素手寫  
方等所書大經凡有十部鋒刃刊削風趣妍糜  
論其思理所徹業藝所貫有踰筭表之能克副  
青藍之敏矣夫深宮寡識著自格衣梁肉多驕  
聞之前記而能拔類獨立超然而舉豈非內鑄  
堅芳之性外瑩過度之風哉以法而說譬金龍  
之嗣信相由俗而議邁允恭之紹陳思可謂開  
士宿因栴檀眷屬無忝堂構克勝負荷者也余  
昔緣法事亟覲清暉及律集稽川屢延供禮惜  
乎早世文製未廣今撰錄法詠以繼文宣內集  
使千祀之外知蘭菊之無絕焉

玉臺新詠序

徐孝穆

隋經籍志玉臺新詠十卷徐  
陵撰起古詩古樂府盡梁代

凌雲槩日由余之所未窺千門萬戶張衡之所  
曾賦周王璧臺之上漢帝金屋之中玉樹以珊



瑚作枝珠簾以玳瑁爲柙其中有麗人焉其人  
也五陵豪族充選掖庭四姓良家馳名永巷亦  
有潁川新市河澗觀津本號嬌娥曾名巧笑楚  
王宮內無不推其細腰魏國佳人俱言訝其纖  
手閱詩敦禮非直東隣之自媒婉約風流無異  
西施之被教弟兄協律自小學歌少長河陽由  
來能舞琵琶新曲無待石崇箜篌雜引非因曹  
植傳鼓瑟於楊家得吹簫於秦女至若寵聞長  
樂陳后知而不平畫出天仙閼氏覽而遙妬且

如東隣巧笑來侍寢於更衣西子微顰將橫陳  
於甲帳陪游馭娑騁纖腰於結風長樂鴛鴦奏  
新聲於度曲粧鳴蟬之薄鬢照墮馬之垂鬟反  
挿金鈿橫抽寶樹南都石黛最發雙蛾北地燕  
脂偏開兩靨亦有嶺上仙童分丸魏帝腰中寶  
鳳授曆軒轅金星與婺女爭華麝月共嫦娥競  
爽驚鸞冶袖時飄韓掾之香飛燕長裾宜結陳  
王之珮雖非圖畫入甘泉而不分言異神仙戲  
陽臺而無別真可謂傾國傾城無對無雙者也



加以天情開朗逸思彫華妙解文章尤工詩賦  
琉璃硯匣終日隨身翡翠筆牀無時離手清文  
滿篋非惟芍藥之花新製連篇寧止蒲萄之樹  
九日登高時有緣情之作萬年公主非無累德  
之辭其佳麗也如彼其才情也如此旣而椒房  
宛轉柘館陰岑絳鶴晨嚴銅蠡晝靜三星未夕  
不事懷衾五日猶餘誰能理曲優游少託寂寞  
多閑厭長樂之疎鐘勞中宮之緩箭輕身無力  
怯南陽之擣衣生長深宮笑扶風之織錦雖復

投壺玉女爲歡盡於百驍爭博齊姬心賞窮於  
六著無怡神於暇景惟屬意於新詩可得代彼  
萱蘇微蠲愁疾但徃世名篇當今巧製分諸麟  
閣散在鴻都不藉篇章無由披覽於是燃脂暝  
寫弄墨晨書撰錄艷歌凡爲十卷曾無參於雅  
頌亦靡濫於風人涇渭之間若斯而已於是麗  
以金箱裝之寶軸三臺妙迹龍伸蠖屈之書五  
色花牋河北膠東之紙高樓紅粉仍定魯魚之  
文辟惡生香聊防羽陵之蠹雲飛六甲高擅玉



函鴻烈仙方長推丹枕至如青牛帳裏餘曲旣  
終朱鳥窻前新粧已竟方當開茲縹帙散此緇  
繩永對玩於書帷長循環於織手豈如鄧學春  
秋儒者之功難習竇傳黃老金丹之術不成固  
勝西蜀豪家託情窮於魯殿東臺甲館流詠止  
於洞簫變彼諸姬聊同棄日猗與彤管麗矣香  
奩

侍中沈府君集序

劉師知

陳書沈炯累官明威將軍卒贈侍中  
謚恭子隋書經籍志炯後集十三卷

陳亢有云趨庭學詩又聞君子毛萇亦曰登高  
能賦可爲大夫言其善觀民風則與圖王政若  
沈恭子者斯乃當世賢達至如敦厚之詞足以  
吟詠情性身之文也貞固之節可以宣被股肱  
邦之光也然此者君之小道猶曰餘行何則德  
之所本教之所由實乃孝篤天倫義感殊類有  
美於斯鬱爲高士則余與夫子古所謂世親者  
歟亦所謂益友者歟疇昔一面竭來二紀自終



角而接清塵蒙長者之嘉醕屯險驟更懽娛中  
阻班超旣反盛憲猶存春秋美景朝游夕宴酒  
酣得意賦詩聯章顧余不肖齒義懸絕降德忘  
年交情彌至增榮廣價知己難忘南浦之送未  
淹北邙之辭仍及於時屬有烽燧方勤帷扆遂  
使褐裘莫計寶劍無追痛此生芻同茲宿草九  
原方遠百身寧贖若乃帳懸秋月一鴈孤飛落  
花春風數鷺爭弄伯牙之絃寂寥長絕山陽之  
管惆悵徒聞夫盛烈清徽勒傳乎帝載遺文餘  
論被在乎民謠者斯所以沒而猶彰死且不朽  
今乃撰西還所著文章名爲後集

### 徵士頌序

### 高伯恭

北史高允傳曰神麋四年允與盧玄等俱被徵又曰允老疾上表乞骸骨以昔歲同徵零落將盡感逝懷人作徵士頌蓋止于應命者范陽盧玄等三十四人張偉傳偉字仲業太原人與高允等俱被辟命爲營州刺史卒

夫百王之御士也莫不資仗羣才以隆治道故



周文以多士克寧漢武以得賢爲盛此載籍之所記由來之常義魏自神麈已後宇內平定誅赫連積世之僭掃窮髮不羈之寇南摧江楚西盪涼域殊方之外慕義而至於偃兵息甲修立文學登延儁造酬諮政事夢想賢哲思遇其人訪諸有司以求名士咸稱范陽盧玄等四十二人皆冠冕之胄著問州邦有羽儀之用親發明詔以徵玄等乃曠官以待之懸爵以縻之其就命三十五人自餘依例州郡所遣者不可稱

記爾乃髦士盈朝而濟濟之美興焉昔與之俱蒙斯舉或從容廊廟或游集私門上談公務下盡忻娛以爲千載一時始於此矣日月推移吉凶代謝同徵之人凋殲殆盡在者數孑然復分張往昔之忻變爲悲感張仲業東臨營州遲其還返一叙於懷齊衿於垂歿之年寫情於桑榆之末其人不幸復至殞歿在朝者皆後進之士居里者非疇昔之人進涉無寄心之所出入無解顏之地顧省形骸所以永歎而不已夫頌者



美盛德之形容亦可以長言寄意不爲文二十年矣然事切於心豈可默乎遂爲之頌

### 三月三日華林園馬射賦序

#### 庾子山

宋敏求長安志載周宮苑各有芳林園不詳其地即華林園也宜在長安故城西漢儀三月上巳絮於東流水上言陽氣布暢萬物訖出始絮之矣晉儀九月九日馬射說云講武習射象立秋之禮今三月三日馬射義無所取按鄴中記云石虎三月三日臨水會走馬步射飲宴終日北俗尚武禮或昉此矣其儀惟北齊可考周儀諸志失載

臣聞堯以仲春之月刻玉而遊河舜以甲子之朝披圖而巡洛夏后瑤臺之上或御二龍周王玄圃之前猶駮八駿我大周之創業也南正司天北正司地平九黎之亂定三危之罪雲紀御官鳥司從職皇王有秉歷之符玄珪有成功之瑞豈直天地合德日月光華而已哉皇帝以上聖之姿膺下武之運通乾象之靈啓神明之德夷典秩宗見之三禮夔爲樂正聞之九成克已備於禮容威風總於戎政加以卑宮菲食阜帳



綈衣百姓爲心四海爲念西郊不再即動皇情  
東作未登彌迴天眷兵革無會非有待於丹鳥  
宮觀不移故無勞於白燕銀甕金船山車澤馬  
豈止竹箴兩草共垂甘露青赤二氣同爲景星  
雕題鑿齒識海水而來王烏戈黃皮驗東風而  
受吏於時玄鳥司歷蒼龍御行羔獻冰開桐華  
萍合皇帝幸於華林之園玉衡正而泰階平閭  
闔開而勾陳轉千乘雷動萬騎雲屯落花與芝  
蓋同飛楊柳共春旗一色乃命羣臣陳大射之

禮雖行祓禊之飲即用春蒐之儀止立行宮裁  
舒帳殿陛無玉甃旣異河間之碑戶不金鋪殊  
非許昌之賦洞庭旣張承雲乃奏騶虞九節狸  
首七章正飾五彩之雲壺寧百福之酒唐弓九  
合冬幹春膠夏箭三成青莖赤羽於是選朱汗  
之馬校黃金之埒紅陽飛鵲紫燕晨風唐成公  
之驪驪海西侯之千里莫不飲羽銜竿吟猿落  
鴈鐘鼓震地埃塵漲天酒以疊行肴由鼎進彩  
則錦市俱移錢則銅山合徙太史聽鼓而論功



司馬張旃而賞獲上則雲布雨施下則山藏海  
納實天下之至樂景福之歡欣者也既若木將  
低金波欲上天顧惟穆賓歌惟醉雖復暫離北  
闕聊晏西城即同鄴水之朝更是岐山之會小  
臣不舉奉詔爲文以管窺天以蠡酌海盛德形  
容豈陳梗槩

### 孤鴻賦序

### 盧子行

北史盧思道傳隋文帝相周遷思道  
武陽太守位下不得志爲孤鴻賦以

寄其  
情

余志學之歲自鄉里遊京師便見識知音歷受  
羣公之眷年登弱冠甫就朝列談者過誤遂竊  
虛名通人楊令君邢特進以下皆分庭致禮倒  
屣相接翦拂吹噓長其光價而才本駑拙性實  
踈嬾勢利貨殖淡然不營雖籠絆朝市且三十  
載而獨往之心未始去懷抱也攝生舛和有少  
氣疾分符坐嘯作守東原洪河之湄沃野彌望  
颺務旣屏魚鳥爲鄰有離羣之鴻爲羅者所獲



野人馴養貢之於余置諸池庭朝夕賞翫既用  
銷憂兼以輕疾大易稱鴻漸於陸羽儀盛也楊  
子曰鴻飛冥冥騫翥高也淮南云東歸碣石違  
溽暑也平子賦曰南寓衡陽避祁寒也若其雅  
步清音遠心高韻鷓鸞以降罕見其儔而鏃翮  
牆陰偶影獨立唼喋粃稗雞鷺爲伍不亦傷乎  
余五十之年忽焉已至永言身事慨然多緒乃  
爲之賦聊以自慰云

江都集禮序

潘伯彥

隋書潘徽傳晉王廣鎮揚州引徽爲  
博士令與諸儒撰江都集禮一部復  
序

禮之爲用至矣大與天地同節明與日月齊照  
源開三本體合四端巢居穴處之前即萌其理  
龜文鳥跡以後稍顯其事雖情存簡易意非玉  
帛而夏造殷因可得知也至如秩宗三禮之職  
司徒五禮之官邦國以和人神惟敬道德仁義  
非此莫成進退俯仰去茲安適若璽印塗猶防



止水豈直譬彼耕耨均斯粉澤而已哉自世屬  
坑焚時移漢魏叔孫通之碩解高堂隆之博識  
專門者霧集制作者風馳節文頗備枝條互起  
皇帝負辰垂旒辨方正位纂勛華之曆象綴文  
武之憲章車書之所會通觸境斯應雲雨之所  
霑潤無思不遘東探石簣之符西蠹羽陵之策  
鳴鑾太室偃伯靈臺樂備五常禮兼八代上柱  
國太尉揚州總管晉王握珪璋之寶履神明之  
德隆化讚傑藏用顯仁地居周邵業冠河楚允

文允武多才多藝戎衣而籠關塞朝服而掃江  
湖收杞梓之才闢康莊之館加以佃漁六學網  
羅百氏繼稷下之絕軌弘泗上之淪風賸無隱  
而不探事有難而必綜至於采標綠錯華垂丹  
篆刑名長短儒墨是非書圃翰林之域理窟談  
叢之內謁者所求之餘侍醫所校之逸莫不澄  
涇辨渭拾珠棄蚌以爲質文遞改損益不同明  
堂曲臺之記南宮東觀之說鄭王徐賀之答崔  
譙何庾之論簡牒雖盈菁華蓋鮮乃以宣條暇



日聽訟餘晨娛情窺寶之鄉凝相觀濤之岸揔括油素躬披緗縹芟蕪刈楚振領提綱去其繁雜撮其指要勒成一家名曰江都集禮凡十二帙一百二十卷取方月數用比星周軍國之義存焉人倫之紀備矣昔者龜蒙令后睢渙名藩誠復出警入蹕擬乘輿之制度建韜載旂用天子之禮樂求諸述作未聞茲典方可韜之類水副彼名山見刻石之非工唄懸金之已陋是知沛王通論不獨擅於前修寧朔新書更追慙於往冊徽幸棲仁岳忝遊聖海謬承恩獎敢叙該博之致云





一  
二  
三  
四  
五  
六  
七  
八  
九  
十  
十一  
十二  
十三  
十四  
十五  
十六  
十七  
十八  
十九  
二十  
二十一  
二十二  
二十三  
二十四  
二十五  
二十六  
二十七  
二十八  
二十九  
三十  
三十一  
三十二  
三十三  
三十四  
三十五  
三十六  
三十七  
三十八  
三十九  
四十  
四十一  
四十二  
四十三  
四十四  
四十五  
四十六  
四十七  
四十八  
四十九  
五十  
五十一  
五十二  
五十三  
五十四  
五十五  
五十六  
五十七  
五十八  
五十九  
六十  
六十一  
六十二  
六十三  
六十四  
六十五  
六十六  
六十七  
六十八  
六十九  
七十  
七十一  
七十二  
七十三  
七十四  
七十五  
七十六  
七十七  
七十八  
七十九  
八十  
八十一  
八十二  
八十三  
八十四  
八十五  
八十六  
八十七  
八十八  
八十九  
九十  
九十一  
九十二  
九十三  
九十四  
九十五  
九十六  
九十七  
九十八  
九十九  
一百



續文選卷之十一

武原胡震亨孝轅撰

頌

菩提樹頌 并序


梁簡文帝

西域記曰摩竭國有菩提樹即畢鉢羅樹昔佛在世高數百尺佛坐其下成等正覺因謂之菩提樹焉莖幹黃白枝葉青翠冬夏不凋光鮮無變梵云菩提此云道也武帝勅答覽所上菩提樹頌裙採致佳辭味清淨

竊以因緣假有衆生之滯根法本不然至人之



國家圖書館, NATIONAL CENTRAL LIBRARY, TAIWAN, R.O.C.





妙理是以三界六趣遶業障而自迷八解十智  
導歸宗而虛豁是以能仁大師隨緣布道愍  
宅之既焚傷欲流之永驚託白淨之宮照黃金  
之色居茲三惑示畫篋之非真出彼四門驚浮  
雲之易滅於是佛日啓法雷震設漸教降權迹  
三寶現世一道知歸大接羣蒼救茲未度法雨  
法水之潤等世界於無邊智燈智炬之光同虛  
空於莫限物因難量化緣將息林開白樹日映  
青枝悲哉六識沈淪八苦不有大聖誰拯慧橋

皇帝體乾元之叡德含天地之純誠照玉鏡之  
神握太平之運吞虞孕夏罩漢籠周御六氣而  
子蒼生扇二儀而布亭毒緯樂經禮偃武修文  
秋荼不設廢九律之嚴科春雨愛生解三驅之  
密網固以咸池之靈自失汾水之德知慙少陽  
懋善於元真蕃臣燮和於槐袞八凱三座九棘  
四科之士內宣王事運策橫行專城推轂之將  
外守封疆一同文軌萬方共貫穿胷鏤臆之首  
短身長臂之師南越鑠石北極天沙東邁日枝



西踰月紀莫不梯峰挂迥越繩度之山航海跨  
深汎浮毛之浪奉方入貢進忠請職獻同心之  
鳥貢比肩之獸爾乃嘉祥競發寶瑞咸委靈芝  
滴露月萃郊園義鳳仁虎日聞郡國如珠如璧  
既照燭於中畿若雲非雲亦徘徊於官雉於是  
驅黎民於仁壽濟動植於幽隍歲樂民殷家給  
戶足斑白不提挈童稚有謳歌從善如流應風  
猶草開農務本鑄刃銷鋒紅粒盈箱青蚨委貫  
上照天下漏泉天既成矣地既平矣天子乃均

一子愍四先示正行之因標出要之路廣設道  
場大弘妙法涅槃寶棹接惑衆於背流慈悲光  
明照羣迷於未曉法輪遍乎大千清涼被於小  
葉故天人舞鳳去照園而讚善菩薩飛象越香  
土而來儀五百寶蓋騰光自合十千纓絡懸空  
下墜龕室莊嚴國界殊特製三時之殿聳四柱  
之臺雖漢后望神之宮軒轅待仙之觀曾何足  
擬髣髴寶雲儀形等覺於是想成道之初建菩  
提之樹四海呈珍百工薦巧雕金鏤碧綴鏡懸



珠製似雪山形同飛蓋四布垂陰五面益物名  
高滿月德踰普覆竝豔千光之樹連英五色之  
華璧日垂彩玉蒂生煙微風徐動寶枝成樂儼  
然妙色蔭此曲枝顯若金山尊如聚月信女百  
味之初諸天四鉢之狀散漫祥草連翩青雀伏  
吐電之魔却擔山之鬼竒姿瓌質不可勝言此  
實生善之妙緣進行之深福當今盛美曩代未  
聞方應照德不窮懸諸日月巍巍永樂萬萬斯  
年敢作頌曰

綿史載觀靈篇鈔鏡寶冊歲蕤帝圖掩映鳥紀  
稱祥龍書表慶九州布德五絃作詠蒸哉至矣  
有梁啓聖功覆終古業高受命金輪降道玉衡  
齊政無思不服有德斯盛一乘運出五眼清淨  
稟識康歌昆蟲得性舜厨靈蓮堯庭神莢豈如  
道樹覆潤弘浹靡密垂光芬芳委疊時動百華  
乍開千葉現彼法身圖茲瑞牒海度六舟城安  
四攝惠澤旣播淳風普叶休明智境清朗法泉  
百神嗟仰千佛稱傳榮光動照玉燭調年菩提



永立波若長宣穆穆明后萬壽如天

大法頌 并序

梁簡文帝

武帝勅答云見所製大法頌詞義兼美覽以欣然帝弟邵陵王啓云慈鋒靈壯妙難縱橫高門洞啓不因洞馬之飾寶殿霞開寧假鳳皇之瑞雖復長卿壯詞曾何足數于雲妙句此北齊如頌稱帝受命三十有二歲當是中大通五年梁書南史並云二月癸未上幸同泰寺設四部大會升法座講經題記於巴丑今云

皇帝以湛然法身不捨本誓神力示現降應茲  
土龍顏日角參漏重瞳衡表連珠文爲玉斗自  
納麓開基天地之德已布封唐啓跡日月之照  
先明百揆之序方舜九河之導均禹尚弘事殷  
之禮且屈在田之則自五鼎朝飛告赤文之瑞  
其雨七日受綠色之符神器有歸鼎運斯集焦  
門厭棄德之君鮪水發白旄之陣然後受皇天  
之睠命當四海之樂推豈假祀蚩尤於沛庭託  
河水於王霸於時鳳凰裂序蒼蒼舛度乃選五



石以補之。坤軸傾斜，積水發坼，乃緯九藪而正之。陰兔兩重，陽鳥三足，乃定王業以暉之。攝提乖方，孟陬失紀，乃置清臺而辨之。維冠冕於已頽，綴珩珮於旣毀。自憑玉几，握天鏡履璿璣而端拱。居巖廊而淵默於今三十有二載也。是以天地一於上，地數二於下。復朗參辰，不易日月。兩曜如合璧，五精如連珠。禋宗類昊，虔丘禮澤。敬行五祀，功被百神。川嶽呈祥，風煙効祉。青雲干呂，黃氣出翼。聽隃山之威鳳，製大夏之貞筠。

陽管叶春，雌鍾應律。上林之課，匪疎相府之占。無謬奏六英於若水，張咸池於洞庭。秉翟動和天之樂，建華宣易俗之奏。協律有颯颯之序，典樂致雍雍之節。詩書乃陳，緇縹斯備。蒲輪受伏生之誦，科斗薦魯宅之文。蒸栗殺青，玉牒石記。填委廣內，暉煥麒麟。置台命袞，法河依嶽。建職樹司，區雲祥火。高山容與，赤黻邈迤。色麗文翬，章研織鳥。諫鼓高懸，芻言不棄。肺石通惋，書誨橋板。草名指佞，便辟去朝。獸稱觸罪，姦回放黜。



是以龍翔鳳集河濂海夷露下若飴泉浮如醴  
桂薪不斧而丹甌自熟玉臯詎牽而銀甕斯滿  
河光似羃樹彩成車氛氲四照暉麗五色神明  
磊砢徵祥布濩金鱗鐵面貢碧磬之縣航海梯  
山奉白環之使戴日戴斗靡不來王太平太蒙  
無思不服方叔邵虎之臣均輦應鼓之將素龍  
虎之秘韜握朱玄之異略受賑於廟堂之上揚  
威於關塞之下出玉門而直指度金城而奏策  
蕩雜種之殘妖匡中原之塗炭北臨地脉西出

天渠昆夷罷患夙沙自服獲犬戎之鹿懸密須  
之鼓藁街有受纓之虜詔水觀受降之首四表  
無塵六合共貫皇德隆矣太平之風浹乎無外  
矣天子內韜無生之至慧外應體乾之弘跡將  
欲改權教示實道遣方便之說導化城之迷乃  
端展神居吁而言曰若夫眇夢華胥怡然姑射  
服齊宮於玄扈想至治於汾陽輕九鼎於褰裳  
視萬乘如脫屣斯蓋示至公之要道未臻於出  
世也至於藏金玉於川岫棄琴瑟乎大壑卑躬



非食茨堂土階彤車非巧鹿裘靡飾斯蓋示物  
以儉亦未階於出世也解網放禽穿泉掩齧起  
泣辜之澤行扇暘之慈推溝之念有如不足納  
隍之心無忘宿寤蓋所以示物以爲仁亦未階  
乎出世也紫府青丘陁山障水敦河上之道文  
悅岐伯之章句甘泉啓太一之壇嵩山置奉高  
之邑碣石刻羨門之誓不期作交門之歌斯蓋  
止愛久齡事在諸已篤而爲論彌有未弘雖獲  
龍從之禪終墮長生之難徒階三清之樂不祛

八倒之境豈若燃智慧之炬照生死之闇出五  
陰之聚升六度之舟浮衆德之海踐不生之岸  
於是莊嚴國界建立道場廣行利益開闡佛事  
驅彼衆生同濟仁壽引茲具縛俱入大乘九有  
傾心十方草靡如憑津濟咸賴歸依擘乎若朝  
日之開衆華需乎若農夫之遇膏雨功德之翼  
已圓智慧之門必備以爲般若經者方等大法  
峻極靡際深邃無底籠萬善乎無相兆九垓而  
無邊譬猶枝川派別入大海而同味衆芳雜彩



到須彌而一色空空不著如如俱會不合不散  
無去無來種覺可生允茲佛母羣典弗逮是號  
經王乃欲震一音雨法雨示五眼引重昏昭暘  
紀歲玄枵次星夾鍾應乎仲春甲申在乎吉日  
將幸同泰大轉法輪茲寺者我皇之所建立改  
大理之署成伽藍之所化鐵繩爲金沼變鐵網  
爲香城照神光於熱沙起清涼於炎火千櫨截  
孽百栱穹隆紅壁玄梁華榱玉砌三階齊列四  
注周流上玉翼而捫天飛銀櫺而蔽景虹拖蜿

垂承蕙繞檣蓮抽井倒冒宇臨窻彤彤寶塔旣  
等法華之座峩峩長表更同意樂之國下鑿白  
銀之塹傍暉金薄之輒高門洞啓不因銅馬之  
飾寶殿霞開無假鳳皇之瑞金輪燭日妙臨淄  
之地下層臺累駕邁宛委之空飛夏宇凝霜溫  
室含煖雕樓之內滴動而響生洞扉之裏鷓歸  
而氣激幢號摩尼旛懸金縷盤徑十丈鈴圍四  
斛舒七寶之交枝流八功之淨水地芝候月天  
華逆風法鼓夜鳴聲中聞法瓊枝旦動葉裏成



音妙德陽之宮麗未央之闔故銅櫺三丈追嗤  
井幹玉樓十二遙恥神仙譬彼清涼之臺同符  
蘭臺之寺忉利照園之東帝釋天城之北故以  
辛壬癸甲綿蠻霍霍吁哉其不可狀鏘鏘盱盱  
瓌譎雜錯逸乎其不可名於是璧日揚精景雲  
麗色薰風徐動淵露微垂後距屯威前茆警列  
武校星連鴻鐘吐響運天宮之法駕啓天路之  
威神百靈扶持千乘雷動六虬齊軫七斗垂暉  
雲罕乘空勾陳翼駕超光躡景日被天迴金蓋

玉輦豹服鼉鼓馘驪沃若天馬半漢綠弓黃弩  
象飾魚文攸飛案節不勞斬蛟之劍虎賁弋羽  
豈假鳴鳥之射湛湛奕奕麟赫出乎大通  
之門天子降彫輦之貴行接足之禮頂拜金山  
歸依月面如聞萬歲之聲若觀六變之動於是  
乃披如來之衣登師子之座均百慮之紛總愍  
三請之慇懃啓真慧之深宗明度彼之弘教二  
諦現空有之津二智包權實之底大乘豁其靡  
礙道心究其歸涯因果之攝不運而行真俗莫



求弗動斯到不以二法會乎中道盡佛淵海入  
佛法藏極修妬之妙典研龍宮之秘法宣娑婆  
之奧旨闡衆聖之微言正水旣沾邪難自息慧  
日普照毒霜並消除黑闇於四生遣無明於三  
界巍巍乎若彌樓之在巨海穆穆乎譬衆星之  
繞圓月於時天龍八部側塞空界積衣成座散  
華至膝三千化穢土之質火宅有離苦之期惡  
道蒙休泥犁普息誅誅學侶濟濟名僧皆樂說  
如辯才智慧如身子踰乎青目黑齒高彼廣膝

赤髭咸符寫瓶之思並沾滌氈之施如金復冶  
似玉更彫聞所未聞得未曾得鬱搖動色請益  
無倦百司具列簪履相趨豐豹焜煌華綬苒蕪  
謂舍衛之集大林之講無以過也將令一一佛  
性逢了因而俱出一一佛土咸遣二而除三比  
夫歌南風尚黃老臨辟雍講孔宅么麼安足而  
語哉距于三月甲辰法席圓滿如來放大光明  
現希有事雄雄吐色珠火非儔瞳瞳上映丹紫  
競發榮河恥其祥潤汾陰陋其暉影掩入殿之



紫雲奪鴻門之妙氣昔法華初唱毫照普林般  
若聿宣通身盡笑王城之瑞千載更逢豈非聖  
主同諸佛身降茲妙相等諸佛力若符契焉猶  
秉淵默之謙虛弘懍焉之至誠爲而不宰推而  
勿居以百姓之心爲心非關諸已荷負無倦攝  
受四生皇太子臣綱視膳東廂親承大法以爲  
西巡東狩讚頌以興柴山望祀詠歌斯作况頂  
開而受露鞠躬而聞道敢述盛德之形容以爲  
頌曰

玉牒悠負青史綿長道泐五勝風殊百王商丘  
命瑱姬水開瓊河澄待聖海謚期皇方天譬地  
功歸有梁垂拱南面克已巖廊權輿教義製造  
衣裳九韶革響六樂改張儀鳳婉婉擊石鏘鏘  
廣修壁水洞啓膠庠輕輶徵聘旌帛搜揚蘭臺  
且富廣內斯藏芸香馥蘭綠字摘章文功旣被  
武跡斯彰題雕臆鏤舌紫支黃南街請質北闕  
來王飛旌集翰勒跡書狼銀車引附黑節招荒  
文同海截化普龍鄉西踰月窟東漸扶桑卑宮



類禹解網如湯衢室納異明臺引良善旌弗卷  
諫鼓其鏜萬符集祉百神啓祥黑丹吐潤朱草  
舒芳珠懷鏡像星含喜光液池下鶴高梧集鳳  
赤羆旦繞素雉朝翔觀玉伯友訪道西王遊經  
建木巡指盛唐終非運出豈曰津梁我有無礙  
共向圓常玉鑿徐動金輪曉莊紫虬翼軼綠驥  
騰驤虎文駐蹕龍驂啓行闌干玉馬照曜天狼  
玄旄映日翠鳳晞暘前飛格澤後擁陸梁風移  
霆掃參差焜煌峩峩寶座郁郁名香法徒學侶  
塵沙堵墻慈雲吐澤法雨垂涼三密不限四辯  
難量猶茲海寶譬彼山王慧流總被藥木開芒  
佛日出世同遣惑霜帝釋歌詠幽祇讚揚空華  
競下天琴日張山含影色地入毫光非煙繞氣  
陸藕開房澤普三界恩均八方巍巍堂堂爲舟  
爲航伊臣稽首萬壽無疆

馬寶頌

并序

梁簡文帝

樓炭經曰轉輪王時自然生馬寶王  
明旦見自然緝色馬在前身青毛衣



滑澤頭黑與馬師調即時調好日未  
出騎出宮門飛行遶四海內即日還  
宮 梁書太清元年三月庚子高祖  
幸同泰寺捨身公卿等以錢一億萬  
奉贖四月丁亥還宮五月丁酉輿駕  
幸德陽堂宴羣臣設絲竹樂南史云  
是月神馬出  
皇太子獻頌

皇帝應百姓之心副四海之願復履玉衡還臨  
億兆天地交泰日月貞明至理維新隆平方始  
遐邇壹體中外禔福含生欣欣若耘耰之逢夏  
雨懷情坎坎譬草木之值春風帝王之道超邁  
開闢睿聖之功殫曆遠古軒羲不足鑿柄堯舜

不足憲章至哉大哉無得而稱也五月丁酉朔  
絲竹會於德陽之堂于時日進內宮星次鶉首  
仲夏之晷稍極陽城之圭蕤賓之鍾初應潁川  
之律縉雲旦卷南風晚扇惠氣入帷清陰周宇  
玉輿雲罕照日充庭羽林中權分階列校簪笏  
成行貂纓在席昭天之樂金石鏗鏘報地之禮  
威儀肅省詔以馬寶示羣臣太僕効官趣馬掌  
贊三令五申丞聯事舉八麗四圍給役相趨暉  
煜金鑣陸離寶勒天地無疆之德永星致遠之



功鸞眇善鳴龍儀美稱沸毅權竒之威趨摠抑  
揚之態足轉驚電眼流含燭霧噴紛霏流沫飄  
灑數千爲壽豈待原蠶之禁萬里一息不藉杜  
衡之草王良不能控其衡策伯樂不能辨其文  
機方知總轡崑岑周非吾馭張樂大野夏有慙  
德豈止沉河用璧獨有綠文之稱盛德在木偏  
受蒼龍之名至於干將寶劍遙服晉鄭之軍蓮  
花烏玉騰威大海之際况乎馬寶義實踰之方  
當夙沙自歸滑橋屈膝欵關入塞偃武修文去

病無出師之勞克國罷議邊之略五律成珍九  
河如鏡臣謹按瑞應經彌勒成佛經中阿含經  
覽愚經並稱第三之馬者三千歲華子云堯漢  
皆得馬者堯漢皆火德正斗南方乘德而至也  
豈非聖德汪濊皇風洋溢研機洞元備禮達義  
是以天不愛道白馬嘶風王澤効祥朱鬣降祉  
比夫圓蹄方足躑躅在郊風嘯電奔聲遨處囿  
五彩依樹三雀登巢安髣髴於當今弗擬議於  
休應百辟卿士咸稱萬歲伊臣不佞結慶雲霄



親承詔旨預觀寶瑞手舞足蹈贊揚不足宴禮  
斯畢退而作頌其辭曰

帝廣運德欽明儀郊升道形聲德爲軌仁作經  
璇璣正太階平割五禮和六英開四攝行八政  
轉輪皇飛行聖愍含識資惠命引蒼生歸法性  
菩提真般若淨七寶均萬邦寧逖惇史觀陳詩  
域中大唯聖期間玄妙復孝慈解流澤隨囚時  
刑已措績咸熙三農盛九穀滋萬祇悅八神怡  
律有節曆得天景星曜慶雲連珠爲月醴爲泉

民何幸值皇年乾道應坤馬來度玉關升玉臺  
鏤錫煥鸞鑣迴槃雲轉堞塵開千天駟百龍媒  
永伏阜掃駒駉秣瑶粟委芳芻九夷欵四表清  
毗胥樂輿頌興

神雀頌

并序

許務本

隋書許善心傳曰開皇十六年有神  
雀降於含章闈高祖召百官賜讌告  
以此瑞善心於座請紙筆製神雀頌  
奏之高祖甚悅曰我見神雀共皇后  
觀之今旦召公等入適述此事善心  
於座始知即能成頌文不加點筆不



續文選卷一  
停毫常聞此言今見  
其事因賜物二百段

臣聞觀象則天乾元合其德觀法審地域大表  
其尊雨施雲行四時所以生殺川流岳立萬物  
於是裁成出震乘離之君紀鳳司鳳之后玉錘  
玉斗而降金版金滕以傳並陶冶性靈含煦動  
植眇玄珠於赤水寂明鏡乎虛堂莫不景福氤  
氲嘉貺龕集馳聲南薰越響雲韶粵我皇帝之  
君臨闡大方抗太極負鳳邸據龍圖不言行焉  
攝提建指不肅清焉喉鈴啓閉括地復夏截海

翦商就望體其尊登咸昌其會綿區浹宇遐至  
邇安騰實飛聲直暢傍施無體之禮威儀布政  
之宮無聲之樂綴兆總章之觀上庠養老躬問  
百年下土字民心爲百姓月棲日浴熱坂寒門  
吹鱗沒羽之荒赤虵青馬之齋解辯請吏削衽  
承風豈止呼韓北場頰勒狼居之岫熄慎南境  
近表不耐之城故使天不愛道地寧恡寶川岳  
展異幽顯效靈狎素游頰團膏漱醴半景青赤  
孳歷虧盈足足懷仁般般擾義祥祐之來若此



升降之化如彼而登封盛典云亭佇白檢之儀  
致治成功柴燎靡玄珪之告雖奉常定禮武騎  
草文天子抑而未行推而不有允恭克讓其在  
斯乎七十二君信蔑如也故神禽顯賁玄應特  
昭白爵主鐵象之奇赤爵銜丹書之貴班固神  
爵之頌履武戴文曹植嘉爵之篇棲庭集牖未  
若于飛武帳來賀文槐刷彩青蒲將翔赤罽玉  
几朝御取翫軒楯之間金門旦開兼留暈翟之  
鑿終古曠世未或前聞福召冥徵得之茲日歲

次上章律諧大呂玄枵會節玄英統時至尊未  
明求衣晨興於含章之殿爰有瑞雀翱翔而下  
載行載止當辰宁而徐前來集來儀乘軒墀而  
顧步夫瑞者符也聖主之休徵雀者爵也聖人  
之大寶謹按考異郵曰軒轅有黃爵赤頭立日  
傍占云土精之應又禮稽命徵云祭祀合宜則  
黃爵集音漢集泰時之殿魏下文昌之宮一見  
雍丘之祠三入平東之府並旁觀迴矚事陋人  
微奚足稱矣抑又聞之不剗胎剖卵則鸞鳳馴




鳴不漉浸焚原則螭龍盤蜿是知陛下止殺故  
飛走宅心皇慈好生而浮潛育德臣面奉綸綍  
垂示休祥預承嘉宴不勝藻躍李虔僻處西土  
陸機少長東隅微臣慙於往賢逢時盛乎曩代  
輒竭庸瑣敢獻頌云

太素式肇大德資生功玄不器道要無名質文  
鼎革沿習因成祥圖瑞史赫赫明明天保大定  
於鑠我君武義迺武文教惟文橫塞宇宙旁凝  
射汾軒物重造姚風冉薰煥發王策昭彰帝道  
御地七神飛天五老山祗吐秘河靈孕寶黑羽  
升壇青麟伏阜丹鳥流火白雉從風棲阿德邵  
鳴岐祚隆未如神爵近賀王宮五靈何有百福  
攸同孔圖獻赤荀文表白節節竒音行行瑞迹  
化玉黼展銜環陞戟上天之命明神所格綏應  
在旃伊臣頌焉永緝丹素方流管絃頌歌不足  
蹈舞無宣臣拜稽首億萬斯年



續文選卷之十一

國家圖書館, NATIONAL CENTRAL LIBRARY, TAIWAN, R.O.C



續文選卷之十一

十一



續文選卷之十二

武原胡震亨孝轅撰

贊

鶴讚

并序

庾子山

武成二年春三月雙白鶴飛集上林園大將鄭  
偉布弋設置竝皆禽獲六翮已摧雙心俱怨相  
顧哀鳴孤雄先絕孀妻向影天子愍焉信奏事  
階墀立使爲讚



九臯遙集三山迥歸華亭別喚洛浦仙飛不防  
離繳先遭合圍籠摧月羽弋碎霜衣塞傳餘號  
關承舊名南遊湘水東入遼城雲飛欲舞露落  
先鳴六翮摧折九門嚴閉相顧哀鳴肝心斷絕  
松上長悲琴中永別

法供贊二首

江揔持

華聚陀羅尼經云佛言若復有人見  
如來塔廟能持一華一燈供養欲使  
此人墮三惡  
道終無是處

池中寶華葉覆金沙逆風氣亂映水光斜散由  
天女賣乃王家若生心樹願結因芽

華贊

寶燈夜開影遍花臺煙抽細燄燼落輕灰珠慙  
色竝月恥光來一明暗室若遣塵埃

燈贊

符命

通明引識乍同字謎君懋獻奏劣  
比怪錄遂令馬楊偉構千載鬱絕

史論

齊書文學傳論

蕭景陽

傳載丘靈鞠檀超下彬丘巨源王智  
深陸厥崔慰祖王遂之祖冲之賈淵



十人沈論屬  
文工拙之數

史臣曰文章者蓋情性之風標神明之律呂也  
蘊思含毫遊心內運放言落紙氣韻天成莫不  
稟以生靈遷乎愛嗜機見殊門賞悟紛雜若子  
桓之品藻人才仲治之區判文體陸機辨於文  
賦李充論於翰林張昶摘句褒貶顏延圖寫情  
興各任懷抱共爲權衡屬文之道事出神思感  
召無象變化不窮俱五聲之音響而出言異句  
等萬物之情狀而下筆殊形吟詠規範本之雅

什流分條散各以言區若陳思代馬羣章王粲  
飛鸞諸製四言之美前超後絕少卿離辭五言  
才骨難與爭鶩桂林湘水平子之華篇飛館玉  
池魏文之麗篆七言之作非此誰先卿雲巨麗  
升堂冠冕張左恢廓登高不繼賦貴披陳未或  
加矣顯宗之述傳毅簡文之摘彥伯分言制句  
多得頌體裴顧內侍元規鳳池子章以來章表  
之選孫綽之碑嗣伯喈之後謝莊之誄起安仁  
之塵顏延楊瓚自比馬督以多稱貴歸莊爲允



王褒僮約束暫發蒙滑稽之流亦可竒瑋五言之製獨秀衆品習玩爲理事久則瀆在乎文章彌患凡舊若無新變不能代雄建安一體典論短長互出潘陸齊名機岳之文永異江左風味盛道家之言郭璞舉其靈變許詢極其名理仲文玄氣猶不盡除謝混情新得名未盛顏謝並起乃各擅竒休鮑後出咸亦標世朱藍共妍不相祖述今之文章作者雖衆摠而爲論略有三體一則啓心閑繹托辭華曠雖存巧綺終致迂

回宜登公宴本凡准的而疎慢闡緩膏肓之病與正可採酷不入情此體之源出靈運而成也次則緝事比類非對不發博物可嘉職成拘制或全借古語用申今情崎嶇牽引直爲偶說唯觀事例頓失清采此則傳咸五經應璩指事雖不全似可以類從次則發唱驚挺操調險急雕藻淫豔傾炫心魂亦猶五色之有紅紫八音之有鄭衛斯鮑照之遺烈也三體之外請試妄談若夫委自天機參之史傳應思悱來勿先構聚







者之在山何殊別哉故樊英就徵不稱李固之  
望馮恢下節見陋張華之語期之塵外庶以弘  
多若今十餘子者仕不求聞退不譏俗全身幽  
履服道儒門斯逸民之軌操故綴爲高逸篇云  
爾

### 魏書僭偽傳論

#### 魏伯起

匈奴劉聰羯胡石勒鐵弗劉虎徒何  
慕容廆臨渭氏苻健羗姚萇略陽氏  
呂光僭晉司馬叡賓李雄島夷桓玄  
海夷馮跋島夷劉裕島夷蕭道成島

夷蕭衍私署涼州牧張寔鮮卑乞伏  
國仁鮮卑秃髮烏孤私署涼王李暹  
盧木胡沮  
渠蒙遜

夫帝皇者配德兩儀家有四海所謂天無二日  
土無二王者也三代以往守在海外秦吞列國  
漢并天下逮桓靈失政九州瓦解曹武削平寇  
難魏文奄有中原於是僞孫假命於江吳僭劉  
盜名於岷蜀何則戎方椎髻之帥夷俗斷髮之  
魁世崇凶德罕聞王道扇以跋扈忻從放命加  
以中州避地華士違讎思託號令之聲念邀風



一／續文選卷三  
六  
塵之際因虞候隙仍相君長偷名竊位脅息一  
隅至乃指言井絡假上帝之社妄說黃旗云人  
君之氣論土不出江漢語地僅接褒斜而謂握  
皇符秉帝籍三分鼎立比蹤王者溺人必笑其  
在茲乎若是鼈靈可擬於周王夫差容比於漢  
祖尉佗定黃屋之尊子陽成綰璽之貴豈其然  
哉及鍾會一將之威士治偏師之勢而使騾車  
西至侯蓋北首天人弗許斷可知焉晉年不永  
時逢喪亂異類羣飛姦凶角逐內難興於戚屬

外漏結於藩維劉淵一唱石勒繼響二帝沈淪  
兩都傾覆徒何仍釁氏羌襲梗夷楚喧聒於江  
淮胡虜叛換於瓜涼兼有張赫山河之間顧恃  
盜海之曲各言應曆數人謂遷圖鼎或更相吞  
噬迭爲驅除或狼戾未馴俟我斧鉞太祖奮風  
霜於參合鼓雷電於中山黃河以北靡然歸順  
矣世祖獻略潛舉靈武獨斷以夫僭僞未夷九  
域尚阻慨然有混一之志旣而戎車歲駕神兵  
四出全國克敵伐罪弔民遂使專制令擅威福



者西自流沙東極滄海莫不授館於東門懸首  
於北闕矣惟夫窮髮遺虜未拔根株徼垂殘狡  
尚餘栽蘖而北踰翰漠折其肩髀南極江湖抽  
其腸胃雖骸骨僅存脂膏咸盡視息纔舉魂魄  
久遊高祖聖敬時乘遷居改作日轉雲移風行  
電掃辮髮之渠非逃則附卉服之長琛賫繼入  
猶以侍子不至取亂乘機五牛一指六師騁路  
馘其武臣驍帥傾其湯池石城向使時無穀塘  
之禍民無鼎湖之思北可焚穹廬收服匿削引

弓之左衽苑龍荒以牧馬南則翼鼃鼃暴鯨鯢  
變水處之文身化鳥言於人俗矣尋以壽春內  
欵華陽稽服叢彼江陰憂於繫頸肅宗以冲年  
踐祚俄則母后當陽務崇寬政取和朝野置荒  
遐於度外譬蠻夷於雞肋而黠狄淪胥種落離  
貳虜帥飄然窮而歸我矜其眼目愍厥顛亡反  
之於故庭復之以保塞魏道將虧禍出權幸事  
僻於中民驚於外疆場崩騰藩籬傾駭陰朔委  
命之倫雲蒸霧合上失其道下極其難政亂如



風草師亡猶彈丸十數年間中區殄悴而江湄  
巨狡窺覲上國虺虺肆毒竊我邊鄙氈裘相率  
馬首南向白山灑水狐鼠羣遊魏德雖衰天命  
未改援墜扶危齊武電發屈身宰世大濟橫流  
和戎略遠用謀急病輶軒四指喻以德音爾乃  
舟車接次駝驢銜尾烽柝不警尉候空設而水  
鄉大猾好利忘信納我逋叛共爲舉斧遂有寒  
山之戰渦陽之克糾合僭楚覆其巢穴衍以餒  
卒綱實鳩死獯虜那瓌尋亦殲殪自二百許年  
僭盜多矣天道人事卒有歸焉猶衆星環於斗  
極百川之赴溟海今摠其僭僞列於國籍俾後  
之好事知僭盜之終始焉

史述贊

例惟入蕭齊書作者形似蕭宗而振采送韻方當揖其驚挺

論

史傳篇

劉彥和

史通曰辭人屬文其體非一後來祖述識昧圓通家有詆訶人相倚撫故劉勰文心生焉本書五十篇篇系以贊



開闢草昧歲紀綿邈居今識古其載籍乎軒轅  
之世史有蒼頡主文之職其來久矣曲禮曰史  
載筆左右史者使也執筆左右使之謂也古者  
左史記事右史記言言經則尚書事經則春秋  
也唐虞流於典謨商夏被於誥誓洎周命惟新  
姬公定法紬三正以班曆貫四時以聯事諸侯  
建邦各有國史彰善癉惡樹之風聲自平王微  
弱政不及雅憲章散紊彞倫攸斁夫子閔王道  
之缺傷斯文之墜靜居以歎鳳臨衢而泣麟於

是就大師以正雅頌因魯史以修春秋舉得失  
以表黜陟徵存亡以標勸戒褒見一字貴踰軒  
冕貶在片言誅深斧鉞然睿旨幽秘經文婉約  
丘明同恥實得微言乃原始要終創爲傳體傳  
者轉也轉受經旨以授於後實聖文之羽翮記  
籍之冠冕也至從橫之世史職猶存秦并七王  
而戰國有策蓋錄而弗叙故即簡爲名也漢滅  
嬴項武功積年陸賈稽古作楚漢春秋爰及史  
談世惟執簡子長繼志甄序帝勅比堯稱典則



位雜中賢法孔題經則文非元聖故式呂覽通  
號曰紀紀綱之號亦宏稱也故本紀以述皇王  
列傳以總侯伯八書以鋪政體十表以譜年爵  
雖殊古式而得事序焉爾其實錄無隱之旨博  
雅弘辨之才愛竒反經之尤條例踳落之失叔  
皮論之詳矣及班固述漢因循前業觀史遷之  
辭思實過半其十志該富讚序弘麗儒雅彬彬  
信有遺味至於宗經矩聖之典端緒豐贍之功  
遺親攘善之罪徵賄鬻筆之憊公理辨之究矣

觀夫左氏綴事附經間出於文爲約而氏族難  
明及史遷各傳人始區詳而易覽述者宗焉及  
孝惠委機呂后攝政班史立紀並違經實何則  
庖犧以來未聞女帝者也漢運所值難爲後法  
牝雞無晨武王首誓婦無與國齊桓著盟宣后  
亂秦呂氏危漢豈惟政事難假亦名號宜慎矣  
張衡司史而惑同遷固元平二后欲爲立紀謬  
亦甚矣尋子弘雖僞要當孝惠之嗣孺子誠微  
實繼平帝之體二子可紀何有於二后哉至於



後漢紀傳發源東觀袁張所制偏駁不倫薛謝之作疎謬少信司馬彪之詳實華嶠之準當則其冠也及魏代三雄記傳互出陽秋魏略之屬江表吳錄之類或激抗難徵或疎闊寡要惟陳壽三志文質辨洽荀張比之於遷固非妄譽也至於晉代之書繫乎著作陸機肇始而未備王韶續末而不終干寶述紀以審正得序孫盛陽秋以約舉爲能按春秋經傳舉例發凡自史漢以下莫有準的至鄧粲晉紀始立條例又撮略

漢魏憲章殷周雖湘川曲學亦有心典謨及安國立例乃鄧氏之規焉原夫載籍之作也必貫乎百姓被之千載表徵盛衰殷鑑興廢使一代之制共日月而長存王霸之跡並天地而久大是以在漢之初史職爲盛郡國文計先集太史之府欲其詳悉於體國也閱石室啓金匱抽裂帛檢殘竹欲其博練於稽古也是故立義選言宜依經以樹則勸戒予奪必附聖以居宗然後銓評昭整苛濫不作矣然紀傳爲式編年綴事



文非泛論按實而書歲遠則同異難密事積則起訖易疎斯固總會之爲難也或有同歸一事而數人分功兩記則失於複重偏舉則病於不周此又詮配之未易也故張衡摘史班之舛濫傳玄譏後漢之尤煩皆此類也若夫追述遠代代遠多僞公羊高云傳聞異辭荀悅稱錄遠略近蓋文疑則闕貴信史也然俗皆愛竒莫顧實理傳聞而欲偉其事錄遠而欲詳其跡於是棄同即異穿鑿傍說舊史所無我書則傳此訛濫

之本源而述遠之巨蠹也至於記編同時時同多詭雖定哀微辭而世情利害勲榮之家雖庸夫而盡飾連敗之士雖令德而常嗚吹霜煦露寒暑筆端此又同時之枉可歎息者也故述遠則誣矯如彼記近則回邪如此析理居正唯素心乎若乃尊賢隱諱固尼父之聖旨蓋纖瑕不能玷瑾瑜也姦慝懲戒實良史之直筆農夫見莠其必鋤也若斯之科亦萬代一準焉至於尋繁領雜之術務信棄竒之要明白頭訖之序品



酌事例之條曉其大綱則衆理可貫然史之爲  
任乃彌綸一代負海內之責而羸是非之尤秉  
筆荷擔莫此之勞遷固通矣而歷詆後世若任  
情失正文其殆哉

神思篇

劉彥和

古人云形在江海之上心存魏闕之下神思之  
謂也文之思也其神遠矣故寂然凝慮思接千  
載悄焉動容視通萬里吟咏之間吐納珠玉之

聲眉睫之前卷舒風雲之色其思理之致乎故  
思理爲妙神與物游神居胷臆而志氣統其關  
鍵物泐耳目而辭令管其樞機樞機方通則物  
無隱貌關鍵將塞則神有遯心是以陶鈞文思  
貴在虛靜疏淪五藏澡雪精神積學以儲寶酌  
理以富才研閱以窮照馴致以繹辭然後使玄  
解之宰尋聲律而定墨獨照之匠闕意象而運  
斤此蓋馭文之首術謀篇之大端夫神思方運  
萬塗競萌規矩虛位刻鏤無形登山則情滿於



山觀海則意溢於海我才之多少將與風雲而並驅矣方其搦翰氣倍辭前暨乎篇成半折心始何則意翻空而易竒言徵實而難巧也是以意授於思言授於意密則無際疎則千里或理在方寸而求之域表或義在咫尺而思隔山河是以秉心養術無務苦慮含章司契不必勞情也人之稟才遲速異分文之制體大小殊功相如含筆而腐毫揚雄輟翰而驚夢桓譚疾感於苦思王充氣竭於思慮張衡研京以十年左思

練都以一紀雖有巨文亦思之緩也淮南崇朝而賦騷枚臯應詔而成賦子建援牘如口誦仲宣舉筆似宿構阮瑀據案而制書禰衡當食而草奏雖有短篇亦思之速也若夫駿發之士心總要術敏在慮前應機立斷覃思之人情饒岐路鑒在疑後研慮方定機敏故造次而成功慮疑故愈久而致績難易雖殊並資博練若學淺而空遲才疎而徒速以斯成器未之前聞是以臨篇綴慮必有二患理鬱者苦貧辭溺者傷亂



然則博聞爲饋貧之糧貫一爲拯亂之藥博而能一亦有助乎心力矣若情數詭雜體變遷貿拙辭或孕於巧義庸事或萌於新意視布於麻雖云未費杼軸獻功煥然乃珍至於思表纖旨文外曲致言所不追筆固知止至精而後闡其妙至變而後通其數伊摯不能言鼎輪扁不能語斤其微矣乎

夸飾篇

劉彥和

夫形而上者謂之道形而下者謂之器神道難摹精言不能追其極形器易寫壯辭可得喻其真才非短長理自難易耳故自天地以降豫入聲貌文辭所被夸飾恒存雖詩書雅言風格訓世事必宜廣文亦過焉是以言峻則高高極天論狹則河不容舠說多則子孫千億稱少則民靡子遺襄陵舉滔天之目倒戈立漂杵之論辭雖已甚其義無害也且夫鴉音之醜豈有泮林而變好茶味之苦寧以周原而成飴並意深衷



讚故義成矯飾大聖所錄以垂憲章孟軻所云說詩者不以文害辭不以辭害意也自宋玉景差夸飾始盛相如憑風詭濫愈甚故上林之館奔星與宛虹入軒從禽之盛飛廉與鷦鷯俱獲及揚雄甘泉酌其餘波語瓌竒則假珍於玉樹言峻極則顛墜於鬼神至東都之比目西京之海若驗理則理無不驗窮飾則飾猶未窮矣又子雲校獵鞭宓妃以饒屈原張衡羽獵困玄冥於朔野變彼洛神旣非蝸蝸惟此水怪亦非魑

魅而虛用濫形不其疎乎此欲夸其威而其事義睽刺也至如氣貌山海體勢宮殿嵯峨揭業熠燿焜煌之狀光采煒煒而欲然聲貌岌岌其將動矣莫不因夸以成狀泐飾而得竒也於是後進之才獎氣挾聲軒翥而欲奮飛騰躑而羞跼步辭入煒燁春藻不能程其豔言在萎絕寒谷未足成其凋談歡則字與笑並論感則聲共泣借信可以發蘊而飛滯披瞽而駭聾矣然飾窮其要則心聲鋒起夸過其理則名實兩乖若



總多情貌無遺矣雖復思經千載將何易奪及離騷代興觸類而長物貌難盡故重沓舒狀於是嵯峨之類聚歲蕤之羣積矣及長卿之徒詭勢瓌聲模山範水字必魚貫所謂詩人麗則而約言辭人麗淫而繁句也至如雅詠棠華或黃或白騷述秋蘭綠葉紫莖凡摘表五色貴在時見若青黃屢出則繁而不珍自近代以來文貴則似窺情風景之上鑽貌草木之中吟詠所發志惟深遠體物爲妙功在密附故巧言切狀如

印之印泥不加雕削而曲寫毫芥故能瞻言而見貌印字而知時也然物有恒姿而思無定檢或率爾造極或精思愈疎且詩騷所標並據要害故後進銳筆怯於爭鋒莫不因方以借巧即勢以會竒善於適要則雖舊彌新矣是以四序紛迴而入興貴閑物色雖繁而析辭尚簡使味飄飄而輕舉情曄曄而更新古來辭人異代接武莫不參伍以相變因革以爲功物色盡而情有餘者曉會通也若乃山林臯壤實文思之奧



府略語則闕詳說則繁然屈平所以能洞監風  
騷之情者抑亦江山之助乎

贊曰山沓水匝樹雜雲合目既往還心亦吐納  
春日遲遲秋風颯颯情往似贈與來如答

惜時論

劉孔昭

夫停燈於缸先燄非後燄而明者不能見藏山  
於澤今形非昨形而智者不能知夫天迴日轉  
其謝如矢驥裊迅足弗能追也人之短生猶如

石火炯然以過惟立德貽愛爲不朽也昔之君  
子欲行仁義於天下則與時競馳不吝盈尺之  
璧而珍分寸之陰故大禹之趨時冠掛而不顧  
南榮之訪道踵趺而不休仲尼栖栖突不暇黔  
墨翟遑遑席不及煖皆行其德義拯世救溺立  
功垂模延芳百世今人進不知退梟腐榮華刻  
絕嗜慾被麗絃歌取媚泉石退不能披策樹勲  
毗贊明時空蝗梁黍枉沒歲華生爲無聞之人  
歿成一棺之土亦何殊草木自生自死者哉歲



續文選卷三  
之秋也涼風鳴條清露變葉則寒蟬抱樹而長  
叫吟烈悲酸瑟於落日之際何也哀其時命迫  
於嚴霜而寄悲於苑柳今日向西峰道業未就  
鬱聲於窮岫之陰無聞於休明之世已矣夫亦  
奚能不霑衿於將來染意於松煙者哉

家訓論文章

顏介

夫文章者原出五經詔命策檄生於書者也序  
述論議生於易者也歌詠賦頌生於詩者也祭

祀哀誄生於禮者也書奏箴銘生於春秋者也  
朝廷憲章軍旅誓誥敷顯仁義發明功德牧民  
建國施用多途至於陶冶性靈從容諷諫入其  
滋味亦樂事也行有餘力則可習之然而自古  
文人多陷輕薄屈原露才揚已顯暴君過宋玉  
體貌容冶見遇俳優東方曼倩滑稽不雅司馬  
長卿竊貲無操王褒過章僮約揚雄德敗美新  
李陵降辱夷虜劉歆反覆莽世傳毅黨附權門  
班固盜竊父史趙元叔抗竦過度馮敬通浮華



擯壓馬季長佞媚獲誚蔡伯喈同惡受誅吳質  
詆訶鄉里曹植悖慢犯法杜篤乞假無厭路粹  
隘狹已甚陳琳實號麤疎繁欽性無檢格劉禎  
屈強輸作王粲率躁見嫌孔融禰衡誕傲致殞  
楊修丁廙扇動取斃阮籍無禮敗俗嵇康凌物  
凶終傅玄忿鬪免官孫楚矜誇凌上陸機犯順  
履險潘岳乾沒取危顏延年負氣摧黜謝靈運  
空疎亂紀王元長凶賊自貽謝玄暉悔慢見及  
凡此諸人皆其翹秀者不能悉紀大較如此至

於帝王亦或未免自昔天子而有才華者惟漢  
武魏太祖文帝明帝宋孝武帝皆負世議非懿  
德之君也自子游子夏荀况孟軻枚乘賈誼蘇  
武張衡左思之儔有盛名而免過患者時復聞  
之但其損敗居多耳每嘗思之原其所積文章  
之體標舉與會發引性靈使人矜伐故忽於持  
操果於進取今世文士此患彌切一事愜當一  
句清巧神厲九霄志凌千載自吟自賞不覺更  
有傍人加以砂礫所傷慘於矛戟諷刺之禍速



乎風塵深宜防慮以保元吉

連珠

連珠一首

梁武帝

帝有連珠一卷沈約注又有制旨連珠十卷邵陵王綸及陸緬注今存者少

盖聞理漸其萌豈須拔岳之力物有易傷不待  
凌雲之繳是以微煦積而山飄虛弦動而隼落

連珠二首

吳叔庠

盖聞豔麗居身而以蛾眉入妬貞華炤物而以  
絕等見猜是以班姬辭寵非無妖冶之色揚子  
寂寞豈乏炫曜之才

盖聞義夫投節不必識君烈士赴危豈期要利  
是以墨子縈帶不蒙肉食之謀申胥泣血非有  
執珪之位



續文選卷之十二



國家圖書館, NATIONAL CENTRAL LIBRARY, TAIWAN, R.O.C.



續文選卷之十三

武原胡震亨孝轅撰


箴 梁帝提耳衆庶王蕭作戒儲兩並有懿稱必也彼善則凡百確切矣

後堂望美人山銘

徐孝穆

簡文帝東宮有玉帳山又自銘行雨明月二山如今之疊石者矣此山疑亦在東宮後堂銘一云庾信作陵與信並東宮學士也

高唐礙雨洛浦無舟何處相望山邊一樓峰因





五婦石是三侯險逾地肺危鄰天柱禁苑斜通  
春人恒聚樹裏聞歌枝中見舞恰對粧臺諸窻  
併開遙看已識試喚便迴豈如織女非秋不來

永陽王齋後山亭銘

江揔持

陳書永陽王伯智字策之  
世祖第十二子博涉經史

叢臺造日溜館連雲錦牆列績繡地成文吾王  
卓爾逸趣不羣梅梁蕙閣桂棟蘭枌竹深葢雨  
石暗迎曛激流疑疏構峰似削苔滑危磴藤攀

聳萼樹影搖牕池光動幕月澄遙淑風清近壑  
雪岼難消花園易落高桐百尺垂楊五株開榮  
九畹結秀三珠山條紫的水葉紅鬚抽芳繞雷  
接翠分衢亭謹旅鶴浦噪驚鳧前列枚馬後招  
申白諷誦楚詩精微沛易叢桂留賞散金匪惜  
不羨睢陽還嗤碣石馳聲終古服義無斃

誄

梁故度支尚書陸君誄

并序

江揔持



梁書陸襄傳侯景陷宮城襄逃還吳  
賊寇沒吳郡海鹽人陸黯舉義襲殺  
偽太守推襄行郡事黯與景將宋子  
仙戰敗走吳下軍各奔散襄匿墓下  
一夜憂憤卒世祖追贈侍中雲麾將  
軍以建義功追封餘干縣侯誄文未  
悉附  
出之

君諱襄字師卿吳人也祖惠徹宋車騎府法曹  
行參軍父閑揚州別駕齊永元紹曆蕭遙光謀  
反伏誅閑以州職見害子絳其日并命忠孝之  
道萃此一門襄時年十四號毀殆滅布衣蔬食  
終於身世起家著作佐郎出爲永寧縣令累遷

臨川王廬陵王法曹外兵記室入爲太子洗馬  
掌管記中書舍人管記如故爲丹陽尹丞俄遷  
太子庶子掌管記揚州治中太子家令領國子  
博士管記如故丁母顧夫人憂廬乎墓所服闋  
又從家令轉中庶子並掌管記遷中散大夫金  
華宮家令出爲鄱陽內史除尚書吏部郎秘書  
監領揚州大中正度支尚書太清二年三月京  
師傾覆君竄跡還鄉吳民陸黯起義民攻郡擾  
攘之際憂憤而終春秋七十有二余避世河澣



續文選卷十三  
暫之吳國百舍不容千里無饋陸公國士之眷  
惠好之深朝同飢粥夕共瓢飲契闊晤言流連  
晦朔日月逝矣懷古何忘臨哀能誅久願搖筆  
時事屯遭不遑削藁梁季適越未戢干戈陳世  
入仕累牽物役杼軸於懷四十餘載隋開皇九  
年於長安致仕懸車已洎就木幾何但東海成  
田南冠永繫龜山更促空想吹笛之哀馬角徒  
生絕望通波之水嗚呼哀哉攬涕操觚乃爲誄  
曰

媯苗碩茂完齋繁昌賓門穆穆筮仕鏘鏘食采  
命氏遐哉陸鄉四昇臺省八辟賢良分柯振葉  
令聞令望玄黠朱鞞翠弁金鐙流聲世祀列讚  
祠堂別駕貞烈志存名教捐生狗主知死不撓  
暉映泉壤痛此忠孝於鑠夫子積德累仁韜光  
戢耀隱璞含真居哀能痛至情通神淚枯壠樹  
哀感馴禽永慟家禍長號不辰玄黃絕睇蔬布  
終身心符屈婞室等原貧分甘共感內族外姻  
求之今古斯爲異人月下奏章螢前讀史給紙



蘭臺觀書洛市強學待問潤身爲已結髮濯纓  
登朝入仕昂昂逸驥逐日千里宛宛長離陵江  
迅起枳棘栖鳳化行乳雉平臺累陟石扇躡履  
跼伏不競芬絲自理倚席無譏師訓胄子驥足  
時務俊民斯俟秋實選能春華備美思媚儲后  
遊息承華書記策擢爵命增加彈碁擊筑沈李  
浮瓜追隨飛蓋侍從鳴笳二儀迴幹四氣淹賒  
離景遽沈前星奄滅撫已惟舊懷恩守節昔荷  
故臣攀號聲折登高能賦大夫就列金華式肇

更奉清切修竹貞松含霜抱雪下車軒日求瘼  
康時良辰坐嘯朗夜臥治懸魚化靜佩犢去思  
廣弘條教精察毫釐典選搜揚操刀密勿不紊  
朱紫傍無請謁秘署學林得人超忽延閣緝素  
校文遺闕工妙鉛槧譽成暮月鴈行攸序龍作  
簡才讓珠不拜賜劔恩來帝曰俞往爾行兼該  
金城失險玉弩流災年臻几杖病息草萊世故  
天禍臣悲主辱露盡朝陽風驚夜燭黃鵠超遙  
白駒何促事迫歸魂依然啓足悠悠世路辛苦



一編文選卷三  
五  
艱虞尋戈滿道暴骨交衢家無半菽地絕飛芻  
念君桑梓零落凋枯傷君井邑孑戾崎嶇喪亂  
絕卜葵藿荒蕪淒涼故友擗標遺孤臨穴外野  
撫棺窮途嗚呼哀哉爲善豈懼修名難假德履  
中和道周文雅不朽之迹非謂泉下疊疊清風  
泠泠獨寫嗚呼哀哉

### 盧記室誄

### 盧子行

北齊書盧詢祖范陽涿人有術學文詞華美並思道俱爲北州人俊襲祖

爵大夏男歷太子舍人司徒記室卒誄云永安鄉男有異

齊正統二年秋七月司徒記室參軍事永安鄉男范陽盧詢祖卒先民有言惟德可久抑又聞之惟名爲壽爾之無祿沒而不朽乃援弱翰告哀良友遂作誄曰

皇虛眇邈師緒蟬聯大儒漢世名公魏年司徒藹藹撫翼冲天尚書疊疊亦稱象賢若人擢秀絕後光前發榮隨浦韞耀春田爰在弱齡孤根回立內無怙恃外寡朋執行有餘力藝無不習



善價斯待香名允集下學上達鑽幽洞微九流  
百氏異軫同歸文成鍾律韻響珠璣麗詞泉涌  
壯思雲飛雄州擢第言割其楚我實褒然觀國  
而舉自茲不調多歷年所游泳儒玄從容嘿語  
納於大麓崇建府朝八紘所掩車乘翹翹我有  
明德乃應嘉招超自幕下來儀鳳條應徐並轍  
潘顧齊鑣聲華簪帶譽動朋僚逝矣江陰承風  
請朔莊生喻指季子觀樂立朝所寄俊才優學  
懸河自口靈珠在握乃參軍事仍贊中鉉大冲

所縻德施攸踐同推麗則俱謝蟲篆何才之高  
何位之鮮天下士也宜享多福豹變其文鴻漸  
于陸神之聽之于何不淑營魄遂往音儀在目  
嗚呼哀哉昔余與子分重契深譬諸投漆如彼  
斷金余慕大隱子惟陸沈等超宮閣並綴衣簪  
春臺共踐秋水偕臨還馬齊轡出蓋連陰良書  
濁酒永嘯長吟美言俱贊闕行同箴娛樂未幾  
嶮阻相尋折旣無極憂亦難任云胡不弔亡我  
知音百年已矣萬事傷心嗚呼哀哉亭伯君山



續文選卷三  
七  
並嗟湮滅荀粲王壽同悲夭折蘭菊無墜鐘鼓  
不絕之子云亡何愧前烈靈衣襲几奠酒盈杯  
故庭飛籜虛帳凝埃僕流離而涕泗駿顧慕以  
遲迴出南陽之舊道掩北邙之夜臺趙卿之銘  
已勒滕公之隴未開臨象設而不面詎幽魂之  
可來嗚呼哀哉  
哀

隋元德太子哀冊文

虞茂世

隋書元德太子昭煬帝長子年十二  
立為河南王仁壽初徙封晉王拜內  
史令兼左衛大將軍轉雍州牧大業  
元年立為皇太子明年朝帝於雒陽  
宮  
薨

維大業二年七月癸丑朔二十三日乙亥皇太  
子薨于行宮粵三年二月庚辰朔六日乙酉將  
遷座於莊陵禮也蜃綉宵載鶴關曉闢肅文物  
以具陳儼賓從其如昔皇帝悼離方之云晦嗟  
震宮之虧象顧守器以長懷臨登餽而興想先  
遠戒日占謀允從庭爨撤祖階祀收重抗銘旌



以啓路動徐輪於振容揆行授名累德彰謚爰  
詔史冊式遵典志俾濬哲之徽猷播長久乎天  
地其辭曰

宸基峻極帝緒會昌體元襲聖儀耀重光氣秀  
春陸神華少陽居周軼誦處漢韜莊有縱生知  
誕膺惟睿性道觸日幾深綺歲降迹大成俯情  
多藝樹親建國命懿作藩歲蕤先路烏奕渠門  
庸服有紀分器惟尊風動楚殿雅盛梁園睿后  
膺儲天人叶順本茂條遠基崇體峻改王參墟

奄有唐晉在貴能謙居冲益慎封畿千迴闔闔  
九重神州王化禁旅軍容瞻言偃草高視折衝  
帷辰清秘親賢允屬泛景鳳瀾飛華螭玉揮翰  
泉涌敷言藻縟式是便蕃思謀啓沃恭惟積德  
豐衍繁祉粵自天孫光升元子綠車逮事翠纓  
奉祀肅穆滿容儀形讓齒禮樂交暢愛敬兼資  
優游養德恭已承儀南山聘隱東序尊師有粹  
神儀深穆其度顯顯觀德温温審諭炯戒齊箴  
流連王賦入監出撫日就月將冲情玉裕令問



金相宜綏景福永祚元良神理冥漠天道難究  
仁不必壽善或愆祐遽瑤山之頽壤忽桂宮之  
毀構痛結幽明悲纏宇宙慟皇情之深憫摧具  
寮其如疚嗚呼哀哉迴環氣朔荏苒居諸霑零  
露於瑤圃下申霜於玉除夜漏盡兮空階曙曉  
月懸兮帷殿虛嗚呼哀哉將寧甫窶長違望苑  
渡渭涘於造舟遵長平之修坂藐鶴駕而不追  
顧龍樓而日遠嗚呼哀哉永隔存沒長分古今  
去榮華於人世即潛壘之幽深霏夕煙而稍起

慘落景而將沈聽哀挽之悽楚雜灌木之悲吟  
紛徒御而流袂欷纓弁以霑襟嗚呼哀哉九地  
黃泉千秋白日雖金石之能久終天壤乎長畢  
敢圖芳於篆素永飛聲而騰實嗚呼哀哉  
碑文

### 招真館碑銘

### 梁簡文帝

陳馬樞道學傳曰張裕天師十二世  
孫起招真館植名果畫山栖之趣梁  
簡文爲製碑按招真館即今常熟  
縣虞山南致道觀宋致和初改名唐



王懸河道類事相解招真館義為能致仙道今名本此舊亦稱招真治者二十四治圖載太上下二十四治付張道陵布化於後嗣師系師仙去盡立治玄都律云治者性命魂之所屬也此段地誌訛漏故復備詮

玉龜二始金書八會道浹地心功浮天外故帝可小惟貞能大德起同塵善生塞兌保物自然人符交泰掩映綠蘿穹隆紫蓋仙治之美此焉為最雄桂千步陽臺百丈水均下矚山踰高掌野寂雲興禽繁山響升虹夕栖豐雷朝上書藏玉柙藥蘊銀筒燒鉛雜鯉折桂和葱芥柯雖朽碎石無窮

### 四瀆祠碑銘

#### 王子淵

釋名曰天下大水四謂之瀆江河淮濟也瀆獨出其所而入海也 鄭樵金石略後周河瀆碑注云王褒撰趙文淵書天和二年未詳今銘文單叙河瀆即此碑矣 題云四瀆定誤

靈祠岳立貝闕雲浮寂寥詭怪髣髴神遊姬嬴分國河渭合流桃花春水靈草孤洲潼鄉河曲汾陰雕壤亂流不度龍門難上河魚送迎江妃



來往水開通跡山臨高掌智以藏往神以知來  
榮光離合雲氣徘徊水仙遺操津吏餘杯波息  
川后浪靖澹臺

### 周大將軍司馬裔碑

#### 庾子山

裔晉宣帝弟太常趙之十一世孫碑  
文中曾祖楚之贈征西大將軍北史  
作征南四年大軍東討此保定四年  
也當脫保定二字天保二年除信州  
刺史周無天保號當是天和之誤  
建德元年八月十二日合葬武公三  
時原墓誌作七月十三  
日葬武功郡三疇原

公諱裔字遵胤河內溫人也昔顓頊之命始則  
南正司天重黎之後又以羲和掌曆夏陽適晉  
得隨會而同奔東海避秦與毛公而俱隱其後  
金行受命玉笥南遷帝系極於輿圖中朝至於  
江表曾祖楚之晉太傅錄尚書揚州牧會稽文  
孝王之次子元顯之幼弟也元顯見害之後桓  
玄篡逆之初爰自齟齬容身屠釣河內道左抱  
劔長號代郡城前慟悲靈祭江淮志節之士汝  
頽風塵之客感激一言咸多依附既而雲生伏



龜星出鯨魚太白經天蚩尤映野公乃收合餘  
燼泣血登陴臨武牢之關據成臯之坂擁衆萬  
家歸於魏室魏明元皇帝遙授平南大將軍荆  
州刺史襲封瑯琊郡王尚河內公主命王承制  
從賓國之儀於時宋兵憑陵旗鼓侵逼虎牢不  
封金墉無援魏太武皇帝授王使持節侍中安  
南大將軍開府儀同三司給前後部鼓吹元戎  
啓行志雪冤耻登壇慷慨三軍掩泣黃河漕粟  
已出石門仕馬連旗將臨野坂旣而雲中柝起

代郡烽燃反旆南轅途窮北略贈征西大將軍  
都督梁益秦寧荆兖青豫郢洛十州諸軍事揚  
州牧司徒謚貞王祖金龍封瑯琊鎮西大將軍  
儀同三司吏部尚書贈司空謚康王父悅鎮南  
將軍豫州刺史漁陽莊侯以荆河刺舉時值亂  
離釁起蕭牆遂終非命公遺腹載誕流離寇逆  
複壁襁負深山擁樹程嬰之匿趙武從後家臣  
王成之藏李燮爲傭酒市遭太夫人憂苦草墳  
塋以終灰燧形骸毀瘠逾於喪禮年十有五始



幹家事楹前鑿柱即取遺書石上開松仍求故  
劔出身司徒府參軍除中堅將軍員外散騎常  
侍值魏室多難所在蜂起孟津以北無復封畿  
嵩山以南即爲鋒鏑公建議修武立柵温城函  
谷西封河橋北斷長亭籍馬並入武城百里租  
車咸輸温縣太祖文帝締構關都經綸夷阻招  
攜以禮懷遠以德馬文淵之擇主去隴坻而歸  
身竇周公之入朝在河西而奉詔大統七年蒙  
授平東將軍北徐州刺史十年河內故義四千

餘家願立忠誠須公衣錦乃授使持節領河內  
太守加前將軍懷州拓境兩鎮奔波柳泉轉戰  
三城授首十三年太祖召山東諸立義之將能  
率衆入關者有加重賞公率先而至領戶千室  
即以爲封固辭不受其菽粟之賜或以指困馬  
牛之賞將同量谷朝廷以華陽西極漢水東流  
歎孟達之奔兵恠劉封之失策魏前元年移鎮  
漢中除白馬城主領華陽郡守昔稱導漾今聞  
上瀦煙沉火井雨歇雲門其年授大都督加散



騎常侍柱國蜀國公開金牛之道通牧馬之關  
公卷甲北塞懸軍束馬遂得策預葭萌勳叅綿  
竹封龍門縣開國子蒲州刺史仍領新州尋授  
使持節車騎大將軍儀同三司大中正隆周授  
圖天保大定以公才望仍爲舊臣遂乃義深追  
遠恩隆繼絕即改封瑯琊縣公邑五百戶仍遷  
驃騎大將軍開府儀同三司都督巴州諸軍事  
巴州刺史武成二年被勅赴援信州魚復道阻  
屢却岑彭荆門水急幾沈吳漢公乃月峽先登

瞿唐直上天子以公操履忠勤儀刑亮直乃徵  
爲大御伯尋轉大御正邑一千一百戶樞機近  
侍出納絲言所謂多識舊章殿中無雙者矣四  
年大軍東討公所領義衆先守枳關授都督懷  
州諸軍事懷州刺史偃師張幕河陽牧馬雖接  
戰於富平已連營於官渡五年詔追還拜始州  
刺史更封信州賊山彰尋寶渝恃險峽路五尺  
絙釣纜通縣水三門橋飛齊渡旣而風行草偃  
谷靜山空前後平十一城獲九千餘口馬歸平



樂金輸水衡天保二年除信州刺史都督信州  
諸軍事朝發白帝暮宿江陵氣振巴丘之兵威  
警建平之戍五年遷潼州刺史益州柱國公降  
帝子之重鎮天井之星延閣擬於叢臺岷山方  
於代郡公仰稟雄謨參謀遠略故得身預舞陽  
之功位極長平之寵六年授使持節大將軍大  
都督西寧州諸軍事西寧州刺史方欲關沫若  
徼牂牁見夜郎之候習昆彌之戰而飛鳶墮水  
馬援去而無歸金馬騁光王褒行而不反嗚呼

哀哉七年正月十日薨春秋六十有五詔贈使  
持節大將軍懷邵汾晉州諸軍事懷州刺史夫  
人襄城公主魏獻帝之曾孫趙穆王之季女王  
姬肅恭禴翟禮典四教競莊三星令淑有光隆  
慮之賢足表平陽之盛生則從夫以秩死則同  
穴以禮建德元年八月十二日合葬於武公三  
時原大夫墓樹以柏諸侯墳高於雉吁嗟滕公  
來居此里詔謚定公禮也公資忠履孝蘊義懷  
仁直幹千尋澄波萬頃逢蒙射法力牧兵書星



辰高下之占風雨逢迎之氣故得師出以律天  
幸將軍者也至如官曹案牘未常煩壅戎馬交  
馳不妨餘裕足使四岳彌峻三台更明在朝四  
十一年身經一百餘戰凡任四郡歷八州未嘗  
以貨殖經懷去如始至渭南千畝之竹更懼盈  
滿池陽二頃之田常思止足身歿之日家無餘  
財素車白馬狹室崎嶇黃腸玄甲堦庭仄陋有  
詔冬官爲營寢室朱邑祭醑無所漢后是以賜  
金陳表妻子露立吳王爲之開館嗚呼哀哉世

子侃孝家忠國揚忠顯親是以勒此豐碑懼從  
陵谷植之松柏不忍凋枯銘曰

欽若曆象平秩寅賓少梁奔華地入咸秦族夷  
興馬書窮獲麟玉鏡云始金行乃構象浦通關  
龍沙開候上糝石起河陽水鬪五馬南浮三星  
東宿太傅作牧奄有江淹司徒避亂承制荆河  
南勞推轂猶思枕戈龍襟被野蒼兕凌波莊侯  
季年禍機相接誕公遺嗣崎嶇懷挾山竄趙武  
家藏李燮伍員道阻燕丹路遙南奔楚塞北避



秦橋水流登隴寒風度遼有功都護則重嫖姚  
懷書上馬習禮從戎陣圖六甲兵占八風藏松  
寶劍射柳琯弓推誠賈復屈節廉公八翼頻飛  
六條亟秉勇此仁義行茲寬猛持印山開沈黎  
盜靜取甲無丘均田不井懋功賜爵上將賞官  
軍中受詔塞外登壇方屠叅合更廛臯蘭渝川  
毒水燹道災氛地亡都尉灘悲使君谷寒無日  
山空足雲北風吹旒秋霖泣軍遣奠雙設銘旌  
兩布泌水同墳平陽合墓悲哀嗣子攀號靡訴

慟甚風枝悲深霜露自此何世從斯幾年麒麟  
欲鬪華表中燃地形樓起松心蓋圓茫茫丘壠  
代代英賢

周車騎將軍賀婁公神道碑

庾子山

昔者軒丘命氏初分兄弟之姓若水降居始建  
諸侯之國自是以官爲族因地爲宗水派枝分  
其可知矣公諱慈字元達本姓張清河東武城  
人也仕於周張仲爲孝友謀於晉張彥爲賢臣



韓有開地則五世強國趙有孟談則三卿不戰  
祖慶少習邊將憑仗智勇雖復五車竹簡不取  
博士之名一卷兵書即以將軍自許角端在手  
必無齊魯之侵蓮花插腰甚得蛟龍之氣爲車  
騎大將軍儀同三司散騎常侍霸城縣開國伯  
贈河州刺史父璨公子公孫有鑑基於天下良  
弓良冶有世業於家風書則百家可知劔則千  
人可敵三槐以鼎象物知其神姦五等以桓  
珪班瑞守其宮室君以才望兼而有之終於使

持節車騎大將軍儀同三司散騎常侍武定縣  
開國公贈河州刺史惟公秉山岳之靈受星辰  
之氣年在髫髮甫就勝衣竹馬來迎已知名於  
郭伋羊車在道即見賞於王澄豈直童子明經  
書生說卦而已至如禪河清論秋水高談故以  
辨折龜林聲馳鹿野國家官族君爲首姓起家  
車騎大將軍儀同三司襲爵爲公增邑合一千  
六百戶弱冠登朝傳呼甚寵漢魏台鼎故無此  
比中朝方伯罕有其年大冢宰任揔機衡是勤



王略惜君忠壯委以爪牙乃領左廂親信出爲  
梁州防主華陽西極漢水東流巴濮旣寧沈黎  
即靜保定四年王師北伐以君驍勇被召將兵  
師下宜陽身登函谷將燒白馬之城以覆烏巢  
之壘旣而中途甚雨未獲圍原軍師聞喪不成  
侵宋柱國趙王今上之第九弟也文則河間上  
書武則任城置陣作鎮岷丘揚旆錦水白虎之  
俗難安黃龍之盟不定以君智略入佐中權天  
和元年授使持節大都督治柱國總府司錄仍

轉司馬餘官封如故相如西喻鏤石於靈山武  
侯南征浮船於瀘水方之今日彼獨何人九品  
課工爲上之下四年入朝歸事宰旅即受載師  
大夫將命齊國尋盟出境即用和鄰之儀入國  
聞喪仍從會葬之禮可使南面此之謂乎尋以  
本官入治軍正至如渭水兵書在心爲志軒丘  
陣法聚石成圖旣得師不疲勞兵無怨讟入陪  
中禁更領儀同邸客城池門闌戶籍咸資巡警  
並用司存帝城近臣公室密戚如逢司隸似畏



都官既而孤城鄭嫗不相其年巴水深翁不醫  
其疾春秋三十有三奄捐官舍呂子明之疾甚  
歎軫吳王阮元瑜之長逝悲深魏主有詔贈某  
官禮也以建德四年三月日歸葬於河州苑川  
郡之禁山公六郡良家西河鼎族地壯金行人  
雄塞氣兵書七卷河水浮來射法三篇天弧夜  
下鋒旗不息刁斗恒驚猶得馬上讀書軍中習  
禮太史子義善於謀策諸葛公休長於撫馭四  
代儀同三司七世河州刺史鐘鼎成列冠蓋連

陰所謂生爲貴臣死爲貴神者也但以遊魂久  
客反葬途遠道阻山長妻孤子幼哀聲滿野愁  
氣連雲况復松檟飄飄方臨武威之戍丘陵迴  
遠直對臨洮之城馬援亡於武溪尸柩返於魏  
里梁鴻死於會計妻子歸於平陵嗚呼哀哉崎  
嶇遠矣昔者繁昌祠前即有黃金之碣德陽墓  
下猶傳青石之碑是謂勒功乃爲銘曰

七葉佐漢五世相韓忠臣入仕孝友當官青城  
仙洞黃石祠壇臺堪走馬書足迴鸞武定風颭



續文選卷三  
三十一  
霸城嚴肅並馳雙傳俱分兩竹重世刺舉連鑣  
袞服草靡青丘風馳赤谷世不乏賢挺茲上嗣  
孝有三德忠無二志劔足身挺書堪面試旌節  
既秉高蟬且珥龜轉印函馳盤綬笥左右將軍  
前後常侍繼踵五侯因循三事於旃九坂艫艫  
雙流還驅木馬更引金牛江波錦落火井星浮  
蹲酒望帝安歌蜀侯受脈河陽偏師洛浦署陣  
成臯連旗廣武朝兵滅竈夜營多鼓箭起六庫  
鋒摧九虎倏忽人亡俄然今古崇發兩星鑿鷲

二豎遊魂通夢言反舊塋紫泥賜冊黃腸贈行  
途登石紐路入金城寒關樹直秋塞雲平劔埋  
合柱書藏鑿楹武侯爲廟藥公爲社雲蓋低臨  
霓裳紛下碑枕金龜松橫石馬永矣身世留名  
華夏

瑞鳥銘

并序

虞士裕

大業拾遺記湯帝征遼回次柳城鄒  
文望海鎮步出觀望有大鳥二素羽  
丹嘴狀同鸞鷲自霄漢翻下雙下高  
一丈四五尺長八九尺徘徊馴擾翔



舞御營勅著作佐郎虞綽製  
瑞鳥銘以進上命鐫於其所

維大業八年歲在壬申夏四月丙子皇帝底定  
遼碣班師振旅龍駕南轅鸞旌西邁行宮遷次  
於柳城縣之臨海頓焉山川明秀寔仙都也旌  
門外設欵跨重阜帳殿周施降望大壑息清蹕  
下輕輿警百靈綏萬福踐素砂步碧沚同軒皇  
之襄野邁漢宗於河上想汾射以開襟望蓬瀛  
而載佇窅然齊肅藐屬姝庭兼以聖德遐宣息  
別風與淮雨休符潛感表重潤於夷波璧日曬

光卿雲舒采六合開朗十洲澄鏡少選之間儵  
焉靈感忽有祥禽皎同鶴鷺出自霄漢翻然雙  
下高逾一丈長乃盈尋靡霜暉於羽翮激丹華  
於觜距鸞翔鳳跕鵲起鴻騫或蹶或啄載飛載  
止徘徊馴擾咫尺乘輿不藉揮琴非因拊石樂  
我君德是用來儀斯固類仙人之騏驥冠羽族  
之宗長西王青鳥東海赤鴈豈可同年而語哉  
竊以銘基華岳事乖靈異紀迹鄒山義非盡美  
猶方冊不泯遺文可觀况盛德成功若斯懿鑠



懷真味道加此感通不鐫名山安用銘異臣拜  
稽首敢勒銘云

來蘇興怨帝自東征言復禹績乃御軒營六師  
薄伐三韓肅清龔行天罰赫赫明明文德上暢  
靈武外薄車徒不擾苛慝靡作凱歌載路成功  
允鑠反旆還軒遵林並壑停輿海澨駐蹕巖陟  
宵想遐凝藐屬千里金臺銀闕雲浮岳峙有感  
斯應靈禽效祉飛來清漢俱集華泉好音玉響  
皓質冰鮮狎仁馴德習習翩翩絕迹無泯於萬

斯年





國家圖書館, NATIONAL CENTRAL LIBRARY, TAIWAN, R.O.C

續文選卷十三

三



續文選卷之十四

武原胡震亨孝轅撰

墓誌

陶貞白先生墓銘

梁簡文帝

舊載昭明太子集按昭明先弘景薨  
 弘景傳簡文臨南徐州欽其風素召  
 至後堂與談論數日蕭氏系出南徐  
 州故云昔在粉壤早逢地上之術蓋  
 取漢祖粉榆社之義簡文悼孔休源  
 今亦稱南徐為粉壤舊本誤作粉壤  
 并改之元劉大彬茅山志宋元祐  
 初中貴人羅淳一學道山中意隱居





之藏有丹砂異書穴墓往觀唯鐵繩  
縣一空棺內有一劍并孟鏡各一其  
壙甃甃環繞相次成文隱起甃上文  
曰華陽隱居幽館勝力菩薩捨身釋  
迦佛隨弟子太上道君之臣修上乘  
之六度口口口之三真懋靈岳以委  
迹游太空  
而極神

維大同二年龍集丙辰克明三月壬寅朔十二  
日癸丑巳時華陽洞陶先生蟬蛻於茅山朱陽  
館先生諱弘景字通明春秋八十有一屈伸如  
恒顏色不變有制贈以中散大夫謚曰貞白先  
生遺舍人主書監護喪事十四日巳時窆于雷

平之山若夫真以歸空爲美道以無形爲貴不  
知悅生大德所以爲生不知惡死谷神所以不  
死妙矣哉隱顯變化物莫能測旣而岫開折石  
天墜玉棺銀書息簡流珠罷竈九節麗於空中  
千和焚於地下仙官有得朋之喜受學振臨谷  
之悲余昔在枌壤早逢圯上之術今造元良屢  
稟浮丘之教握留符而惻愴思化杖而酸辛乃  
爲銘曰

無名曰道不死爲仙亦有元則兼稱稚川遁刑



續文選卷十四  
解化自昔同然。猗與夫子受籙歸玄。梨傳苑吏  
書。因賈船虎車。照景蜺拂。凌煙餘花。灼燦春澗。  
潺湲鬱鬱。茅嶺悠悠。洞天三山。白鶴何時復旋。

### 楊都興皇寺釋法朗墓誌銘

陳後主

續高僧傳曰法朗俗姓周氏沛人祖奉叔齊青州刺史父神歸梁沛郡太守朗少習軍旅早經行陣北伐於青州入道永定中奉勅住興皇寺大建十三年遷化窆於攝山西嶺太子詹事江總爲誌文後主時在東宮爲銘

洪源遠采傳芳馥。蕙君子哲人英芬。是繼朱旌。

旣杖青組。仍曳紉虎戎。卸貳貌狄。制功可冠軍。  
業非出世。揖彼聲色。超此津濟。津濟伊何裂斷。  
網羅忍衣。早記乘樓。夜過航斯。苦海涸此愛河。  
若非智士。孰寄宣揚。法雲廣被。慧日舒光。旣推  
衡櫓。自闢金湯。夢齊鼓說。應異鍾霜。識機知命。  
同彼現病。夙心栖遁。度脫難竟。化緣已矣。乃宅  
丘。弈智炬寂滅。頽巖遼。復遼。復空岑。搖落寒侵。  
弦餘月暗。霧下松深。香滅窮壠。旛橫宿林。切切  
管清。遙遙鼓聲。野煙四合。孤禽一鳴。風悽唳斷。



流急寒生神之淨土形沈終古勒此方墳用旌  
蘭杜

周故大將軍函國公墓銘

庾子山

周書函國公廣太祖長兄顥之孫廣  
薨故吏李克信等上表申其宿志窀  
穸之禮庶存儉約於是加贈太  
保葬於隴西所司一遵遺旨

公諱廣字乾歸邵惠公之元孫函孝公之長子  
若木拂日長虵委天龍圖幕河之光神鼎連雲  
之氣六辯構宇五運徵祥是以維嶽降神自天

生德凝脂點漆日角珠庭爲子則名高五都爲  
臣則光照千里華蓋中天之峰未階其峻虞淵  
浴日之水不盡其源歲在瑯車年方竹馬月中  
桂樹切問能訓石上木生懸思即悟年十一孝  
公薨煢煢在疚孺慕過禮泉驚孝水竹動寒林  
三行克宣八翼斯舉大周建國宗子維城設墳  
封人分司典命開國天水郡公食邑二千戶元  
年授使持節驃騎大將軍開府儀同三司其年  
四月授都督秦州刺史孝公久牧汧隴遺愛在



人今茲見撫我君之子豈獨司隸之臺鮑宣累  
葉丞相之府韋賢重代二年拜大將軍方衛青  
之張幕冊重元勲譬韓信之登壇榮高獨拜武  
成元年遷都督興梁等十九州諸軍事梁州刺  
史嶠冢導漾乃濟漢之東流蔡蒙旅平實華陽  
之西極其年九月改封蔡國公食邑萬戶地接  
韓城關隣楚鄣戶封八縣恩深寇恂之功邑啓  
萬家事極曹參之賞保定元年授小司寇犴戶  
苔生囹關籥動載酒屬車幸無冤氣觀囚軍府

或聽鳴琴二年轉守蒲城都督潼關等六防諸  
軍事其年閏月遷都督秦渭等十二州諸軍事  
秦州刺史公亟牧冀城頰藩隴坻豪桀斂手貪  
殘解印加以上谷精兵漁陽噪鼓北臨高柳南  
望長榆匈奴下馬之山貴相藏酒之谷莫不遠  
慕威聲遙承風化二年奉詔向甘州迎皇后有  
文書手仲子之歸紀裂繻來卿爲君逆自非名  
高絕國威被和鄰豈得稱族而行尊君之命四  
年授柱國大將軍昭陽以功高見用項梁以名



將當官以今方之彼有慙德天和三年授都督  
陝虞等八州其防諸軍事陝州刺史屈產垂棘  
既有滅虢之兵王官羈馬非無絕秦之路公以  
正正鼓旗閑閑車軌服叛威邊算無遺策但以  
中外久勞積斯災疾山川則並走羣望賓客則  
諸侯在門是以請謁承明言歸湯沐方詢夏郊  
之祀或辯桑林之崇更除秦州刺史仍襲父爵  
函國公分流之嶺未登晚塞之城空望太夫人  
以公羸瘠悲泣相守曾氣交衝奄捐館舍公頓

伏苫寢水漿不入雖王人勸奪瘡鉅愈增母死  
於子子死於親慈孝之道一朝摠集大漸之辰  
春秋二十有九四關罷市三軍行哭言尋聽訟  
猶見寒棠還顧空營唯餘衰柳謚贈某官禮也  
六年六月歸葬於秦州之某原玄甲啓路追軫  
驃騎之功龍旂贈行深悼東平之遠公亮直惟  
忠溫恭惟孝居之仁義飾以禮樂風神機警聰  
獻精明有仞於宮墻無形於喜愠金版玉策之  
記枕籍忘疲蘭葉芝花之圖膏映必舉碣石秋



雲昭陽落月思風含臆言泉流吻翩翩書記則  
阮瑀陳琳荏荏風流則王濛謝朓語其百發弓  
絕於猿吟論其百中劔深於鴈陣枚乘之望梁  
苑不憚棄官樂毅之求燕路無辭千里至如應  
變將略雷電立成帷帳謀猷孫吳闇合有品藻  
人理之志有清平天下之心鵬路忽摧龍津遂  
壅嗚呼哀哉大宰早茂三荆長辭萬始撫養遺  
孤連枝同氣馬援之誠兄子義存謹飭王况之  
事世叔情深愛敬同德比義此之謂乎乃爲銘

曰

御乾從紀乘離作聖白環讓德玄珪受命平一  
地紐增輝天鏡傍廕數國前臨七政地屬先登  
時逢下武玉璜撥亂金騰光輔衛晉承家邢茅  
胙土波分建木派流玄滬景命寅叙徽猷淵塞  
忠有令圖孝爲全德山節蒞政桓珪守國瀚海  
將臨燕山行勒平樂高宴金華說經論儒壁水  
親禮明庭相風待賦承露須銘乘舟向日策馬  
隨星德舉克明能賢允淑上將授脈元戎推轂



趙失東漁胡亡南牧箭下遼城泥封函谷袞衣  
頰露丹襜亟卷約法情推繁辭理遣盜烏懸察  
疑蛇立辯人共官園家同野繭籥雲摧景轉風  
落仞星裂中台山傾左鎮夏楹舍爵殷階啓殞  
繆幕躡行明旂庭引秦川直望隴水分飛山河  
滿目容衛靈歸陵圖石馬車畫袞衣小山搖落  
長林變衰悽愴原隰荒涼宅兆樹密人稀山多  
路少十里松城千年華表夜臺方寂窮泉無曉  
周大將軍懷德公吳明徹墓誌

### 庾子山

陳書大建九年司空吳明徹破周將  
梁士彥衆數萬於呂梁十年北討衆  
軍敗績於呂梁明徹及將卒已下並  
爲周軍所獲又南史明徹窮蹙就執  
周封懷德郡公位大將軍以憂遘疾  
卒於長安後故吏盜其柩歸宋彭  
從夏文苑辯證曰吳明徹誌兖州人  
兖州當作南兖州在江都郡又非誰  
郡之南兖州梁置南兖州後齊改爲  
東廣州陳復曰南兖有六合縣舊置  
秦郡南史明徹  
秦郡人即此郡

公諱明徹字通昭兖州秦郡人也西都列國長  
沙王功被山河東京貴臣大司空名高霄漢豈



直西河有守智足抗秦建平有城威能動晉而已也祖尚南譙太守父樹右軍將軍抗拒淮沂平夷濟漯代爲名將見於斯矣公志氣縱橫風情倜儻圮橋取履早見兵書竹林逢猿偏知劔術故得勇爵登朝材官入選起家東宮直後除左軍葛瞻始嗣兵戈仍遭蜀滅陸機纔論功業即值吳亡公之在梁未爲達也自梁受終齊卿得政禮樂征伐咸歸舜後是以威加四海德教諸侯蕭索煙雲光華日月公以明略佐時雄圖

贊務鱗翼更張風颺遂遠冠軍侯之用兵未必師古武安君之養士能得人心擬於其倫公之謂矣爲左衛將軍尋遷鎮軍丹陽尹北軍中候總政六師河南京尹冠冕百郡文武是寄公無愧焉瀟湘之後憑陵島嶼風船火艦周瑜有赤壁之兵蓋舳櫓魏齊有橫江之戰仍爲平南將軍開府儀同三司都督湘衡桂武四州刺史遂得左廣迴肩麟車反暢長沙楚鐵更入兵欄洞浦藏犀還輸甲庫雖復戎歌屢凱軍幕猶張



淮南望廷尉之囚合肥稱將軍之寇莫不失穴  
驚巢沉水陷火爲使持節侍中司空車騎大將  
軍都督南北兗青譙五州諸軍事南兗州刺史  
南平郡開國公食邑八千戶鼓吹一部中台在  
玄武之宮上將列文昌之宿高蟬臨鬢吟鷺陪  
軒平陽之邑萬家臨菑之馬千駟坐則玉案推  
食行則中分麾下生平若此功業是焉旣而金  
精氣壯師出有名石鼓聲高兵交可遠故得艫  
舳所臨蓋於淮泗旌旗所襲奄有龜蒙魏將已

奔猶書馬陵之樹齊師其遁空望平陰之烏俄  
而南仲出車方叔蒞止暢轂文茵鈎膺儻革遂  
以天道在此南風不競昔者裨將失律衛將軍  
於是待罪中軍爭濟荀桓子於焉受戮心之憂  
矣胡以事君宣政元年屆於東都之亭有詔釋  
其鸞鑣蠲其壘社始弘就館之禮即受登壇之  
策拜持節大將軍懷德郡開國公邑二千戶歸  
平津之館時聞櫪馬之嘶舍廣城之傳裁見諸  
侯之客廉頗眷戀寧聞更用之期李廣盤桓無



復前驅之望霸陵醉尉侵辱可知東陵故侯生  
平已矣大象二年七月二十八日氣疾增暴奄  
然賓館春秋七十七即以其年八月十九日寄  
瘞於京兆萬年縣之東郊詔贈某官謚某禮也  
江東八千子弟從項籍而不歸海島五百軍人  
爲田橫而俱死焉嗚呼哀哉毛修之埋於塞表  
流落不存陸平原敗於河橋死生慙恨反公孫  
之樞方且末期歸連尹之尸竟知何日遊魂羈  
旅足傷溫序之心玄夜思歸終有蘇韶之夢遂

使廣平之里永滯冤魂汝南之亭長聞夜哭嗚  
呼哀哉乃爲銘曰

九河宅土三江貢職彼美中邦君之封殖負才  
矜智乘危恃力浮磬戢鱗孤桐垂翼五兵早竭  
一鼓前衰移營滅竈空幕禽飛羊皮詎贖畫馬  
何追荀瑩永去隨會無歸存沒俄頃光陰愴悽  
岳裂中台星空上將眷言妻子悠然亭障鬼或  
可招喪何可望壯志沉淪雄圖埋沒西隴足抵  
黃塵碎骨何處池臺誰家風月墳塋遂羈遠營魂



流寓霸岍無封平陵不樹壯士之隴將軍之墓  
何代何年還成武庫

周趙國公夫人紇豆陵氏墓誌銘

庾子山

周書趙王招初封趙國公寶  
熾其先仕魏賜姓紇豆陵氏

夫人諱含生本姓竇扶風平陵人魏其朝議列  
侯則莫能抗禮安豐奉圖功臣則咸推上席外  
戚列傳旣聞建武之書仲山古鼎或表單于之  
獻祖略少保建昌郡公父熾柱國大將軍大宗

伯鄧國公孟津大誓常預同德之臣咸陽違約  
克贊先登之主並得位入六府功參八柄夫人  
有文在手有象應圖榮曜夙彰徽華早茂肅恭  
以禮受教於公宮言容以德有聞於師氏及乎  
進賢君子內主邯鄲琴瑟在堂輜駟是服長久  
於節不無秋菊之銘履端於始或有椒花之頌  
豈止莊姬掩笑楚相知慙定姜問兆齊兵不入  
武城二年冊拜趙國公夫人漢王聞立義之婦  
邑以延鄉齊侯見有禮之妻封之石窳異代同



榮差無慙德柱國殿下居若木之一枝在天漢  
之別派揚旌玉壘驅傳銅陵南通向日之民東  
被無龍之國夫人從政月峽贊德雲門錦濯江  
波還臨織室山明石鏡即對粧樓旣而玉律頻  
移金爐不變胡香四兩嗟西域之使稀靈草一  
枝恨瓊田之路絕天和五年四月二十二日薨  
於成都之錦城春秋二十孫子荆之傷逝怨起  
秋風潘安仁之悼亡悲深長簟况復仙臺永別  
無復簫聲傳母長歸唯留琴曲七年二月日歸

葬於長安之洪瀆原詔贈趙國夫人禮也雲雨  
去來旣留連於楚后光陰離合實惆悵於陳王  
銘曰

河西斗絕觀津孤起章武賢臣安豐賢仕木樓  
千仞金山萬里紹慶邢姨基昌宋子施衿趙北  
侍姆秦南紘緹禮數禴狄駢驂義超江汜仁流  
葛覃玉筐迎鷲金籠助蠶敬愛純深端莊淑問  
有光國史無形喜愠舉案外恭停機下訓馨馥  
於蘭年華於舜風雨消散神靈離絕婺女還星



姮娥歸月左楹夕奠高堂朝發空揚凌波更無  
迴雪下平曰隰高平曰原西臨火井北望塞門  
猶垂雉服尚駕魚軒平原忽矣天道何言山迴  
地市路沒滕城松悲鶴去草亂螢生新雲別起  
舊月孤明賢墳永式節隴常貞

周譙國公夫人步陸孤氏墓誌銘

庾子山

周書譙王儉文帝子初封譙國  
公陸通文帝時賜姓步六孤氏

夫人諱某字某本姓陸吳郡人也大夫拓境百

越來庭丞相勒兵三江席卷高祖載爲劉義真  
長史留鎮關中旣沒赫連因即仕魏臨終誠其  
子孫曰樂操土風不忘本也言念爾祖無違此  
心祖政驃騎大將軍儀同三司恒州刺史父通  
柱國大將軍大司馬文安公匡贊經綸參謀揖  
讓名高廣武功重長平夫人七德含章四星連  
曜敬愛天情言容禮典九日登高作銘秋菊三  
元告始或誦春椒年十有四娉於譙國友其琴  
瑟愈恭節儉之心伐其條枚實秉憂勤之德鄰



地登高之錦自濯江波平陽採桑之津躬勞蠶  
月天和元年冊拜譙國夫人東武亭之妻旣稱  
有秩南城侯之婦還聞受封柱國殿下以名華  
分照增城峻土揚旌夔道問政邛都白狼之溪  
途艱黃牛之坂荔枝之山地險蒲萄之國夫人  
別離親戚關河重阻夷歌一曲未足消憂猿鳴  
三聲沾衣無已是以天厲之疾遂成沈痼玉瀝  
難開金膏實遠建德元年七月九日薨於成都  
私第春秋二十有一即以其年十一月二十二

日歸葬長安之北原詔贈譙國夫人禮也殿下  
傷神秋月掩淚長松周季直之留書更深冥漠  
潘安仁之詞藻徒增哀怨豈言西河女子獨見  
銀臺東海婦人先逢金闕銘曰

芟陵反旆椒山止戈金精據嶺昌閣凌波西遊  
卿相東裂山河華亭冠冕穀水絃歌震維徙族  
燕垂從宦塞入飛狐關連鳴鴈策預登阜功參  
臨澗寶鼎留銘彫戈餘贊應圖淑令秉禮言歸  
魚軒馮軾澤雉文衣明月照鏡仙石支機行雲



細起迴雪輕飛北降帝子南麾蜀守若水旣開  
靈山已鏤月峽猿啼江神牛鬪星機北轉日轡  
西迴陽泉伏氣陰律沉灰鶴辭吳市鳳去秦臺  
神光離合燈影徘徊雙流反葬百兩迴旌少女  
離位夫人去城帷堂野設帳殿郊營山川竒事  
風月無情搖落丘隴荒涼封域樹樹秋聲山山  
寒色草短逾平松長轉直節墳方固園陵永植  
周儀同松滋公拓跋競夫人尉遲氏墓誌

銘

### 庾子山

周書尉遲迴尚魏文帝女  
金明公主夫人迴之女

夫人諱某河南洛陽人也祖父太師柱國公魏  
室喪亂經綸夷阻周朝建國匡翊揖讓圖謀帝  
系即有內外之親分裂山河仍爲舅甥之國夫  
人容範端莊儀形淑令六義觀德南風有夫人  
之詩八卦成形東方有少女之位姆傳習言公  
宮教業箴管線續佩幌蒞蘭年十有二出適儀  
同拓跋競衣其翟服旣得宗婦之儀乘其魚軒



還從列國之禮標梅三實無闕其時天桃九華  
能修其政某年某月冊拜迴洛縣君母金明公  
主魏文帝長女春則帝女採桑秋則王姬築館  
夫人出入主家遨遊戚里濯龍園苑長門宮殿  
旣而膏腴美疢華茂傷年沉痾牀帳蒸離寒暑  
三世之術無乏於醫門百草之本徒窮於藥性  
建德三年五月七日亡春秋三十昔西河女子  
值九節之菖蒲東海婦人得三山之芝草無由  
再遇悲矣如何即以其年十月十五日葬於京

兆之北陵原龜筮告辰丘陵啓奠西臨織女之  
廟南望湘妃之墳嗚呼哀哉乃爲銘曰

父曰帝師母曰王姬車服不繫江漢無思是生  
令淑觀禮敦詩聲超宋子德茂邢姨繼世盛德  
思賢克舉奠雁迎門濡蘋實俎奉盥如事移茵  
即序春冰浴蠶秋機秉杼帝鄉近親帝城近臣  
濯龍親戚平陽主人金波迴月玉樹臨春弄玉  
鳳皇昌容紫草自此千年無人得道舜華榮曜  
飄零何早渭水北原平陵故園纔通谷口即望



寒門吁嗟此地去矣歸魂孟冬十月長松九年  
親賓掩淚悽愴何言

思舊銘 并序

### 庾子山

觀寧侯永梁周二書並無傳考惟鄱陽嗣王範傳云臺城不守範引軍至盆城遣弟觀寧侯永將兵通南川助莊鐵陳周敷傳云永避難流寓聞敷信義往依於臨川敷愍其危懼厚加給郵送之西上又王褒集有送觀寧侯葬詩

歲次攝提星居鶉首梁故觀寧侯蕭永卒嗚呼

哀哉人之戚也既非金石所移士之悲也寧有  
春秋之異高臺已傾稷下有聞琴之泣壯士一  
去燕南有擊筑之悲項羽之晨起帳中李陵之  
徘徊岐路韓王孫之質趙楚公子之留秦無假  
窮秋於時悲矣况復魚飛武庫豫有棄甲之徵  
鳥伏狄泉先見橫流之兆星紀吳亾庚辰楚滅  
紀侯大去邠子無歸原隰載馳輟轅長往甲裳  
失矣餘皇棄焉河流酸棗杞梓與樗櫟俱沈海  
淺蓬萊魚鱉與蛟龍共盡焚香復道詎歛冤魂



載酒屬車寧消愁氣芝蘭蕭艾之秋形殊而並  
悴羽毛鱗介之怨聲異而俱哀幕府昔開俊賢  
翹首爲羈終歲門人謝焉及乎東首告辭西陵  
長往山陽車馬永別郊門潁川賓客遙悲松路  
嵇叔夜之山廬尚多楊柳王子猷之舊徑唯餘  
竹林王孫葬地方爲長樂之宮烈士埋魂即是  
將軍之墓昔嘗歡宴風月留連追憶平生宛然  
心目及乎垂翅秦川關河羈旅美酒酌焉猶思  
建業之水鳴琴在操終念華亭之鶴重爲此別

嗚呼甚哉麟亡星落月死珠傷瓶罄罍耻芝焚  
蕙歎所冀鐘沉德水聲出風雲劔沒豐城氣存  
牛斗潸然思舊乃作銘曰

風雲上慘舟壑潛移駸駸霜露君子先危紀侯  
大去懷王不反玉樹長埋風流遂遠荀卿故縣  
慶封餘邑萬里歸魂修門詎入城連武庫山枕  
盧龍思歸道遠反葬無從徒留送鴈空靡長松  
疇昔隆貴提攜語嘿託情嵇阮風雲相得有酒  
如澠終溫且克朝陽落鳳大野傷麟佳城鬱鬱



流寓於秦山陽相送惟餘故人孀機發緯獨鶴  
孤鸞閨深夜靜風月俱寒生平已矣懷故何期  
匣中絃斷隣人笛悲昔爲幕府今成總帷

行狀

沛國羣篇既挂空目  
安成衆製差無完簡

弔文

投唁湘魂即體騷辨遠獻商賢冥  
漠其吐以金石鉅文聊恣閏舉

祭文

### 祀魯山神文

#### 蕭世調

漢志顏師古注魯山即淮南所云魯  
陽公與韓戰日返三舍者也在梁郢

州邊界時邵陵爲州  
刺史有事境內名山

竊以首山鬱律表二叔之清風趙國隱淪擅三  
公之靈迹北坂祠城流光夜起東嶺叢室甘雨  
晝零故能徵應不褰介福無爽金壇玉宇是衆  
妙之遊遨丹崖翠幄信靈人之響像霓裳虬蓋  
轉日車而競前駕象乘豹載靈旗而撻集江妃  
漢女含睇來趨湘娥洛嬪宜言在側鳴璆撫劔  
俠席徘徊緩節陳竽滿堂繁會奠椒懷精之歡  
傳芭代舞之樂桂醕溢於羽樽蕙肴盈於蘭藉



既醉既飽景福攸同不震不騰神保是格包魚載  
之薦已畢慶報之澤攸先願化昌而俗阜俾多  
祐之在旃同匪石之無轉欣滯穗之有年惟東  
皇今戾止等南山而不騫

### 祭夫徐悝文

### 劉令嫺

梁書徐悝字敬業東海剡人幼聰敏能屬文為晉安內史卒喪還建業妻劉令嫺為祭文辭甚悽愴父勉欲造哀文既觀此作於是閣筆按勉客喻普通五年春二月丁丑余第二息排喪問至此云大同五年誤又勉大

同元年  
已卒

維梁大同五年新婦謹薦少牢於徐府君之靈  
曰惟君德爰禮智才兼文雅學比山成辯同河  
瀉明經擢秀光朝振野調逸許中聲高洛下含  
潘度陸超終邁賈二儀既肇判合始分簡賢依  
德乃隸夫君外治徒奉內佐無聞幸移蓬性頗  
習蘭薰式傳琴瑟相酬典墳輔仁難驗神情易  
促電碎春紅霜雕夏綠躬奉正衾親觀啓足一  
見無期百身何贖嗚呼哀哉生死雖殊情親猶



一敢遵先好手調薑橘素俎空乾奠觴徒溢昔  
奉齊眉異於今日從軍暫別且思樓中薄游未  
反尚比飛蓬如當此訣永痛無窮百年何幾泉  
穴方同

雜文 前選無

### 周經藏願文

王子淵

隋費長房上三寶錄序周藏弗刊目錄兼直殿焚卷部未詳文云歲在昭陽能集天井造一切經藏按爾雅歲在癸巳昭陽周禮疏歲星一歲移

一辰本在東方謂之龍石氏星經井八星謂之東井亦曰天井帝王世紀井至柳鶉首之次於辰在未以年歷推之當是周武帝保定三年癸未也宋釋志磐統記誤以願文為詔又解昭陽為春孟天井為歲在申詳井宿雖有十五度在申然東井與鬼天文家並云屬未顧弗深考爾

蓋聞九河疏迹策蘊靈丘四徹中繩書藏羣玉  
亦有青丘紫府三皇刻石之文綠檢黃繩六甲  
靈飛之字豈若如來秘藏譬彼明珠諸佛所師  
同夫淨鏡鹿苑四諦之法尼園八犍之文香山  
巨力豈云能負以歲在昭陽龍集天井奉為



云奉造一切經藏始乎生滅之教訖於泥洹之  
說論議希有短偈長行青首銀函玄文玉匣陵  
陽餌藥止觀仙字關尹望氣裁受玄言未有龍  
樹利根看題不遍斯陀淺行同座未聞盡天竺  
之音窮貝多之葉灰分八國文徙罽賓石盡六  
銖書還大海仰願過去神靈乘茲道力得無生  
忍具足威儀又願國祚遐長臣民休慶四方內  
附萬福現前六趣怨親同登正覺

續文選卷之十四

